

萬 有 文 庫

第二集七百種

王 雲 五 主 編

宋 詩 紀 事

(九)

厲 鶚 馬 日 瑄 輯

商 務 印 書 館 發 行

宋詩紀事

(九)

輯瑄曰馬 藝厲

國學基本叢書

萬有文庫

第二集七百種

總經理

王雲五

商務印書館發行

# 宋詩紀事卷五十四

胡朝穎

朝穎字達卿淳安人乾道八年進士官提刑有靜軒集

錢唐厲鶚緝  
錢唐許梓勘定

風鈴

風不能調碎玉聲宮商濫奏竟難名誰家稚女敲方響一曲從頭學不成

旅夜書懷

十日春光九日陰故關千里未歸心遙憐兒女寒窗底指點燈花語夜深以上前賢小集拾遺

小金山

天光雲影碧相涵百頃玻璃一望閒綠水遶門迷客渡白雲終日伴僧閑疎鐘破曉潛蚪動老木成陰倦鳥還喚取頭陀磨石壁爲渠題作小金山淳安縣志

王孝巖

孝巖吳興人乾道八年進士淳熙間處州推官

舫齋孝巖建

我本湖濱一漫郎。生來住處波茫茫。時尋畫舸破烟水。菰蒲滿路荷花香。一川窈窕詫紅蓼。兩岸蘆葦明秋霜。船頭鷗鳥日來往。溪上風月相迎將。一行作吏便相失。合眼靈運春池塘。紛紛雁鷺實可厭。紙尾姓字隨低昂。簿書終是俗人甚。江湖到了難相忘。公餘賴有數椽在。疎櫺兩行如船裝。不知風波世路險。穩著萬斛隨風檣。人生短篷何日近。向來茗誓今括蒼。江山轉柁千萬里。故人兩地遙相望。誰能爲我幻竹葉。頃刻泛宅歸滄浪。祇憑平生氣湖海。隨所寓處爲餘艙。夜寒滿載明月窗。北風打頭人不忙。動來況自不如靜。悔吝不到虛舟傍。胸襟五湖與三江。是中莫測誰望洋。直須喚取李郭輩。相與共泛無何鄉。處州府志

陳傅良

傅良字君舉。温州瑞安人。乾道八年進士。寧宗朝。累遷中書舍人。除寶謨閣待制。卒諡文節。有止齋集。

止齋卽事

教子時開卷。逢人強整襟。最貧看晚節。多病得初心。地僻菱蓮好。山低竹樹深。寄聲同燕社。明日又秋砧。

題仙巖梅雨潭

袞袞羣山俱入海。堂堂背水若重闌。怒號懸瀑從天下。傑立蒼崖夾道陳。晉宋至今堪屈指。東南如此豈無人。結廬作對吾何敢。聊向漁樵寄此身。

癸丑冬車駕過宮留相還朝

一聲警蹕接天齊。馳道無塵馬不嘶。月御順行隨日轂。乾端和氣市坤倪。三槐相繼歸公袞。細柳還須聽將聲。老矣尙能歌二聖。不應專美在浯溪。以上止齋集。

劉燾

燾字晦伯。建陽人。受學晦翁東萊之門。乾道八年第進士。寧宗朝累遷國子司業。奏乞罷僞學之禁。擢權工部尙書兼太子右庶子。卒贈光祿大夫。諡文簡。有雲莊外集。

金國賀正旦使人到闕紫宸殿宴

榆關玉塞靜無塵。嘉定于今第四春。兩國交馳通好使。八方同作太平人。翠巖鼓奏娛嘉客。白獸樽浮賞諫臣。聖歷欲茲天共遠。年年玉帛會楓宸。

瑞慶聖節集英殿宴

皇家卜世過周唐。天啓真人應運翔。抱日預占恭邸夢。飛龍曾報皖山祥。翠雲影外來金母。紅霧香中擁玉皇。樂府賦工無以祝。願將金鑑代珠囊。

東宮

鶴駕通宵入問安。龍墀清曉狎朝班。天顏喜見重輪月。春色先回萬歲山。

皇帝閣春帖子

東風昨夜入簾帷。便覺深宮漏影遲。一曲涼州花盡放。不須更作報春詩。以上雲莊外集。

李大異

大異、字伯珍、隆興府新建人。乾道八年進士。仕至諫議大夫。知建康府。

曾兄惠然見臨、篤敍世契。示以先哲遺墨、稽首敬觀。因題其後。嘉泰壬戌七夕前三日。

家傳文獻六經香。袖有驪珠日月光。喬木陰陰人已遠。祗應故笏在甘棠。鐵網珊瑚。

姚宋佐

宋佐、字輔之、郴州人。乾道八年進士。爲靜江府教授。

梅月吟

梅花得月太清生。月到梅花越樣明。梅月蕭疎兩奇絕。有人踏月繞花行。詩人玉屑。

丁逢

逢晉陵人。乾道進士。官至寶謨閣待制。知郴州。

次袁尙書巫山十二峯二十五韻

半雨半晴山弄姿。溼雲吹風不成凝。靡蕪漸徧楚宮碧。蒲萄未漲巴江遲。西南大尹初涉境。山川效職加瑰奇。翠屏窺窗故娟妙。松巒暎柁相參差。浮雲擊汰睨青壁。靈君一去今安之。吟情浩蕩隘宇宙。萬景敢云驕莫隨。當年楚境半天下。屏王醉夢方昏疲。珊瑚玉佩赤帝女。星髻羽蓋蜺旌旗。錫符賜策豈無意。侍臣託諷褰幃帷。尹今文采繼騷雅。夢得詩魂羞竹枝。吾行一百八盤上。鑽天但覺雲天低。荒荒野驛虎豹怒。陰陰嶺樹猿猱嬉。危登險陟倦三伏。口吐背浹嗟胡爲。豈知舟行有奇觀。山靈祕惜留歸時。青簾白舫夙已具。芒屨布鞵將從茲。胷中丘壑未塵土。頭上歲月從驅馳。雖無勝具逐支許。尙有樂趣同周施。何當

投劾便歸去。登船打鼓清江溜。更催尺一喚公觀。同看二六浮脩眉。常山蛇陣想魚復。建溪龍焙傾螻蛄。攤錢晝浪看三老。杖藜晚岸尋名緇。昔人汶嶺寄書帖。更歌蜀道先吁嘻。未若尹外岳牧中丞疑。愛春江之赴滄海。清明秋月之挂峨眉。盡驅三峽波濤筆。第入思齊訪落詩。全蜀藝文志

### 到郴

眼界山逾碧。腰輿步轉高。未疑禦魑魅。自笑尹鼯獠。末路成三折。衰年感二毛。次山雖漫仕。安敢遽辭勞。  
郴州文志

### 蔡幼學

幼學字行之。瑞安人。乾道進士。寧宗朝。累官權兵部尚書。兼太子詹事。卒諡文懿。有育德堂集。

### 田園

野水萍無主。晴風草自香。庭陰新似染。物色去如忙。岸樹魚依綠。畦花蝶鬪黃。家園向來夢。靜數四年強。  
東甌詩集

### 寥德明

德明字子晦。南劍人。受業朱子之門。登乾道進士。歷官吏部左選郎。官奉祠。有槎溪集。

### 鬱林郡城

荒烟漠漠雙江上。往事悠悠野戍孤。春到偏臨青草渡。夢中猶記白鷗湖。  
粵西詩載

### 石孝友



孝友、字次仲、南昌人。乾道進士。以詞名。有金谷遺音。

釣臺

桐江波上一羊裘。釣得聲名隘九州。天子曷嘗遺故舊。先生不肯事王侯。釣臺集

張貴謨

貴謨、字子智、遂昌人。乾道中進士。光宗朝。除吏部郎中使金。轉朝散大夫。嘉泰中。直敷文閣。知靜江府。

題睢陽五老圖

駟馬鮮能容白髮。萬釘終不潤黃壚。烏韉席帽紅塵裏。幻出睢陽五老圖。鐵網珊瑚

王炎

炎、字晦叔、婺源人。乾道進士。始令臨湘。慶元中。官著作佐郎。出守湖州。有雙溪集。

題徐參議所藏唐人浴兒圖

右相嘗慚呼畫師。技癢仍復拈毛錐。逼真誰作此贋本。亦有妙意生妍姿。中庭燕坐必主婦。綠雲高髻香羅衣。嫣然嬾妾左右侍。前浴能言丹鳳雛。娉婷及笄女公子。素腕擁項相攜扶。兩兩爲朋四髻鬣。乳盧隨逐爲諧嬉。掌中看珠二少艾。捧頤卻立鴉鬢奴。屏閒擁膝袖玉筍。疑是夢闌顰翠眉。側身背面按箏者。冰肌綽約不自持。牀前跪起各姝麗。爲兒理髮投淚淚。有犬爛斑受摩撫。與人習熟無猜疑。梳妝淡薄服製古。如見永徽貞觀時。若非侯家及主第。人物無此美且都。荆釵布襦小家子。生子不如山下麴。

題姜堯章舊遊詩卷

出郭栽花涉小園。歸調琴譜輯詩編。少年豪健今孳斂。休羨騎鯨李謫仙。以上雙溪集。

林 淳

淳、三山人。乾道八年。以嘉議郎爲涇縣令。修復古塘。民多稱之。

琴溪

湛湛長溪水。飛橋遠近通。客喧墟市合。仙去釣臺空。欲辨磨崖字。忽聞遵渚鴻。僧無贊公趣。誰與論崖中。

寧國府志。

滕 珂

珂、南郡人。宣城縣丞。

謁梅都官墓

百年詩老臥空山。猶憶當時語帶酸。贏得兒童喚夫子。可憐名位祗都官。手編新史唐文備。骨立殘碑漢籀漫。落日牛羊上丘隴。草埋翁仲獨峩冠。宛陵集附。

李 石

石、字知幾。資陽人。乾道中。以薦任太學博士。出爲成都倅。有方舟集。

文獻通考。李石紹興末爲學官。乾道中爲郎。歷廳節。以論罷。趙丞相雄。其鄉人也。素不善石。石是以晚益困。其自序云。宋魁魯翁。今猶古也。

瞿唐峽

我行江南上峽來。繫舟夜泊雲雨臺。行到西川一萬里。杜鵑聲急桃花開。

到夔門呈王待制

手挈東風上水關。鳳書迎日看新班。五湖家世烏衣巷。三峽樓臺赤甲山。畫戟門開春晝永。臥龍帳穩海波閑。安危大計須公等。天定應知卽賜環。以上全蜀藝文志。

禮殿 漢人祀周公爲先師故鍾會記云周公禮殿范蜀公鎮云屋制甚古非近世所爲秦漢以來有也內翰王素云其屋制絕異

今制後之葺者惜其古不敢改作。

蜀侯作頻錦水湄。先聖先師同此室。巍然夫子據此座。殿以周公名自昔。聖人兩兩如一家。均是周人先後出。東家想見中夜夢。猶與古孫同袞烏。斯文授受乃關天。不爲漢唐加損益。我時來視俎豆事。重是漢人斤斧迹。漢宮制度九天上。散落人間此其一。多因豐屋起戎心。獨此數椽綿歲歷。規摹巖嶮東魯似。氣象縹緲西岷敵。竹松猶是斯干詩。風雨方知隆棟吉。雖然漢獻來至今。閱時已多駒過隙。中間豈無烏鼠慮。妙斲不知難輒易。工師不揆亂如麻。敢向殿門言匠石。詩書譬彼尙闕文。後學如何補遺逸。祖龍非意竊登牀。科斗有心求壞壁。舊章僅在命如絲。誰勒吾詩勝丹浹。成都文類。

句

留船買魚作寒節。元遺山詩注。

錢 筭

竿、字仲韶、端禮姪、乾道門直祕閣、出守處州。

少微閣

在處州治後、郡守關景暉建、米芾書額。

少微閣應少微星、點點雲閒分外明、過雨曉來添練水、好山晴後見蓮城、昔年人物不常有、近世英豪多閒生、願我把麾慚坐隱、落霞孤鶩看題名。括蒼彙紀。

林憲

憲字景思、吳興人、乾道中特科、監南嶽廟、參政、賀子忱愛其才、以孫女妻之、因寓居天台、賀亡、挈其孥居城西之蕭寺、有雪巢小集。

梅磻詩話、鄉人雪巢林憲景思、紹淳中前輩、後居天台、少從侍郎徐敦立度游、度得句法子魏昌世衍、實後山陳公嫡派也、梁溪尤公延之序其詩、言景思喜嘍初不鍛鍊、而落筆立就、渾然天成、無一語蹈襲、唐人之精于詩者、不是過、楊公廷秀亦云、景思之詩似唐人、尤楊二公少所許可、其論景思詩、如出一口、非溢美也、近世三衢鄭景龍編宋百家詩續選、摘出羣花飛盡、楊花飛盡、無可飛、天空霜無影等句、謂其超出詩人準繩之外、亦非虛語。

文獻通考、陳氏曰、景思人高尚、詩清澹、五言四韻、古句尤佳、殆逼陶謝。

讀陶詩作

吾觀淵明詩、不在言賦、有如泰和氣、周行不停駐、時與春爲風、融和物華布、未嘗見用力、萬物榮處處。

時與秋爲月。浩然無點注。江山滋清絕。宇宙靡纖汚。乃知淵明詩。本不在詩故。邂逅吐所有。氣象隨所寓。乞食不爲拙。華軒不爲慕。歸來不爲高。折腰不爲沮。羲皇平步超。無懷真雅素。簡談豈能盡。學者謾馳步。獨有無弦琴。明明一斑露。劉後村詩話

梅花

野梅空山中。正爲照人開。如何綠窗底。珠瑛帶蒼苔。頗似古君子。無人自不諧。竹徑酒初醒。一信清香來。全芳備祖

寓天台水南

春雨暗前山。春雲行遠林。月落雞犬靜。誰聞梁父吟。巍巍兮高山。泠泠兮好音。誰聞梁父吟。唯恐山不深。  
台州兜率寺

春江潑天明。蕭寺踞山塢。荒塔下鳥雀。古木颯風雨。徐行石苔花。徙倚望江渚。日暮山更寒。簷頭鈴自語。寺門矚南江。江勢浩相嚮。風雲互吞吐。山色豁林莽。潮頭捲飛烟。白雨挾春漲。中夜鵝鶩喧。誰家海船上。以上赤城詩集

句

柔櫓晚潮上。寒燈深樹中。汲水延晚花。推窗數新竹。天空霜無影。誠齋詩話

王從

從、字正夫、文正公五世孫。乾道中。添差台州倅。知信州。有三近齋餘錄。

次韻張彥晉秋日

地迴高樓目，天寒故國心。江鷗無萬里，雲木自千尋。門掩斜陽下，人歸落葉深。風前悵何許，入耳越鄉吟。  
前賢小集拾遺。

句

涼風回遠笛，暝色帶歸舟。塵心依水淨，歸鬢與山青。一番風雨催寒食，千里鶯花想故園。身閑更得馮陵酒，花早殊非愛惜春。  
以上誠齋詩話。

王素

素、乾道中、漢中郡守。

重修山河堰

畫隼精明破曉暎，恰逢寒食過江村。輕烟飛絮漢中道，白葦黃茅渭上屯。人力萬工支水派，天心兩邑溉川原。柳營一飽源頭看，夜雨新肥拍岸痕。  
陝西通志。

滕廡

廡、乾道閒人。

桂林西湖再開，呈張經略維。

隱然重望壓邊城，號令風行玉帳兵。詩思江山真得助，威聲草木盡知名。要令萬頃窺黃憲，不把千畦付麴生。坐使勝遊還舊觀，追隨那得勝公榮。  
桂勝。

梁 竦

題陸賈大夫廟

劉郎辛苦逐秦鹿。尙欲長鞭及馬腹。蠻夷大長夢不驚。海邊椎髻乘黃屋。江淮貔貅始閑暇。忍使驅令渡篔簹。陸生手持尺二組。喚起老子同分肉。詩書尙曉罵儒翁。豈憂傑驚難拘束。築壇再拜受王印。雄辨冷泠聽不足。當時未有北人輔。留寓年深染汙俗。乍聞高論耳目清。如掩笙簧奏冰玉。境中勝處應更履。更泝餘皇到山麓。大夫何獨粵人重。漢廷公卿俱竦服。陳平奇計須深念。張子全身甘辟穀。此外侯王希識字。帶礪功存半誅戮。惟君坐使將相歡。燕喜優游劉氏福。年少終軍學高步。空有英稱命難續。乃知智者應世閒。妙似庖丁奏刀熟。往事浮雲變滅盡。越水悠悠浸山綠。荒祠寂寞傍僧居。日暮飢鴉噪喬木。我來三歎重遲留。爲酌寒泉薦秋菊。

夷堅志。乾道間。梁竦入都。橫舟廟下。夜夢一客自稱陸大夫。云我抑鬱于此千餘歲矣。君幸見過。願留一詩。遂題詩于壁而去。

單 夔

夔、錢塘人。乾道中。以奉議郎知湖州。官至侍從。

次楊咸亭江郊亭新成二十三韻

瞿塘一門江水傾。羣趨激射隨奔鯨。舟車冠蓋湊蜀道。孰問張丈連殷兄。相逢來往問地主。太守詎敢忘將迎。白崖候館久茅蕝。近卽野處披榛荆。屏修啓別作廬舍。夙戒里旅遲留行。有如授館及郊勞。舉國定

制誰先鳴。錢唐鄙人何所似。抵掌自視鴻毛輕。食焉抑畏墮偷懦。汎觀彼已同虛盈。山蹊水澗肆登賞。靡  
嗜傑閣誇崢嶸。朋從簪盍得衆雋。塵譚冰釋欣初晴。鼎新質我築斯館。棟宇不貴朱連薨。入門便足庇風  
雨。揭榜卻借江郊名。時哉蓮幕有嘉客。落筆能令風雨驚。聯篇累牘溢我目。粲在麗藻舒我情。人生悟合  
良快意。胡爲四美嗟難并。日光天際發豐蔀。此去可並依離明。直排閭闔出灑灑。肅肅東首歌青征。循崖  
履坦負無阻。爲君留取能詩聲。此榜與詩儻不朽。此館想同江水清。我來歲月媿銷縮。整纓輯履圖歸程。  
遺名肯復計身後。謹慮第虞槃水擎。始終感慨遇僚友。遂事且喜相須成。勉旃功業早期就。發軔自是天  
衢亨。四川總志。

鄭鑑

鑑字自明。連江人。淳熙元年太學釋褐。授國子學正。召試除校書郎。累遷太子侍講。終宣教郎。知  
台州。

香爐山在連江縣。

峙立交輝紫翠閒。疎簾半卷鎮長閑。神仙似有祈年術。一縷青煙起博山。淳熙三山志。

詹駢

駢會稽人。淳熙二年進士第一。

遊雲門

輕裘肥馬春三月。到此經遊花正紅。欲覓上方幽隱處。老僧笑指白雲中。雲門志略。



陳孔碩

孔碩字膚仲號北山侯官人淳熙初進士紹熙中邵武宰終祕閣修撰知惠州有北山集

絕句

臘雪逢春次第消等閑著脚上溪橋柳條畢竟如兒女一夜東風眼便嬌全芳備祖

寄題劉潛夫于菴于齋

聞昔子元子愛歌于菴于遺風今有繼此意古爲徒犢價踰刀劍原飴變菹茶聞弦知豈弟聯袂此懽呼近事先苞篚何人問牧芻聚星亭澗好容我受塵無

後村詩話余曩宰建安扁便齋

曰于菴于北山陳公寄詩云云

林夢英

夢英字伯虎閩清人徙撫州游陸象山之門登淳熙二年進士歷祕書丞學者稱山房先生

金石臺

雲作巖扉風自關清陰半壑樹中間傍廂更著茅亭好放入西南一面山江西通志

碧澗書堂

臨川遇鄒君示我銅陵辨相邀游其閒百聞須一踐自從雙耳聾已辦兩足繭武夷乃招隱仙都輒策蹇遙睇麻源村夢思勞輾轉今披碧澗記華岡訂訛舛疑信吁莫論是非爭之編但欣泉石奇堂成書可輦

晁侯雲夢胸，妙處參墳典。家有萬竹坡，琳琅闕營翦。徘徊康樂舊，此興尤不淺。人生貴自得，假物非至善。山川侈遭逢，所託各偕顯。嚴光釣越灘，叔子登楚峴。氣象不低摧，吾徒志當勉。相思邀未到，烟霞自舒卷。唯應原上月，共照人孤狷。撫州府志

### 孫應時

應時字季和，自號燭湖居士。餘姚人。從學朱子之門。淳熙乙未第進士。知常熟縣。移判邵武軍。未上而卒。有集。

### 嚴子陵

簿書流汗走君房，那得狂奴故意降。努力諸公了臺閣，不煩魚雁到桐江。困學紀聞

### 歸舟晚泊

日落風更起，江頭船不行。淒涼大夫宅，蕭瑟故王城。一醉重樓晚，千秋萬古情。愁邊寒角動，夜久意難平。

### 益昌僧寺靜境軒

落照久未夕，斷雲低不飛。孤舟上水急，歸鳥度山微。蕭颯天涯鬢，淋浪醉後衣。憑闌一笑去，客夢轉頭非。

### 武擔山

小飲不成醉，清談多所欣。秋聲搖落日，野色盪寒雲。心事長千里，腰圍更幾分。西風叢桂發，倚檻得相聞。

### 武擔西臺

西臺在何許，秋草暮雲閒。十畝有餘竹，一窗無數山。望遠足離思，憂時多苦顏。相看終惜醉，更挈酒餅還。

新灘見桃杏書事

今晨明客眼。桃杏照江紅。鳥哢蒼山曲。人聲翠竹中。獨遊空遠思。一笑負春風。便想荊州道。簪花醉渚宮。

陳仲弓

清濁無心陳仲弓。圓機聊救漢諸公。末流不料兒孫誤。千古黃初佐命功。以上吳禮部詩話。

登仙木

在四明山。漢劉綱妻樊夫人登此木上昇。

劉樊蟬蛻此登仙。老木當年已插天。玉骨半枯猶秀潤。蒼皮新長更榮鮮。蟠桃待熟三千歲。銅狄重磨五百年。化鶴未歸山寂寂。徘徊誰與問因緣。姚江逸詩。

呂定

定字仲安。新昌人。歷殿前都指麾。龍虎上將軍。有說劍集。

登彭城樓

項王臺上白雲秋。亞父墳前草樹稠。山色不隨人事改。水聲長近戍城流。空餘夜月龍神廟。無復春風燕子樓。楚漢興亡俱土壤。不須懷古重夷猶。

登越王臺

海上荒臺草樹平。登臨不盡古人情。白雲萬里懷親舍。紅日中天望帝京。百粵山川秋歷落。三城樓閣晚嶢嶢。醉來徙倚闌干曲。聽徹西風畫角聲。以上四朝詩。

項安世

安世字平父括蒼人徙家江陵淳熙二年進士除祕書正字遷校書郎寧宗朝以僞學黨罷開禧中以直龍圖閣爲湖廣轉運判官有平庵悔稿

永州

日日長沙岸。看雲祗念家。如何永州夢。偏愛在長沙。

欸乃曲

靄迺出深樹。湘山日落時。若非堯女哭。卽是楚臣啼。

次韻羅郢州送別

江上相留不肯留。渡江沿岸卻回頭。漢江東去人西去。不見高城始是愁。

櫺州路口小雨

三十年前過此時。一雙青髻縮青絲。如今舊雨猶相記。祗傍星星白處吹。

春日隄上

高高下下十五里。白白紅紅千樹花。總在疎籬斷垣裏。背隄臨水小人家。

吹帽臺

千山搖落萬林空。數點黃花酒盞中。半破接羅誰耐管。已將身世付西風。

拋毬

綵毬丹柱倚春風。寒食清明罷繡工。漠北將軍貪蹋鞠。豈知兵法在吳宮。

糟蟹和潘德父

大戴笑汝無穴空雙螯。小戴笑汝有筐如子臯。太元笑汝長郭索。入穴慚螿升慚獐。知心但有畢吏部。臥起與汝同酒糟。後來愛者蘇長公。亦祇許汝中山醪。固知合向一丘老。安得上與三辰翱。長公貌喜心未敬。雖羨微生尤惡饕。我疑吳儂修稻。怨和稭醢汝償民膏。雖然因此得長醉。痛貶未必非深褒。又疑畢叟妒劉掾。曾以螟蛉輕二豪。故回左手就箕踞。持蟹藉糟成兩高。以上後村詩話。

釣臺

辣關山頭破草亭。祇須此地了生平。崎嶇狹世纔伸足。又被劉郎賣作名。

君房足下竟成諛。祇是韓歆已破除。豈有江湖釣竿手。與君臺閣奉文書。方輿勝覽。

雨夜

夜窗疎雨不堪聽。獨坐寒齋萬感生。今夜故人江上宿。如何禁得打篷聲。後村千家詩。

羅點

點字春伯。撫州崇仁人。淳熙二年進士。光宗朝累遷試兵部尚書。寧宗朝拜端明殿學士。簽書樞密院事。卒贈太保。諡文恭。鶚按宋史作淳熙三年誤。今訂正。

巴山喜雨

在崇仁縣南。漢豫章守樂巴隱此。唐改臨川山。

淑元不冠椎兩鬢。縈青縮綠如堆鴉。鬢髮遠望毛髮古。日日惟聞餐暮霞。吾家公遠更清絕。帶眼不穿衣不結。好風吹袂任飄飄。夜夜惟聞弄明月。餐霞弄月固不惡。不道農田布龜灼。令君盛服道民苦。偃然袒

楊猶不作，敬持此意款浮丘。浮丘乃與合同憂，急呼風馬駕雲車。二仙方覺裸裎羞，旋加冠巾更束帶。一見浮丘望塵拜，便將凶歲變豐年。談笑之間作霽霈，油然雖出南北峯。開端實自浮丘翁，浮丘詩家老仙伯。故知愛國願年豐，邦人一飽誰所賜。父應詔子兄詔弟，若還此雨後五日，將見索汝枯魚肆。撫州府志

陳造

造字唐卿，高郵人。淳熙二年進士，調繁昌尉，尋宰定海，倅房陵。至淮浙安撫使參議，晚號江湖長翁。有集。

百花樓

樓中香飄百和濃，樓上錦纈翻東風。玉樽美酒清若空，吳姬妝面相映紅。人生一笑不易得，是閒一醉千金直。元龍百尺君勿論，芳時且可金杯側。

都梁

淮汴朝宗地，孤埤砥眼前。譙樓西日淡，戍鼓北風傳。破竹非無計，澆瓜亦自賢。客愁渾幾許，撫劍倚吳天。關塞淒涼處，青徐指顧邊。如何漢正朔，不盡禹山川。將略輕三捷，天威重萬全。諸公不愒日，老子判留年。

題趙秀才壁

日日危亭凭曲欄，幾層蒼翠擁烟鬟。連朝策馬衝雲去，盡是亭中望處山。

泛湖

荷面跳珠小濺衣，酒邊團扇已停揮。溼雲收盡人閒暑，卻度西山載雨歸。以上江湖長翁集。

任希夷

希夷字伯起號斯庵伯雨四世孫家邵武淳熙二年進士寧宗朝累遷禮部尚書兼給事中進端明殿學士遷簽書樞密院兼參知政事提舉洞霄宮卒贈少師諡宣獻鴨按宋史作淳熙三年誤今訂正

郊壇齋宮

帝籍傍連繭館桑禁林喬木晝陰涼卻從射殿臨江閣中有通衢夾苑牆

後省紫薇花

清曉開軒俯鳳池小山經雨石增輝琉璃葉底珊瑚榦立出池邊是紫薇

檢院卽事

禁路風清飛早鴉官卑難望紫宸衙了無公事鉤簾坐一本冬青落細花

左司史侍班

虎旅分行鐵作過殿前拜舞一聲譁輔臣對罷無公事日照金鋪扇影斜

德壽宮卽事

金爵觚棱曉色開三朝喜氣一時回聖人先御紅鸞扇天子龍輿萬騎來  
霜曉君王出問安寶香傳筆護朝寒五雲深處三宮宴九奏聲中二聖歡  
宴歸還駕七香車一夕天開六出花瑞色先凝紫宸殿春光重到玉皇家  
萬年觴舉慶重華百辟霽雲始拜嘉壽宴開時先雪宴天花舞罷帶宮花

宗祀慶成

合宮三歲縟儀收。太室先期肇自周。玉瓚黃流躬裸鬯。大圭元冕薦嘉羞。靈臺舉舉三千禮。鑾路安行十二旒。導從卻歸齋殿去。詰朝牡璧對天休。

紫宸朝罷御端門。天宇澄清景氣溫。丹鳳樓中黃繖立。金雞竿上綵旗翻。萬人聳聽風雷號。四海均霑雨露恩。須信卑宮勤肆禮。君王雅意在元元。

宴玉津園江樓

風靜潮痕滅。江空夕照多。星星波上艇。隱隱岸邊莎。風光連北闕。景物傍西湖。禁籞濤江上。茲樓天下無。虛齋留御榻。小徑近層崖。再拜觀奎畫。渾疑侍玉階。參天宮柏翠。布地禁花紅。臺沼如文囿。規摹有汴風。以上咸淳臨安志。

海棠

紅妝翠袖一番新。又向園林作好春。卻笑華清誇睡足。至今羅幃久無塵。後村千家詩。

題陳亞之集後

如彼流泉必有源。陳家詩律自專門。后山得法因鹽鐵。不減唐時杜審言。陳副使集。

劉、褒

褒字伯寵。崇安人。淳熙五年進士。除司門郎中。官至朝請郎。知西全州。自號梅山老人。有梅山詩。



集

題小漿

去日春蠶吐素絲。歸時秋菊剝金衣。沙鷗不入鴛鴻侶。依舊滄浪遶釣磯。

詩人玉曆。伯龍武夷文士。嘗官于朝。以臺評而歸。有句云。怨而不怒之辭也。

葉適

適字正則。號水心居士。永嘉人。淳熙五年進士。寧宗朝。歷權吏部侍郎。寶文閣待制。知建康府。沿江制置使兼制江淮。終寶文閣學士。卒諡忠定。有水心集。

吳子良林下偶談。水心詩早已精嚴。晚尤高遠。如驛梅吹凍蘂。枯雨送春聲。綠園齊長柳。紅糝半含桃。聽雞催謁駕。立馬待紬。書野影晨迷樹。天文夜照城。曠書天象切。浴硯海光翻。地深湘渚浪。天遠桂陽城。置杜集中何以辨。乃若遺臘冰千筋。句春柳一絲。癡迷王弼宅。蒿長孟郊墳。門邀百客醉。囊諱一錢存。又特其細者。

趙振文在城北廂兩月。無日不游馬塍。作歌美之。請知振文者同賦。

馬塍東西花百里。錦雲繡霧參差起。長安大車喧廣陌。問以馬塍云未識。醪醑縛籬金沙牆。薜荔樓閣山茶房。高花何啻千金直。著價不到宜深藏。青鞵翩翩烏鶴袖。嚴勞引前金蔣後。隨園摘菜煎凍酥。小分移

牀獻春酒。陳通苗傅。昔弄兵。此地寂寞。狐狸行。聖人有道。賁草木。我輩栽花。樂太平。知君已于菖水住。盡日櫓聲搖上渚。無際滄波。蓼自分。有情碧落。鷗偏聚。追逐風光。天漫許。拋擲身世。人應怒。君不見南宮載寶回。何如趙子穿花去。

贈杜幼高

杜子五兄弟。詞林俱上頭。規模古樂府。接續後春秋。奇崛令誰賞。羈棲浪自愁。故園如鏡水。日日抱村流。

送潘德久

每攜瘦竹身長隱。忽引文藤令頗嚴。聞道將軍如卻縠。不妨幕府有陶潛。江當闊處水新漲。春到極頭花倍添。未有羽書吟自好。全提白下入詩奩。

永嘉橘枝詞

蜜滿房中金。作皮人家短。日挂疎籬。判霜翦露裝。船去不唱楊枝唱。橘枝。以上水心集。

前日入寺觀牡丹。不覺已謝。惜其穠豔。故以詩悼之。

牡丹乘春芳。風雨苦相妒。朝來小庭中。零落已無數。魂銷梓澤園。腸斷馬嵬路。盡日向欄干。躊躇不能去。

珊瑚網

趙振文

和葉水心馬塍歌

昔年家住長安里。春風盡日香塵起。紛紛車馬過綺陌。買花人多少人識。王侯第宅連苑牆。粲若瓊葉敷

丹房花窠近取馬塍本。曲闌高檻深密藏。主歡對客小舉袖。擊鼓吹簫滿前後。眞珠一斛聘國姝。琥珀千杯酌天酒。幾年農器不鑄兵。雨耕雲穫歌且行。種花土腴無水旱。園稅十倍田租平。拏音來近菰蒲住。演漾迴溪通枉渚。霜晴沙淺橘林明。日暮水渾魚網聚。東門故侯應自許。霸陵醉尉寧須怒。何當學稼隨老農。荷鋤驅犢田中去。咸淳臨安志。

白巽

東屯行

雨足稻畦春水滿。插秧未半青短短。馬塵追逐下關頭。北望東屯轉山坂。一川洗盡峽中想。遠浦疎林分氣象。溝塍漫漫堰源低。灘瀨泠泠石磯響。中田築場亦有慮。輦飛夏屋何渠渠。李氏之子今地主。少陵祠堂疑故居。

名勝志。陸務觀高齋記云。少陵居夔。三徙居皆名高齋。其詩次水門者。白帝城之高齋也。依藥餌者。瀘西之高齋也。見一川者。東屯之高齋也。東屯李氏居已數世。上距少陵。纔三易主。大歷初。故券猶在白巽。東屯行云云。

# 宋詩紀事卷五十五

錢唐 厲鶚 緝  
滿洲 舒瞻 勘定

郭晞宗

晞宗字宗之仙居人淳熙五年進士仕終瓊管安撫有漫齋稿

白紵詞

遙夜迢迢夜未央井梧月白啼寒蛩感時念往誰不傷婕妤寵絕辭昭陽手中團扇篋中藏吳姬織紵秋蟬翼一絲往復千情積金粟尺量金斗熨爲君裁袍爲君惜同盛同衰莫相失

姑蘇臺

春花開秋雁來長風幾度姑蘇臺不見臺上人臺下月徘徊一樹梧桐生綠苔以上赤城詩集

楊濟

濟字濟道淳熙五年進士歷著作郎出知果州有鈍齋集

文獻通考陳氏曰京鐘帥蜀上巳出遊濟爲樂語云三月三日豈無水邊麗人一鴈一詠亦  
有山陰禊事又云良辰美景賞心樂事四者難并崇山峻嶺脩竹茂林羣賢畢至一時傳誦

雲安龍脊灘

洞庭老龍時出沒。萬斛舟航皆辟易。此龍脊背已鐵石。肯逐時好作人日。我呼邦人來踏磧。恍然如見河圖出。大巫雞卜占云吉。小巫竹枝歌轉激。飄石揚沙障江色。塵埃何處不相襲。摩挲石刻聊偃息。恐有老人來橫笛。四朝詩。

章良能

良能字達之。麗水人。居吳興。淳熙五年進士。除著作佐郎。寧宗朝。官至參知政事。弁陽周公謹之外大父也。有嘉林集。

題玲瓏山

在吳興

短鉅長鑊出萬峯。鑿開混沌作玲瓏。市朝可是無巖嶮。更向山林巧用工。癸辛雜識。

題李伯時飛騎習射圖

禁營貔虎天廡龍。技癢不柰芻粟豐。聞道寶津嘗護駕。前期踴躍矜驍雄。紅綃低繫柳枝碧。滿滿彎弓斫鬣射。偶然穿葉未爲奇。截下紅綃方破的。綵繩長曳綵毬輕。閃爍眩轉如奔星。弦頭霹靂起馬脚。回看一箭落樞槍。烏紗帽穩春衫薄。文韉煥爛青絲絡。千步場深隔九關。畢景馳驅有餘樂。李侯應奉隨春官。日晏歸穿衛士班。平生抵死憐神駿。絕藝那能不細看。不學閭公伏池側。倉皇丹粉供宣索。他年乘興試追尋。妙處祇須憑子墨。十六蹄翻意態真。罄控應節顧眄親。當時騎士盡應爾。尙想元豐兵制新。慨今多事困供億。養兵殆且殫民力。未聞士歌馬騰槽。安得從容觀戲劇。

吳禮部詩話。李伯時畫飛騎習射圖。其手帖云。公麟元豐初。點檢南宮試卷。華陪預集英殿門。應奉廷試。因得至衛士班。見飛騎習射。控毬楊枝戲。人偉馬駿。妙天下選。時乘輿幸寶津。有日督課勝負。窮景不休。故頗遂縱觀。今追圖大概。以奉雌堂清玩。若氣勢不至差俗。則丹青可屏。當蒙照恕也。元祐丁卯臘日謹題。又云。第一斫鑿射。最難引弓。然多中。中者自帛而下。平斫斷之。射毬鮮中以飛毬。故十發三四中。爲精矣。尤延之楊廷秀樓大防皆有題詩。朱文公跋云。觀龍眠飛騎圖。及讀延之廷秀大防三君子佳句。因思法雲秀公語。尤物移人。甚可畏也。後又有古體詩二首。其一云。奉題太丞丈龍眠騎射圖。下有叔簡字。不著姓。其一題嘉定庚午四月二十日。章良能考績通鑑長編。紹熙元年庚戌秋八月。校書郎王叔簡。興禮部郎李獻。著作郎鄧。同檢視劉季榮所造。新歷叔簡必王叔簡也。

### 王叔簡

叔簡字敬文。渠江人。淳熙五年進士。紹熙中。官校書郎。

#### 題李伯時飛騎習射圖

飛毬飲羽柳如戣。馬氣橫生人更傑。不作遊觀御寶津。騎戰還應一當百。天家行樂少人知。龍眠屬從天。上歸。意象慘淡研精微。曹霸以來無此奇。壯夫披圖雙淚垂。時危那得生致之。吳禮部詩話。

### 曾躍麟

躍麟字子龍。南恩州人。淳熙五年進士。官監察御史。

聞西浦漁歌作

西浦鳴榔下釣磯。歌聲欸乃送斜暉。扣舷互答驚鷗夢。拍手歡呼看鷺飛。山接素琴仙子過。洲連青草使君歸。海天空闊家長在。一任蘆花雪點衣。廣東通志

甘同叔

同叔字異豐城人淳熙五年進士官桂州民曹攝荔浦縣有節軒集

題昌山聖姥廟

分宜古縣環清溪。重岡複嶺如奔馳。行逢山斷水流處。閱城廟枕山之西。我來落日在前嶺。摩挲一讀盧肇碑。嗟唐今去亦已久。尙餘文字光陸離。云昔秦人有天下。鏖戰六國愚黔黎。碭山雲氣望不見。神物乃降江之嫠。雷轟電合助光怪。蜿蜒墮地偕羣兒。赤鱗王鮪奉鼎俎。追逐甘旨憐姥慈。姥先仙去環佩冷。安能蟠紮從兒嬉。劉累不出浮俗隘。況肯委質羸與斯。珠宮貝闕世所希。銅鑲十二白玉扉。緱蘭作佩香披披。招搖手掉芙蓉旗。哀彈清瑟和宓妃。大川擊鼓勞馮夷。巨魚踴躍龜鼈隨。蝦蟹瑣細不得追。廟門開闔風颼颼。千年萬載龍居之。野巫便伺薦酒卮。簫鼓坎坎來宮祠。五彩不辨虺與螭。聊以幻化驚羣迷。嗟我四海久望霓。無復空抱明月輝。好施膏澤雨六合。豈止但慰袁人思。歷階酌水致此辭。近以遺誼傳于詩。才慳語顛論甚卑。龍兮謹勿相訶譏。袁州府志

張釜

釜字君量。綱之孫。淳熙五年進士。累遷端明殿學士。簽書樞密院事。

送鶴還齊雲

胎仙誰遣到塵寰。盡日清吟伴我閑。不作沖天支遁想。頗疑攜箭佐卿還。欲追鸞駕煙霞上。肯處雞羣伯仲閒。爲語齊雲好看取。他年我欲訪緱山。茅山志。

閻蒼舒

蒼舒字才元。淳熙中以試吏部尚書。使金賀正旦。見金史交聘表。

皇宋書錄。蒼舒工正書。雄健而有楷則。尤工。

扁榜。今陳相堯佐家將相堂大字。乃其所書。

贈揚州郡帥郭侯

東南形勝惟揚州。介江負淮作襟喉。有國以來幾百戰。弔古千載空悠悠。哀哉荒王與蕩子。鈍盡鐵劍崇倡優。迷樓九曲爛如畫。珠簾十里半上鉤。當年二十四橋月。曾照三十六宮秋。平山堂上一長歎。但有衰草埋荒丘。歐仙蘇仙不可喚。江南江北無風流。何人復誦廣陵散。黯然悲恨不可收。祇今英主正用武。增五萬竈屯貔貅。金城堅築壯營壘。綺段細錯良田疇。神謨廟算萬全舉。天時既至須人謀。將軍山西名將種。家聲直到青海頭。男兒有死必報國。正當爲上分此憂。勉旃速辦古人事。貂蟬本自出兜鍪。揚州府志。

席天祐

天祐樂平人。精醫。嘗從劉武忠軍。采用兵之勢寓于碁。遂成絕藝。

淳熙六年冬醉臥僧房作



霜侵古屋月侵窗。撥盡寒灰夜未央。仗劍起看吳楚分。將星今見幾分光。

夷堅志

程端蒙

端蒙字正思，德興人。朱子門人。淳熙七年鄉貢，補太學生。對策不合，罷歸。

絕句

滿城塵土汚人甚。出郭青山入眼多。拏取小舟烟霧裏。此生真箇老漁蓑。

饒州府志

黃山

由字子由，長洲人。淳熙八年進士第一。寧宗時仕至刑部尚書兼直學士院。自號盤隱居士。

歸來

歸來三閱月。無事一關心。刈草尋花徑。開池漾竹陰。江邊問明月。天際數歸禽。幸有高賓至。相逢似竹林。

吳江縣志

莫若拙

若拙，仁和人。寓家崇德。淳熙八年進士。

題資福院平綠軒

結屋地猶淺。鉤簾景盡還。嵐光烟樹外。野色酒杯閒。別墅從渠樂。清吟屬我閑。狎鷗時點白。機事不相關。

至元嘉禾志

吳柔勝

柔勝字勝之宣州人淳熙八年進士屢遷司農寺丞出知隨州除祕閣修撰主管亳州明道官卒諡正肅

春畫

深巷寂無人鳥聲花塢春華門長日掩天地一閑身宛雅

李廷忠

廷忠號橘山於潛人淳熙八年進士

游大滌

清溪路入武陵源雞犬人家隔近村拔地一峯危作柱棲雲五洞窄開門空庭有客掃松影古徑無人踏  
蘇痕我欲白雲巖畔宿月明一夜聽啼猿洞霄詩集

陳銘

銘字日新玉山人淳熙八年進士

春波漁市

瀕溪有居廬兩岸舟競檣風含水氣腥曉作漁人市魚羹何處無無錢買金鯉嘉興府志

于革

革字去非號竹田豐城人淳熙八年進士知房州

春晚

舍南舍北草萋萋。原上行人路欲迷。已是春寒仍禁火。棟花風急子規啼。詩人玉屑。

詠箋

七八葉蘆秋水裏。兩三箇雁夕陽邊。筆頭到處渾無礙。掃破寒潭一簇烟。後村千家詩。

清都觀

高崖雨洗月華清。白袷青藤曳復行。老檜不知仙馭遠。屋頭猶帶玉簫聲。南昌府志。

俞烈

烈字若晦。臨安人。淳熙八年進士。累除中書舍人。嘉定初。知鎮江府。權吏部侍郎。有盤隱詩編。

題清虛堂在臨安淨梵院

天清蠶麥餘。綠結桃李實。老僧詩銜袖。過我語言質。懷山意先行。如病夢芝朮。去山才一舍。鞭策不終日。堂簷新結束。空洞無長物。風來舞翠杉。土煖榮病橘。欲行意先清。舌評驥不及。何由解鞍臥。夜枕雨蕭瑟。談元契參同。酒旨妙真一。懷新辜雅趣。意嬾口健筆。亦如罷參僧。野禪縛枯律。咸淳臨安志。

孫元卿

元卿。樂清人。淳熙八年進士。仕至國子監丞。

與錢孝先游洞霄

元冥相我作山行。捲卻重陰放曉晴。但見峯巒互扃鎖。不知宮闕隱崢嶸。雲根洞穴篝燈入。井底波瀾撫掌生。喚客入山還送客。淙琤猶有石泉聲。洞霄詩集。

傅誠

誠字至叔，仙游人。嘗從朱文公游。淳熙八年第進士，調永春尉。從侍郎黃艾參政使北，張巖開督府于京口，奏辟幕僚，著述皆出其手。遷太常博士，子彥卿能文，以疾卒。誠哭之過哀，輪對聞卒于殿下。

妙庭觀 在富陽縣董雙成故宅

會宴瑤池阿母家，九霞光繞翠瓊車。坐中一曲山香舞，帽上看看有落花。杭州府志。

朱師古

師古，蜀人。孝宗朝著作郎。

句

集英殿下初登第，神虎門前便挂冠。

建炎以來朝野雜記：淳熙辛丑，孝宗策士，有昌元王昂應祥者，既賜第，調潼川府司戶參軍，自言年踰六十，不願出仕。上嘉之，特賜承務郎致仕。蜀人在朝者，皆以詩送之，著作郎朱師古一聯最爲的切。

句昌泰

昌泰，蜀人。淳熙中浙東提刑。

題新繁句氏盤溪

客至輒命酌。爲言花已開。青山長委髻。白骨舊生苔。不飲固癡絕。能詩宜數來。頗憂明日雨。紅紫落成堆。  
成都文類

馮仲柔

仲柔、山陰人。

淳熙壬寅沿檄游大滌洞天。

洞府深沈別有天。鸞飛樓閣聳晴烟。詩傳玉局驚凡目。丹就金爐記昔年。翠湧千波橫絕壁。風吹萬籟入飛泉。他年待我功成後。卜室青山絕世緣。  
洞霄詩集

衛涇

涇字清叔。號後樂居士。崑山人。淳熙十一年進士第一。除祕書省正字。累官參知政事。寶慶二年卒。追封秦國公。諡文節。有後樂集。

游澱山湖

疎星殘月向朦朧。閒入烟波滿棹風。始覺舟移楊柳岸。直疑身到水晶宮。烏鴉天際墨千點。白鷺灘頭玉一叢。欸乃數聲回首處。西山渾在有無中。  
松江府志

徐得之

得之字思叔。夢莘弟。淳熙十一年進士。有靜安作具。徐氏世有史學。從子天麟。撰西漢會要。東漢會要。皆行于世。

試雙井茶

先生老作宜州鬼，誰與一甌同注湯。至今捧著雙井碗，猶帶是翁書傳香。方輿勝覽句

迺翁畫灰教兒書，嬌兒赤髻玉雪膚。厥妻曝日補破襦，弊筐何有金十奴。題晉樂圖 鶴林玉露

謝直

直，元名希孟，避寧宗諱，改名直，字古民，台州黃巖人。伋之孫。從陸象山遊。淳熙十一年進士。歷太社令。嘉興府通判。

龐元英談薺：謝希孟與鄉人陳伯益好相調戲。伯益面狹多髻，希孟見寫真掛壁上，題云：伯益之面，大無兩指，髭髻不仁，侵據乎其旁而巳。於是乎伯益之面，所餘無幾。伯益病之，莫能報。希孟後改名直。伯益於是以前兩句詠其名，炊餅擔頭挑取去，白衣鋪上喝將來聞者絕倒。

遣懷寄致道

貧者士之常，富亦我所欲。得常詎可厭，逐欲何由足。荒哉化蜨翁，微歟監河粟。人生命如綫，日須不盈匊。俯仰天地閒，何由謝羈束。前賢小集拾遺

俞應符

應符，字德瑞，錢塘人。淳熙十一年進士。累官參知政事。

曹公疑冢

生前欺天絕漢統，死後欺人設疑冢。人生用智死即休，何用餘機到丘壟。人言疑冢我不疑，我有一法君未知，直須掘盡疑冢七十二，必有一家藏君屍。七修類稿

俞應奎

秦皇石在昌化縣百丈山

祖龍盛氣役神鞭，壁立無移只屹然。定是先朝陳寶化，陰靈寂寂笑求仙。杭州府志

高似孫

似孫，字續古，餘姚人。文虎子。淳熙十一年進士。歷官校書郎，守處州。有疎寮小集。

文獻通考：陳直齋云：似孫少有俊聲，登甲科，不自愛重，爲館職，上韓侂胄生日詩九首，皆暗用錫字，爲清議所不齒。晚知處州，尤貪酷，其讀書以隱僻爲博，其作文以怪澀爲奇，至有甚可笑者。就中詩猶可觀也。

癸辛雜識：高疎寮守括日，有籍妓洪渠，慧黠過人。一日歌真珠簾詞，至病酒情懷猶困嬾，使之演其聲，若病酒而困嬾者，疎寮極稱賞之。適有客云：卿自用卿法，高因視洪云：吾亦愛吾渠，遂與落籍而去。以此得噴言者。

入餘杭縣

明發遵西陸，驅車月流光。佳山迎車來，知是古餘杭。危樹露如雨，平野日未陽。支流瀆清源，弱羽無高翔。人家叢灌下，世載山水鄉。扣門作午憩，白飯羞文魴。邂逅有足歡，離合非其常。主人不予鄙，予留亦徜徉。

憩呂化民家

晚程息勞轍。白日流西暉。水鳥得魚去。耘夫荷鋤歸。川原杳芊綿。林野雜依霏。一來叩竹館。相邀入荆扉。重巖吐清溜。澄陰布殘暉。曰子老此室。十世相因依。左右桑果足。歲日雞豚肥。豐猶未至裕。歉亦無能飢。予聞良自愜。欲謀北山薇。有田可同耕。有蠶當共衣。車夫猝無情。此志仍重違。

荅李才翁

素意杳難尋。殘燼屬晚陰。花知西洛事。雁叫北人心。客共艱難盡。詩隨老大深。金陵書不到。消息又沈沈。

荅宇文文學

無能應俗苦。皇皇詩不驚人筆。事荒天下無山如飯顆。人閒有水自滄浪。左杯右蟹一舟足。早韭晚菘三畝強。莫謂覺來無可嗜。逢人皆自覓花忙。

燕文貴山水圖

道山堂上御府畫。展卷猶能記老燕。十日何由辦水石。千金那可分江天。楚湘兩岸風落木。海嶽三秋雁度川。大山小山俱好隱。江南夢去曲肱眠。

荅武昌吳廣文

平生不識武昌樓。官柳青青好在不。庾亮笛吹黃鶴月。簡棲碑駁碧苔秋。山橫赤壁含情斷。水出瞿唐快意流。何處叫君同一醉。並舟秦女擘箏篴。

琵琶引

人生聚散難爲別。何況忽忽作胡越。梅梢帶雪下昭陽。明朝便隔關山月。長城不戰四夷平。臣妾一死鴻



毛輕回憑漢使報天子爲妾奏此琵琶聲。長安城中百萬戶家家競學琵琶譜。酸聲苦調少人知。食雪天山憶蘇武。西風吹霜雁飛飛。漢宮月照秋砧衣。嫋姚已死甲兵老。公主公主何時歸。

銅雀硯歌

曹公夜讎凌雲臺。一言契闊含餘哀。分香老妓各雲雨。歌舞不盡蕤蒿萊。漠漠頽基鄴山下。萬里烟塵無一瓦。井榦尊酒自平生。烏鵲飛南播遺雅。老農墾雨開荒寒。一礫千金苔未乾。世人好奇不好近。眞比周籛仍商盤。老璞渾渾殊質魯。得水猶能發妍嫵。更與人閒作瓌古。月明夜盜西陵土。

黃居中瀟湘圖歌

天嵬而雨斷兮。作蒼梧九疑之高秋。風行而川怒兮。洩瀟湘洞庭之奔流。樹不知名兮。山抱複嶺。沙不計程兮。水趨他洲。波作止兮。蛟舞蛟蟄。雲晦明兮。猿呼猿愁。原不可作兮。蘭亦塵土。賈傅歸漢兮。鵬其何尤。誰呼魚兮。北墅有酒。誰鼓柁兮。南津有舟。懷斯人兮。杳靄千里。目悵望兮。吾其歸休。

騎鸞引

夜騎白鶴出琳闕。千萬仙官鏘佩玦。雲雷帖妥過剛風。左推日丸右扶月。一息瑤池翠水家。阿母迎謁龍驅車。青娥彈絲玉妃酒。折盡蟠桃紅玉花。九天丈人來問道。太極之前天不老。丹霞一氣玉虛宮。寶笈金繩容探討。井君沐浴波五色。洞房光芒上奔日。天上傳呼六丁直。星斗離闌礙鸞翼。以上疎寮小集

由校書郎授徽倅道出金陵投留守吳雲壑

四朝渥遇暫微絲。多少恩榮世少知。長樂花深春侍宴。重華香暖夕論詩。黃金籛滿無心愛。古錦囊歸有

字奇一笑難陪珠履客。看臨古帖對梅枝。四朝聞見錄

絕句曰瑋按東臯雜錄作陳天錫

舍南舍北雪猶存。山外斜陽不到門。一夜冷香吹入夢。野梅千樹月明村。全芳備祖

### 延祥觀

水明一色抱神州。雨壓輕塵不敢浮。山北山南人喚酒。春前春後客憑樓。射熊館暗花扶屐。下鵝池深柳拂舟。白髮都人能道舊。君王曾奉上皇遊。

武林舊事四聖延祥觀西依孤山爲林和靖故居。花寒木潔氣象幽古。三朝臨幸有章太后沈香四聖像。小蓬萊閣瀛嶼堂金沙井六一泉高疎寮有詩。

### 聚景園

翠華不向苑中來。可是年年惜露臺。水際春風寒漠漠。官梅卻作野梅開。

武林舊事聚景園在清波門外。孝宗致養之地。嘉泰間寧宗奉成肅太后亦嘗臨幸。其後蕪廢不修。高疎寮詩云。

### 游九鎖

洞門金畫翠琅玕。杏不多花月溜寒。借得御書經自讀。松風淨洗石碁盤。洞霄詩集

### 汪強中郎中送蟹

連日天街候駕歸。且呼酒對早梅飛。從來吏部高情別。右手分將老蟹肥。蟹略

水西

抱崖一水限僧居。空翠冥濃畫不如。落日遊人山窈窕。清風啼鳥竹蕭疎。

詩家鼎鑪。

楊嗣助惠茯苓

道是青神谷。元通白帝厓。有松如壯士。其魄化嬰兒。雲溼侵鴉髻。天寒翦兔絲。堯初香摘髓。秦後雪凝脂。穴動龍蛇竄。山空鳥獸悲。惟將千歲力。自了一生奇。

都下

柳生春思拂京華。不管閑人也憶家。添盡好香那睡得。月痕如水浸梨花。

荅辛幼安

青天不惜日。壯士偏知秋。自古有奇畫。如今空白頭。彼時當再來。吾老不可留。天推璧月上。星入銀河流。躔度若此急。人生與之浮。終夜自起舞。無人共登樓。典謨有陳言。河洛非故州。黃鶴呼不來。誰能理殘裘。

以上後村詩話。

別雲門

回首雲邊更看松。風流王謝舊行蹤。不知誰繼諸賢後。夜半來聽六寺鐘。

雲門志略。

石橋

一石上負崑崙柱。一水西奔牛女渚。玉榦鱗鱗萬松古。夜夜神光干帝宇。石滑苔危水一縷。四海長依開闢雨。月落未落半規吐。雨足敲泉龍擺舞。

蔡山渡

江上人家破竹門。潮生水長浸籬根。鯨魚一尺枇杷小。放溜船來酒滿尊。以上甬上書舊集。

句

汾獻升雲鼎。秦遺蝕雪碑。買視沙冷雁一二。天長帆有無。曹娥江白浪不侵魚復陣。青苔猶護劔關銘。送

蜀客旋作池來分刻曲。略教花處似蘇隄。池西 後村詩話天差鶴管烹茶水。風夾花吹煮蟹烟。蟹略

莫若冲

若冲字子謙。若拙弟。淳熙十一年進士。歷官至大理寺丞。丐外。除知永州。不赴卒。有語溪集。

初春趙仁父寓資福院平綠軒見招

平綠題詩四十年。尋幽不厭水雲邊。一犁還又耕春後。三白重來醉臘前。自笑挂冠林下客。獲陪揮麈坐

中賢。絕嫌幻色撩人思。快覩晴川接遠天。嘉興府志

過崇福院在青鎮南

首歲融春卜有秋。曉行猶自索貂裘。身閑暫脫微官縛。市隱何如此地幽。一水相望三里近。十年重到片

時留。買田擬作終焉計。直是飄然不繫舟。烏青文獻

程卓

卓字從元。大昌從子。淳熙十一年進士。歷官同知樞密院事。封新安郡侯。贈特進資政殿大學士。

諡正惠有集

遊金焦二山

揚子長江天際來。中流有山何壯哉。深根盤礴千萬丈。寸土不受雙崔嵬。金山屹據上流險。四面佛屋相環回。來帆去槳別艫舳。住僧過客煩追陪。排空傑閣揖滄海。海山亂點浮纖埃。龍潭列聳石峯巧。獨立野鶴慵。稽。堂前回首指遺像。坡翁印老留青煤。其人已去詩尚在。唱酬風月相徘徊。再三瞻我二山去。縹緲又入雲濤堆。焦山一望二十里。舟師駕槽如奔雷。行行混混呼吸頃。繫纜確塹登山隈。山中僧少竹木古。瘦根迸石穿莓苔。幽姿野態隨步出。勝處往往多樓臺。洪厓路轉尋瘞鶴。幾年浪打風雨摧。遺銘破碎石剝落。摩挲細讀心眸開。同行韻遠心未盡。飛仙亭上傾尊壘。酒酣我爲發絕唱。底須方外求蓬萊。金山志略。

雲巖

石門一望路迢迢。五老峯高聳碧霄。泉挂珠簾當洞口。烟拖練帶束山腰。香爐捧出仙人掌。輦輅行過織女橋。午夜月明天似水。鶴歸松頂聽吹簫。齊雲山志。

豐

豐字仲至。號栗齋。其先鄆州須城人。渡江爲婺州武義人。少游呂東萊之門。淳熙十一年進士。嘗知臨安縣。稍遷提轄左藏庫卒。有東平集。

藁水心齋誌云。仲至片詞半贖。皆清朗。

得詩外題尤工。爲詩多至三千餘首。

曉起甘蕉洲

曉起東風惡。晴嵐忽變昏。船隨山共走。霧與水相吞。鉦鼓遙知寨。桑麻略辨村。雨來無準則。容易溼柴門。  
湖嶺下十里。是爲黯澹灘。行者多至此。捨舟

急流方了。又高岡。日永周旋未覺忙。壁上字多知店老。嶺邊松茂喜車涼。叢叢亂篠承敲石。帖帖新荷戀  
小塘。黯澹惡灘應笑我。爲虞魚腹犯羊腸。以上瀛奎律髓

翠蛟亭泉出天柱之趾。將至洞霄門。數折下墜。方盛時如蛟飲澗。亭當木石最奇處。舊取東坡詩語  
名以舞翠。客謂不若直名翠蛟。爲不費荅。知宮事王君思明欣然改之。爲賦一首。

木石相因依。妙處在得水。遇其相合時。澗壑水多止。巍巍天柱峯。雙洞空無底。怪石抱山迴。灌木參天起。  
青蛟走玉骨。元脈貫石髓。曲折暫得伸。掀舞如掉尾。亭成自何年。不陋亦不侈。秋深泉久縮。亭影照清泚。  
忽遇水飛流。亭入銀濤裏。怒蛟捲亭去。相距不盈咫。一落墜兩硤。力竭勢方已。終疑入江湖。赴海日千里。  
昨夜山雨號。梧竹盡風靡。轟雷與石鬪。蛟怒幾欲死。吾亭方宴然。清曉見窗几。因攜一樽來。與客相料理。  
賸擬畫將歸。題詩卻留此。

翠微亭就亭舉杯。落葉滿地。知宮王君請和。章蘇州落葉滿空山之句。

行跡年來到處稀。獨于巖壑有深期。鵝溪道士能相屬。請和空山落木詩。

洞霄卽事

積蘚青踰一寸痕。山靈守護幾千春。長藤橫繫巖邊木。何日重來挂葛巾。以上洞霄詩集

炊熟日有愴松楸

小樓吹斷玉笙哀。春半餘寒去復來。五歲不澆墳上土。望鄉心折刺桐開。濂洛風雅。

楊安誠

安誠字道父蜀人。

白帝廟并序

白帝廟神舊傳以爲公孫氏。以余考之非也。公孫氏享國日淺。轍迹未嘗至夔。獨遣田戎任滿戍江關。岑彭入江關。不復爲戍守。公孫氏無從廟食。按酈道元水經注。瞿塘灘上有神廟甚靈。刺史二千石過。冥下不敢伐鼓鳴角。恐致風雨。舟人上水以布裹篙足。不令觸石有聲。蓋不謂其神爲公孫氏。瞿唐天下至險。必有神物司之。但有廟偶連白帝城。俗遂從而訛爾。余往來三峽。皆託神之庇。輒爲賦此。庶來者有所考云。淳熙十一年正月晦日。西蜀楊安誠道父書。

蜀江萬壑俱東奔。瞿唐喧豨爭一門。驚濤駭浪建瓴下。巔崖仆谷相吐吞。朋妖窟宅特幽阻。正晝噴薄陰霾昏。靈宮奕奕鎮地險。衆瀆稟令川祇尊。赤甲後登黃熊躍。灩澦前峙青猿蹲。舳艫銜尾下吳楚。約束蛟鱗如雞豚。舊傳鼓角致雨雹。裹篙不觸撐舟痕。綜理脈絡盡西徼。帝假之柄攸司存。子陽祚國十年近。此地未省東其轅。連江列炬鐵鎖斷。戎滿奔北無留屯。江關回首盡漢幟。遺黎何自知公孫。血食漢代定不爾。但有故壘山之樊。子美誤信齊東語。感慨勇略招英魂。山川之靈載望秩。僭僞詎可同時論。向來名實久淆濶。薦裸無乃瀆俎。請從酈元爲考證。神理昭昭斯可原。全蜀藝文志。

謝 牧

題洪陽洞石上

特特攜筇探洞房，中藏精氣凜寒芒。神仙久視知難學，乞取逍遙物外方。淳熙乙巳冬書 遊名山記。

馮端榮

端榮崇安令。

題武夷 淳熙丙午。

花滿晴烟樹滿雲，我來寧是學仙人。願將九曲溪頭水，散作年年百里春。武夷詩集。

李持國

壽興國守九月三日。

縹緲黃堂擁瑞烟，神光照社記當年。風雲慶會千齡際，萸菊佳辰六日前。蕩節已嘗煩出使，輔藩聊復賴于宣。廟堂參贊猶虛位，飛詔行看下九天。聖宋名臣獻壽集。

劉季裴

季裴字少度，福安人。孝宗朝，終祕閣修撰。

壽朱守

康鼎談經世少雙，一時文物動虞庠。江湖雖隔金閨籍，衣袖仍聞玉案香。墨客幾年陪畫隼，板輿平日到護堂。時清身健堪行樂，未見荆榛老鳳凰。聖宋名臣獻壽集。



李獻可

獻可吉水人。

賦宮人午睡

御手指嬋娟。青春白晝眠。粉勻香汗溼。髻壓翠雲偏。柳妒眉閒綠。桃嫌臉上鮮。夢魂何處是。知繞帝王邊。

吉安府志。獻可六歲能詩。孝宗召入宮。時宮人正午睡。帝命爲詩。獻可

卽賦云。帝拊其背曰。何不作我家兒。命宮人繡御掌於背以賜歸。

王正己

正己四明人。珩之子。淳熙中官太府卿。

題天開圖畫亭并序

姚伯愿使君築亭眞州子城西北隅。盡得江山之勝。乞名于四明王正己。因誦山谷天開圖畫卽江山之句。遂以名亭。又爲賦此詩。

夜來殘暑慶西風。秋聲撼撼先井桐。纖雲四卷天開容。一碧萬里磨青銅。使君退食新涼逢。厭看凝寢香雲濃。領客欲送孤飛鴻。城隅高亭溼青紅。曠野四望開心胸。前瞻江山勝而雄。琉璃波光羣玉峯。水墨正爾難爲工。天開地闢今古中。此景自若無初終。天豈爲我施新功。我心得之眼相從。收入几席無遺蹤。錦囊得助防詩窮。李成郭熙將無同。撫掌一笑浮金鍾。儀眞縣志

# 宋詩紀事卷五十六

錢唐厲鶚緝

臨潼張四科  
錢唐陳章勘定

裘萬頃

萬頃字元量新建人淳熙十四年進士嘉定初除吏部架閣遷大理司直力丐外任添差江西撫幹卒有竹齋詩集

歸興

新築書堂壁未乾馬蹄催我上長安兒時祇道爲官好老去方知行路難千里關山千里念一番風雨一番寒何如靜坐茅齋下翠竹蒼梧子細看

娛書堂詩話裘元量性恬退不樂仕以

薦者召爲司直在朝嘗賦歸興云云

閑居

閑居最與性相便勤卽繙書懶卽眠終日閉門眞省事有時面壁似耽禪大椿歲籥祈親壽斷簡生涯聽子傳待問洪崖覓丹訣白雲深處引寒泉以上竹齋詩集

危榿

積字逢吉號巽齋。又號驪塘。撫州臨川人。淳熙十四年進士。歷屯田郎官。出知潮州。又知漳州。忤部使者請祠歸。有巽齋小集。

借詩話于應祥弟有不許點抹之約作詩戲之

我有讀書癖。每喜以筆界。抹黃飾句眼。施朱表事派。此手定權衡。衆理析畎澮。歷歷粲可觀。開卷如畫繪。知君篤友于。因從借詩話。過手有約言。不許一筆壞。自語落我耳。便覺意生械。明朝試靜觀。議論頗澎湃。讀到會意處。時時欲犯戒。將舉手復止。火側禁搔疥。技癢無所施。悶懷時一噫。只可捲還君。如此讀不快。千駟容可輕。君抱亦不隘。昨問雞林人。尙有此編賣。典衣須一收。吾炙當痛嘍。

經從豐城謁于房州于令侍姬歌舞進酒

蛾眉對酒舞涼伊。舞身還逐歌聲齊。卷花萬段忽進酒。鬪高蛺蝶飛來低。

春日卽事

麥風翻隴潑濃綠。花露摘枝黏老紅。小立樓頭檢春事。一絲暖日墜青蟲。

郭公

郭公郭公。聞爾失國春秋時。何事到此猶悲啼。郭公前言亡國故。當時祇緣臣子誤。百年社稷不得歸。而今家住柘岡西。滿目春風都是恨。聲聲說與齊侯知。郭亡矣。君勉之。以上巽齋小集。

送柴中行出守章貢

力爲君王乞得州。補天未了石還收。人才自係國輕重。吾道亦關公去留。殿角纔辭槐影日。船頭便轉茯苓

花秋競誇祖帳東門外。誰識眉攢杜甫愁。豫章詩話

宋史本傳。嘉定中。番禺柴中行去國。種作詩送之。迓宰相。出知潮州。

### 王居安

居安字資道。台州黃巖人。淳熙十四年進士。累遷右司諫。兼崇政殿說書。權工部侍郎。帥隆興府。升龍圖閣直學士。卒。贈少保。有方巖集。

吳子良序云。公之文明白夷暢。絕類其胸襟。詩尤圓妥曠遠。嘗有句云。高下水痕元自定。後先花信不須催。公於出處去就。此二語可以占矣。

僧居簡北磻詩集云。方巖王侍郎江西破賊歸。小舟追擊。自笑曰。今爲摺疊侍郎矣。

### 送劉改之

不識劉郎莫便語。酒酣耳熱未全疎。士當窮困能無慊。我自斟量媿不如。橫梁賦詩俱有分。輕裘緩帶特其餘。當今四野無塵土。宜有奇英在草廬。瀛奎律髓

### 潘德久有龍眠三馬而失其一俾予賦詩

三馬往往皆龍駒。精神肯與凡馬俱。忽不見者其前驅。定應飛上天之衢。君得其二已有餘。我欲與君分此圖。驚才患多不患無。四十萬疋將何如。龍眠已往不可呼。愈少愈貴宜寶儲。赤城詩集

句

紙教人種菜。莫誤客看花。題園扉 後村詩話。

郭綽

綽、綽 嵯縣人。淳熙十四年進士。

枕流軒在安吉州嚴真觀。

招提避雨寄孤眠。夜靜溪聲到枕邊。引得五湖清入夢。拍天波浪一漁船。西吳里語。

王溉

溉、官太府少卿。兼知臨安府。除權兵部侍郎。

淳熙丙午游大滌山

山合羣峯路屈盤。溪行九折勢蜿蜒。雲根長伴仙人迹。元蓋潛通大滌天。玉殿香銷人寂寂。石壇花落草芊芊。黃冠解識尋幽興。爲洗寒鑪煮碧泉。洞霄詩集。

徐僑

僑、字崇甫。號毅齋。婺州義烏人。淳熙十四年進士。理宗朝。仕至工部侍郎。寶謨閣待制。奉祠。卒諡文清。有集。

毅齋卽事

自吾齋外付諸兒。除卻詩書總不知。苔色上侵閑坐處。鳥聲來和獨吟時。十分秋色重陽近。一味新涼老

者宜調得身心能自慊。止吾所止復何疑。濂洛風雅。

陳峴

峴字壽南。温州平陽人。淳熙十四年中博學宏辭科。賜進士出身。官中書舍人。直學士院。

依綠亭

脩林平治久荒埃。招領春風一笑回。淨掃莓苔分徑岸。賸添桃李結亭臺。粵西詩載。

林宗放

宗放字問禮。宣城人。淳熙丁未進士。通判廣州。乞祠歸。

陪郡守游西園

倒影扶闌印碧溪。玻瓈盤上玉東西。落紅那得愁如海。舉白難逃醉似泥。郎宿高明香霧起。客星華耀燭花低。波心夜半魚龍舞。都轉天風入鼓鼙。宛雅。

鄭克己

克己字仁叔。青田人。淳熙中進士。仕至福建提刑司幹官。

水國

水國烟霞客。春來始定居。老逢人事嬾。貧覺舊交疎。隙影窺蟾滴。芸香散篋書。西湖風月好。不到一年餘。

送中書王舍人使北

細馬縷金鞍。文星使可汗。袖中天詔重。帳外節旄寒。烽火燕城急。塵沙朔野寬。安邊存大體。何必斬樓蘭。

浙江十六夜對月

急槩寒天關。長江得月遲。最憐新缺後。全勝未圓時。夜雪潮千丈。秋風桂一枝。潛蛟易翻動。怨笛莫驚吹。

青衫

青衫著破禁中羅。楚澤吳江幾度過。仕宦宛如杯水淡。朝廷空有故人多。漁村疎竹明風旆。煙浦斜陽起暮歌。欲買田園歸海上。此身無柰客愁何。以上前賢小集拾遺

旅中遇故人

雲薄清溪水。天寒黃葉風。鄉關三載別。客路一尊同。舊事如昨日。問年俱老翁。相看今夕意。淚冷菊花叢。詩家鼎鑿

繆 瑜

瑜字珍叟。龍南人。淳熙進士。官進賢令。有崆峒詩集。

遇災感應詩并序

辛酉歲錢唐火災。延燒居民以七萬計。惟吳山上一老翁家獨全。翁平時誦經樂施。火起之夕。以老憊不能去。遣兒與婦令亟走。竟不忍相捨離。處烈焰之中。全家昏然熟寐。至于蒲萄架亦不焚灼。夫善積于平日之閒。而孝感于一念之頃。其爲神物護持如此。行道之人。相與言者。必曰蒲萄架。因詩之以爲世人好善者之勸云。

鬱攸屬者。潛煽災。蜚廉縱風。相與偕。林林生齒七萬戶。連薨接棟燒成灰。如何老翁一區宅。閒不以寸獨

不煇。玉石俱焚。勢應爾豈有幻術。能然哉。聞之翁乃好善者。平時事佛。經卷開有餘。必以濟貧乏。不以利欲縈其懷。倉卒遂蒙鬼神護。萬目注視。咸驚猜。厥初巨燄。蒸天起。左顧右盼。如燔柴。翁知無地可脫。免。委身甘作燼。與煨。糜兒與婦。令亟走。誓死不去。無違乖。全家酣寢。越信宿。如聞大浪聲。喧。及其夢覺。火亦息。依然一室。當崔嵬。微如蒲萄。不重灼。而況梁棟與桷椳。蒼蒼表善。有如此。餘自作孽。何足哀。作詩誌往勸來者。勿以斯語同優俳。咸淳臨安志。

句

有客去遊丞相閣。無人來問孝廉船。調官。

後村詩話云。予初筮仕江西。有老

選人繆瑜來訪。有句一聯云云。

李壁

壁字季章。燾子。用父任入官。後登進士第。寧宗朝。累遷權禮部尚書。直學士院。同知樞密院事。歷資政殿學士。致仕卒。諡文懿。有雁湖集。

使北作

天連海岱壓中州。煖翠浮嵐夜不收。如此山河落人手。西風殘照懶回頭。

四朝聞見錄。開禧初。韓平原欲興兵。遣張嗣古覘敵。張還大拂韓旨。復遣李壁。壁還與張異辭。階是進政府。壁使北。有詩云云。



玉堂留題

雲影沈沈玉一方。倚闌人意似濠梁。獨憐雪裏山茶樹。也向春風伴海棠。咸淳臨安志。

酬曾景建

新有千絲明曉鏡。舊無一畫贊宵衣。閑吟此外唯須飲。老覺人閒萬事非。後村詩話。

青雲亭

平林野水帶孤城。倦客登臨太瘦生。過眼千花競紅紫。可憐霜鬢轉分明。撫州府志。

句

一杯謾道愁能遣。幾度醒來錯喚君。悼亡。憂時鐵石孤忠在。閱世風花老眼空。送楊子直知吉州。後村詩話。

董居誼

居誼字仁夫。臨川人。淳熙進士。歷官四川制置使。奉祠歸。有集。

戚姑山

重上危樓意豁然。倚闌檢點舊山川。身離城郭塵囂裏。眼到雲天杳靄邊。祇恐老松添歲月。長教脩竹障風烟。回思燈火書窗下。俛指如今六十年。撫州府志。

盛璉

璉字溫如。豐城人。領淳熙中鄉薦。以平山寇功。授奉節郎。創書院于盛家洲。朱文公嘗過訪。贈以詩。

宋元晦過訪

蒼松翠竹映斜暉。野菊花開過客稀。葉底黃蟲作寒繭。雨餘蝴蝶滿園飛。  
梅花樹下三閒屋。挂壁枯桐盡日閑。有客過門彈一曲。斷雲殘雪滿空山。皇華紀聞。

李泳

泳字子永。號蘭澤。廬陵人。淳熙中。嘗爲溧水令。又爲阮冶司幹官。與兄洪子大。漳子清。弟浙子秀。涂子召。著李氏華萼集。

題甘將軍廟卷雪樓

卷雪樓前萬里江。亂峯卓立森旗槍。上有甘公古祠宇。節制洪流掌風雨。甘公一去踰千年。至今忠氣猶凜然。我來再拜攬塵跡。斜陽白鳥橫蒼烟。

夷堅志。大江富池縣。有甘寧將軍廟。殿宇雄偉。行舟過之者。必具牲醴祗謁。李子永嘗自西下。舟次散花洲。有神鴉飛立橋竿。即遇便風。晡時抵岸。青蛇箭激而來。至舟尾不見。是夕棹泊。明日賽神。其前大樓七間。尤偉壯。郡守周少隱。采東坡詞語。扁爲卷雪。子永作詩云。初題梁間。本云英威凜然。如有人掣其肘。乃改爲忠氣。

王亘

亘字伯通。福州人。淳熙間。知南恩州。

十洲圖

宋詩紀事 卷五十六

一四五

山川如幻閣長秋。一疊飛來伴九洲。不礙漁樵雙槳過。何妨羅綺四時遊。雲疑泰華分張去。水憶蓬瀛散漫浮。禁苑未知湖海樂。生綃寫取獻中州。延祐四明志。

次胡澹菴題挹翠軒韻

西山排闥來。周遭自環翠。俗眼少見之。一覽忘世味。平生三徑心。盍早賦歸計。縱落塵土居。不與草木敵。公餘事幽尋。清風拂衣袂。最喜軒中人。所挹多爽氣。蓬蒿天地寬。萬境發詩思。白雲未能閑。時出過窗几。簷花聽夜雨。池草生春媚。山靈若相知。好風爲裂背。餘光雖力挽。回次那得致。肇慶府志。

韓彥古

彥古字子師。延安人。新王世忠之子。淳熙中知平江府。終敷文閣待制。戶部尚書。

大智院明月集在富陽縣。

清風去無塵。白雲來無心。一笑玉溪上。落花流水深。杭州府志。

黃敏德

敏德號存菴。淳熙中句容令。

入洞霄九鎖路閒

綠蘿垂地白日暗。落葉滿徑行人稀。青童走入報迎客。驚罷先生一局碁。

舞翠亭觀泉

坐來毛骨覺蕭然。百尺飛流下碧天。杯酒未終身世換。盡移三峽到尊前。以上洞霄詩集。

程九萬

九萬字鵬飛。池州人。淳熙間知武康縣。有賢名。慶元中守歷陽。有集。

重建東堂前令毛滂建

宦游偶落雲水鄉。恥以貪墨爲吏商。三年寄傲南窗月。一瓣爲炷東堂香。翛然清風揖佳客。好古博雅眞揚揚。舊題湔祓古寺壁。濁酒呼索鄰家牆。淋漓醉墨鸞鳳舞。警語峭厲凌冰霜。大碑小碣共檢校。次第安置堂中央。榻來弦歌有餘暇。逸興賸欲希韓湘。

證道寺追和毛澤民韻

二載塵勞薄宦身。雙峯幾憶舊家鄰。甫能再上陽城考。更有一年孤負春。以上武康縣志。

葛 鄂

鄂立方長子。淳熙中以朝奉郎判鎮江。

留友人

良友久閒闊。春事遽如許。勞君下鷗沙。一葉繫春渚。昨夢墮前山。再見欣欲舞。聊呼花底杯。酒面點紅雨。狂歌謝貫珠。清論雜揮塵。驪駒未可歌。妙句須君吐。韻語陽秋。

杜 廡

廡字伯高。金華人。嘗登呂成公之門。淳熙開禧間。兩以制科薦。有橋齋集。

白頭吟

長安春風萬楊柳，新人妖嬈舊人醜。貧賤相從富貴移，舊時犢鼻今存否。長門作賦價千金，不知家有白頭吟。金華雜識。

句

君勿笑新亭相對泣，卻勝蘭亭暮春集。題蘭亭序 後村詩話。

劉孝綽

孝綽字正夫，乾淳閒以門蔭仕，累官直祕閣，提舉兩浙常平，除直徽猷閣。

題佘山宣妙寺

水定浮春岫，鴉盤落遠林。上方鐘送夕，隱几興何深。松江府志。

吳億

億字大年，蘄春人，仕至靜江倅，有溪園集。

磨崖中興頌

借問江頭人釣魚，爲言靈武事何如。磨崖豈是當時意，兩字噫嘻金鏡書。潛溪集。

錢聞詩

聞詩字子言，成都人，淳熙中知南康軍，有廬山雜著。

題米元暉瀟湘圖

太湖水入霽溪寒，疊嶂連山幾萬般。此景古今無盡藏，總歸嬾拙一毫端。郁氏書畫題跋記。

錢聞禮

聞禮、嘉興人、第進士。

簡寂觀

先生舊隱在廬山。幽谷千年竹萬竿。偃松拂盡煎茶石。苦筍撐開禮斗壇。方輿勝覽。

章甫

甫字冠之。鄱陽人。居真州。有易足居士自鳴集。

貴耳集冠之多從于湖交游。飄蕩不受拘羈。淳熙間。淮有三士舒之。張用晦和之。張進卿真之。章甫冠之也。

寄荆南故人

餘生自拚一虛舟。未害尋詩慰客愁。梅欲飄零猶醞藉。柳纔依約已風流。關心弟妹無黃犬。入夢江湖有白鷗。別後故人相念否。東風應憶仲宣樓。貴耳集。

湖上吟

誰家短笛吹楊柳。何處扁舟唱采菱。湖水欲平風作惡。秋雲太薄雨無憑。近人白鷺廳方去。隔岸青山喚不膺。好景滿前難著語。夜歸茅屋望疎燈。前賢小集拾遺。

林升

升、淳熙時士人。

題臨安邸

山外青山樓外樓，西湖歌舞幾時休。暖風熏得遊人醉，直把杭州作汴州。西湖餘志。

俞國寶

國寶臨川人，淳熙太學生，有醒菴遺珠集。

武林舊事：淳熙間，德壽三殿遊幸湖山，一日御舟經斷橋旁，有小酒肆頗雅潔，中飾素屏，書風入松一詞于上，光堯駐目稱賞。久之，宣問何人所作，乃太學生俞國寶醉筆也。其詞云：一春長費賞花錢，日日醉湖邊。玉聰慣識西湖路，驕嘶過沽酒樓前。紅杏香中歌舞，綠楊影裏鞦韆。東風十里麗人天，花壓鬢雲偏。畫船載取春歸去，餘情在湖水湖烟。明日再攜殘酒來尋陌上花，鉤上笑曰：此調甚好，但未末句未免儒酸，因為改定云：明日重扶殘醉，則迥不同矣。即日命解褐。

山茶

花近東溪居士家，好攜樽酒款攜茶。玉皇收拾還天上，便恐筠陽無此花。全芳備祖。

許尙

尙華亭人，號和光老人，生淳熙間，有華亭百詠。

華亭百詠 存十首

陸機茸 在谷水東，吳陸遜生二孫，常于此遊獵，今名桑陸，又名吳王獵場。

二陸爲童日，馳驅屢忘歸。至今桑柘響，禽鳥尙驚飛。

三女岡

三殮知無有，香魂計已銷。頻來吟楚些，歲久若爲招。  
征北將軍墓，卽陸禪墓。在崑山有碑，村人疲于官吏征索，遂碎其碑。  
崎嶇尋古隧，衰草隱寒原。欲讀將軍事，豐碑祇半存。

顧亭林

旦暮潮流急，東西徑路斜。無從質疑字，共屬野王家。

白龍洞在橫雲山頂，下通澱山湖。每風雨夜，有龍出入洞中。

呼吸湖中水，山椒寄此身。洞門風雨夜，電火逐霜鱗。

俞塘府東五里，往來之舟，皆可揚帆。諺云：雖有珠千斛，不賣俞塘北。

延袤三鄉外，東流與海通。河神屢加惠，帆借往來風。

普照寺晉陸機捨宅爲寺。

高門收畫戟，卽此見精藍。施子恩雖在，緇流絕不談。

陸瑁養魚池卽西湖也，今爲放生池。

誰得陶朱術，修治一水寬。皇恩浹魚鼈，不復敢垂竿。

唳鶴灘湖之東南隅。

養鶴人何在，湖邊水尙清。喚回中夜夢，灘上戛然聲。

湖光亭風月堂之西。



日暮蝦鬚卷亭中雅燕開微風起蘋末波影動尊罍以上華亭百詠

陳善

善字敬甫號秋塘淳熙間豪士有雪篷夜話

句

不知筋力衰多少但覺新來嬾上樓吹劍錄

春風一日歸深院巫峽千山鎖暮雲書貴家扇聞說平生輔漢卿武夷山下啜殘羹送輔漢卿過考亭 以上貴

耳錄

童敏德

敏德臨川人生乾淳閒不仕

湖州題顏魯公祠堂

挂帆一縱疾于鳥長興夜發吳興曉杖藜上訪魯公祠一見目明心皦皦未說邦人懷使君且爲前古惜忠臣德宗更用虛杞相出當斯位誠艱辛生逆龍鱗死虎口要與乃兄同不朽狂童希烈何足罪姦邪嫉忠假渠手乃知成仁或殺身保身不必皆哲人此公安得世復有洗空凡馬須騏驎

容齋三筆云

語意超拔

許玠

玠，字介之，襄邑人。有東溪詩藁。曰：路按劉後村云：端平以來，與江西曾無疑、金華杜叔高、九華葉子真同聘召之士。有衡陽許介之、蓋介之、南渡富家衡陽，晚年始被召也。

### 染絲上春機

錦江之水來蜀西，女紅染絲上春機。可憐欲織未織時，思君意緒如亂絲。亂絲尚可理，妾愁渺無際。寒窗軋軋千萬梭，斷魂隨梭暗來去。蕩子醉花月，妾辜鸞鏡妝。寒蛩只解趣機杼，爭卻情如刀劍傷。織成回紋詩，寄與白玉郎。願郎勿棄置，上有雙鴛鴦。覩看雙鴛鴦，忍教孤妾守空房。梅堯詩話

### 漢宮春夜

虛輪絢采千門外，窗眼滲光金箔碎。渴烏滴水續銅壺，簷馬呼風搖玉佩。宮車聲斷翠箔幽，珠簾閑卻珊瑚鉤。眉山兩點亦何有，中鎖萬斛相思愁。蜀羅蜜炬光明滅，紅淚難濺守宮血。遙夜春寒聽曉鐘，角聲滿地梨花雪。詩家鼎鑪

趙希弁讀書附志云：周益公嘗親寫許介之漢宮春夜朱陵洞詞古離別出塞曲四篇而跋之。

### 吳琚

琚字居父，號雲壑，汴人。憲聖太后之姪，太寧郡王益之子。歷尚書郎、部使者、直學士。慶元閒，以鎮安節度使留守建康。遷少保，卒諡忠惠。有雲壑集。

佩楚軒客談吳琚節使

蓄雷琴號九霄環佩

書史會要吳居父大寧郡王益之子世稱吳七郡王性寡嗜好

日臨古帖以自娛字畫類米芾以詞翰被遇孝宗大字極工

### 續光宗詠安榴

細疊輕綃色倍醲。晚霞猶在綠陰中。  
光宗春歸百卉今無幾。獨立清微殿閣風。  
琚

四朝聞見錄孝宗崇憲聖母弟恩故稱琚兄弟曰哥光宗體孝宗之意故稱琚兄弟曰  
舅琚尤被聖眷後死安榴盛開光皇以黃團扇自題聖作二句命琚足成上稱歎久之

### 劉光祖

光祖字德修號後溪簡州陽安人登進士第寧宗朝遷起居郎右文殿修撰終顯謨閣直學士提  
舉嵩山崇福宮諡文節有鶴林集

### 鶴林寺

竹院逢僧話山門掃地迎英雄猶有迹般若太無情玉樹春陰密琅玕晚暑清  
半年來往屢只合送行旌

鶴林寺志

### 龔準

準知江陰軍

題天慶觀碧玉堂張安國書扇

清曉叩元關晏時鬢已斑何如閑道士隔竹看君山咸淳毗陵志

任璉

璉字國器。黃巖人。淳熙中。上舍釋褐。授校書郎。

山居歲暮

讀罷義文先後天。蕭然一室裊寒烟。山中歲月那知得。但見梅花又一年。黃巖英氣。

何坦

坦。東陽人。淳熙閒。官沿海制置司幹辦公事。

乞蜂兒榷于郭德誼二首

味甘宜郡蜂。難蜜韻勝雍城酪。乳酥一點生春流齒頰。十年飛夢繞江湖。  
銀甲彈開香粉墜。金盤堆起乳花圓。乞君東閣長生供。壽我北堂難老仙。

乞釀于郭伯瞻

洗醖試邀從事釀。臥壘忽報步兵廚。良辰不與清樽共。今夜儻羞明日無。未論一缸分雪乳。已拚千日醉雲腴。宜黃漫尉今狂甚。聽我酣歌入五湖。以上石洞遺芳集。

吳有定

九鯉湖

昔聞九仙靈。今登九仙地。裊裊一爐香。寥寥千載事。九鯉湖志。

葉時

時、字秀發、仁和人。晚居嘉興。淳熙中進士。官終龍圖閣學士。有竹塹詩集。

還桑澤卿蘭亭考

書法光芒晉永和。後來摹寫不勝多。考論又得桑夫子。蘭渚風流轉不磨。櫛李詩繫

傅子平

子平、淳熙中鳳州守。

絕句

珍珠不見小槽紅。遐想柔荑剝嫩蔥。唯有萬條羅帶綠。年年依舊舞春風。

鳳縣志。鳳之爲州。當秦蜀之衝。以手柳酒三絕名世。風塵一

起號爲邊鄙者四十餘年。淳熙初。鳳州守傅子平詩云云。

# 宋詩紀事卷五十七

錢唐厲鶚輯

錢唐金京勘定

張栻

栻字敬夫。廣漢人。浚子。以蔭補官。孝宗朝。歷左司員外郎。除祕閣修撰。歷知江陵府。荆湖北路安撫使。卒。嘉定中。謚曰宣。從祀大成殿。有南軒集。

謁陶唐帝廟詞

宋淳熙四年。靜江守臣張某。既新陶唐帝祠。以二月甲子。率官屬祇謁祠下。再拜稽首。退而歌曰。溪交流兮谷幽。山作屏兮會丘。木偃蹇兮枝相樛。皇胡爲兮于此留。藹冠佩兮充庭。潔芳馨兮載陳。純衣兮在御。東風吹兮物爲春。皇之仁兮其天。四時序兮何言。出門兮四顧。渺宇宙兮茫然。

胡文定公碧泉書堂在崇安縣籍溪。

入門認碧溪。循流識深源。念我昔此來。及今七寒暄。人事經幾變。寒花故猶存。堂堂武夷公。道義世所尊。永袖霖雨手。琴書賁丘園。當時經行地。尙想笑語溫。愛此亭下水。炯若玻璃盆。晴看浪花湧。靜見潛鱗翻。朝昏遞日月。俯仰信乾坤。因之發深感。倚檻更無言。

三月七日城南書院偶成

積雨欣始霽。清和在茲時。林葉旣敷榮。禽聲亦融怡。鳴泉永不窮。湖風起淪漪。西山卷餘雲。逾覺秀色滋。層層叢綠閒。愛彼松柏姿。青青初不改。似與幽人期。坐久還起來。隄邊足逶迤。游魚傍我行。野鶴向我飛。敢忘昔賢志。亦復詠而歸。寄言山中友。和我和平詩。

朱子跋云。久聞敬夫城南景物之勝。常恨未得往游其間。今讀此詩。便覺風篁水月。去人不遠。

題榕溪閣 昔山谷南遷。維舟榕下。後人爲作榕溪閣。

寒溪澹容與。老木枝相樛。其誰合二美。名此景物幽。太史昔南鰲。於焉曾少休。想當下榻時。請與耳目謀。品題信要領。亦有翰墨留。我來訪遺址。密竹鳴鉤輈。稍令舊觀復。還與佳客遊。樹影散香篆。水光泛茶甌。市聲不到耳。永日風颼颼。所忻簿書隙。有此足夷猶。平生丘壑願。如痼不可瘳。雖知等喧寂。終覺靜裏優。更思濯滄浪。榕根浮小舟。

故太子詹事王公挽詩 十册

大節元無玷。中心本不欺。排姦力扛鼎。憂國鬢成絲。方喜三旌召。俄興一鑑悲。西風吹淚眼。吾豈哭吾私。容主龍飛日。如公舊學臣。忠言關國計。清節映廷紳。歲月身多外。江湖澤在民。當年遺直歎。千古更如新。

題城南 日竇按此首本集不載。

城頭望西山。秋意已如許。雲影度江來。霏霏半空雨。

東渚

團團凌風桂。宛在水之東。月色穿林影。卻下碧波中。  
麗澤

長哦伐木篇。佇立以望子。日暮飛鳥歸。門前長春水。

濯清亭

芙蓉豈不好。濯濯清漣漪。采去不盈把。悵惆暮忘飢。

西嶼

繫舟西岸邊。幅巾自來去。島嶼花木深。蟬鳴不知處。

采菱舟

散策下亭阿。水清魚可數。卻上采菱舟。乘風過南浦。  
以上南軒集

鶴林玉露云。六詩平。

淡簡遠德人之言也。

馬上口占

向來一雪壓。霜昏曉跨征鞍。傍水村七十二峯皆玉立。巍然更覺祝融尊。

方廣寺睡覺

僧舍孤衾寄此情。莊生夢破梵鐘聲。浮漚蹤跡原無定。惆悵西風一夜清。

十六日下山各賦二篇

存一



歸袂隨雲起。籃輿趁雪明。山僧可留客。世故卻關情。小倚枯藤杖。聊聽絕澗聲。如何山下客。一笑已來迎。  
以上南岳倡酬集。

書花光墨梅

一枝已清妍。交枝更媚嫵。見之已愁絕。那復隔烟雨。錢唐千頃春。想見西津渡。他日到南屏。莫忘孤山意。  
題王介甫遊鍾山圖後

林影溪光靜自如。蕭疎短鬢獨騎驢。可能胸次都無事。擬向山中更著書。  
以上聲畫集。

劉 芮

芮字子駒。東平人。官永州決曹掾。有順寧集。

敬夫寄斜川詩。敘往年之約。殊不知芮今病矣。非如昔時獨心。心不忘耳。勉和一章。以敘謝意。  
病著不任事。淹臥心自休。經時不出門。況復斜川遊。每覲節物換。恍驚時序流。少年喜追逐。聚散水上鷗。  
沈舟枯木畔。風帆春樹丘。我病正爾許。懷念老朋儔。有酒不能飲。徒有獻與酬。故人酌佳日。亦復我念否。  
佳章寫懷抱。一讀寬百憂。吾君念遠民。歸計未易求。  
式古堂書考。

薛季宣

季宣字士龍。永嘉人。起荆南帥辟書。薦爲大理寺主簿。歷大理正。出知常州。有浪語集。

遊竹陵善權洞

萬古英臺面。雲泉響佩環。練衣歸洞府。  
澗水倒流入水洞中。  
香雨落人閒。蜨舞疑山魄。花開想玉顏。幾如禪。

觀適遊。納戲澄灣。寺故祝英臺宅。唐昭義帥李瓌嘗見白龍出水洞而爲雷雨。今小水洞存鱗魚四足。  
左右蝸蠻戰。晨昏燕蝠爭。九星寧曲照。三洞獨何營。世事嗟興喪。人情見死生。阿誰能種玉。還爾石田耕。  
山有三洞九斗壇。故更寺觀者不一。再有李後主斷還僧寺批札石記語極可笑。大水洞有石田數十町。奇絕。

觀岳侯石像

萬死何如獄吏尊。威名蓋世古難存。二桃豈是功高賜。一舸不容身退論。幾爲飲江思道濟。謬因圖像削王敦。沈碑千古蛟川恨。留與無窮客斷魂。以上浪語集。

王彥和

彥和崇德人。

題扇

天邊一線征鴻沒。山色淺深墨未勻。別浦漁舟待歸去。夕陽渡口兩三人。

嘉興府志。彥和書此于中貴人扇上。光堯見之稱賞。令盡進所作。賜金帛。

游次公

次公字子明。建安人。號西池。定夫諸孫。禮部侍郎操之子。范石湖帥桂林。日參內幕。有唱酬詩卷。漁父

竹裏茅茨竹外溪。粼粼白石護漁磯。想應日日來垂釣。石上蓑衣不帶歸。詩人玉屑。

畫虎圖

平生射虎裴將軍。馬蹙如龍弓百鈞。手撚白羽旁無人。注虎使虎不敢奔。須臾叢薄爛斑出。人馬不知俱辟易。矢如蓬蒿弓減力。將軍得歸幾敗績。徐行爪牙無不露。耿耿垂頭若微顧。尾翦霜風林葉飛。倏忽山頭日光暮。包家畫出真於菟。我尙不敢編其鬚。昔人作詩譏畫圖。吁嗟畫圖今亦無。合璧事類集

耒陽道中

山頭磴石危梯險。山下荒田野草悲。更著秋風吹兩鬢。不消幾日盡成絲。詩家鼎鑪

潘時

時字德廊。良貴之兄子。李莊簡光之壻也。孝宗朝。官至尙書左司郎中。

嚴先生祠

古屋巔巖上。荒祠落葉中。乞靈無俗駕。垂世有高風。鳥語谷相荅。魚游溪若空。徘徊欲忘去。船背夕陽紅。釣臺集

張鋹

鋹字功甫。號約齋。西秦人。居臨安。循王諸孫。官奉議郎直祕閣。有南湖集。

誠齋詩話。功甫詩斷橋斜取路。古寺未關門。絕似晚唐人。詠金林檎花云。梨花風骨杏花妝。寫物之工如此。予歸自金陵。功夫送末章云。何時重來桂隱軒。爲我醉倒春風前。看人喚作詩中仙。看人喚作飲中仙。此詩超然矣。

楊誠齋贊功甫像云。香火齋被。伊蒲文物。一何佛也。襟帶詩書。步武瑤瑤。又何儒也。門有朱履。坐有桃李。一何佳公子也。冰茹雪食。凋碎月魄。又何窮詩客也。約齋子方內歎。方外歎。風流歎。窮愁歎。老夫不知君其間之白鷗。

### 謝李仁父送茯苓

岷峨山中千歲松。枝蚪幹直摩青空。雪霜剝落中不槁。膏液下與靈泉通。龜踞虺伏自磊砢。金堅玉凍仍豐融。篝燈夜取喜得雋。煮鼎朝聽如吟風。杵成坐上香霏雪。更和乳酪收全功。當知至味本無味。子若服之壽無窮。巽巖脊梁硬如鐵。冠冢切雲佩明月。百好都隨春夢空。大業獨傳鴻寶訣。中宵咀嚼不搖頭。玉池生肥咽不輟。憐我百慮形早衰。裹贈扶持意何切。丹砂著根謾爾傳。脂澤釀黍計已拙。由來妙道初不煩。此法莫從兒輩說。徑思舉袂揖浮丘。下視塵世眞一謁。朱顏留得亦何爲。追逐同堅歲寒節。全芳備祖

### 游九鎖山

九鎖非凡境。烟雲路不分。山寒長帶雨。洞古不收雲。夜宿聽林鶴。晨炊摘野芹。黃冠皆好事。添炷石爐熏。涼蟬亂叫朝暮雨。獨鶴不迷前後山。芎葉煮湯勝茗椀。栗花然火照松關。洞霄詩集

### 釣臺

絳衣騎日扶桑上。三精九縣開靈臆。趙梁雍代跡俱空。馮吳寇鄧勳相望。客星何處潛光芒。雙臺疊巘巖摩穹蒼。釣絲千丈捲烟雨。俯瞰一碧玻璃江。羊裘坐穩無心動。蒲輪纒幣知何用。故人聊爲小周旋。君房謬欲相推送。寥寥歲月今幾秋。山寒松吹多颼颼。春來日暖花氣發。極浦浪轉魚龍遊。先生有臺人共高。虛庭忍見生蓬蒿。斷碑敗壁蠹荒薜。灌木野鳥捐枯巢。一朝鐘梵交雲際。蒼楹改觀輝杉桂。非關好事取時

名。此中恥但稱能吏。卻經祠下羅清檜。試歌此詩當招魂。先生出兮佩蘭蓀。明璣耀旂駕瑤璠。黃麟道前翠蚪奔。先生去兮山雲屯。玉妃金童從繽紛。吹簫鼓瑟聲冥冥。目斷暮靄棲遙林。釣臺集

宿吳江塔院

宿雲蔽空溪冥濛。我船曉繫紅蓼叢。破程約涉一舍外。遠目未快千山供。岸旁小店換馬去。氈裘障冷披蒙茸。須臾巾蓋不容展。莽莽暗霧逢逢風。偕行客輿屢掀簸。適值官騎來憧憧。弓刀負帶競硃硃。驢駟騶躡爭前迭進步。殊窘迫暮始望橋垂虹。石塘百丈捍駭浪。閒有灘磧紛漁筒。鴉羣黑白混鷗起。颿影亂點還波中。筆牀茶竈住此地。得句未必慚龜蒙。浮圖老屋且投宿。解擔正聽黃昏鐘。紗籠炙燈照佛古。蘭席布榻便吾慵。悅驚足履未游地。逸興恐失難重逢。案邊紙盡莫翻寫。不覺紅日看生東。百城烟水

句

燕子初歸曾識面。牡丹未放已知名。桐江續集 一權徑穿花十里。滿城無此好風光。玉照堂觀梅 齊東野語

會觀

觀字純甫。號海野老農。汴人。紹興中。以寄班祇候。與龍大淵同為建王內知客。孝宗受禪。以潛邸舊人。除權知閣門事。淳熙中。除開府儀同三司。加少保醴泉觀使。

老學菴筆記 會觀字純甫。偶歸正官蕭鷓巴來謁。既退。復一客至。其所狎也。

因問曰蕭鷓巴可對何人。客曰。正可對會鷓脯。觀以為慢已。大怒。與之絕。

玉環山 在太平縣西南楚門港中。原名木榴山。避錢王諱改焉。

天寶風塵暗兩京。禍從妃子笑中生。玉環兩字真堪惜。好與青山改別名。台州府志。

題楊補之雪梅卷

筆端造化出天巧。寫出江南雪壓枝。誰道春歸無覓處。橫斜全似越溪時。式古堂畫考。

龍大淵

大淵紹興中與曾覲同爲建王內知客。孝宗受禪。自左武大夫除樞密副都承旨。知閣門事。出爲江東總管。

齊東野語。思陵妙悟入法。留神古雅。當干戈俶擾之際。訪求法書名畫。不遺餘力。又于權搆購北方遺失之物。故紹興內府所藏。不減宣政。惜乎鑒定諸人。如曹勛、龍大淵、張儉、鄭藻、平瑛、黃冕、魏茂實、任源等。人品不高。目力苦短。凡經前輩品題者。盡皆拆去。故今御府所藏。多無題識。其源委授受。歲月考訂。邈不可求。爲可恨耳。

遊九鎖

峯巒九鎖路縈盤。翠色霑衣作晚寒。日暮神仙歸洞府。雨餘星斗下天壇。人生何用千鍾貴。老去須求一室安。會得谷神元不死。世閒何事可相干。洞霄詩集。

彭九萬

九萬字好古。崇安人。淳熙閒。國學立禮齋長。

凌波辭

歲芳兮婉冉悲。江空兮蘭榭歸。人嬋媛兮胡來遲。憺風魂兮佩誰思。素衣兮儼黃裏。玉襦兮蒙翠被。明波  
淳淳兮渺愁予。含香懷春兮中心苦。昔遺襟兮今契闊。佇佳期兮官脩絕。幻塵緣兮審中憂。時旣晏兮不  
可留。汎雲輶兮水裔。紕予瑟兮難理。人奚歸兮路蒼茫。湘有臯兮春綠起。萬姓統譜

楊炎正

炎正字濟翁廬陵人。黟按炎正工詞。有西樵語業一卷。毛氏汲古閣刊本。誤作楊炎。號止濟翁。子見舊鈔本。作楊炎正。濟翁是炎正其名。濟翁其字也。今考武林舊事。有楊炎正詩。全芳備祖有楊濟翁詩。卽是一人。毛氏之誤可見矣。

錢唐迎酒歌

錢唐妓女顏如玉。一一紅妝新結束。問渠結束何所爲。八月皇都酒新熟。酒新熟。浮蛆香。十三庫中誰最  
強。臨安大尹索酒嘗。舊有故事須迎將。翠翹金鳳烏雲髻。彫鞍玉勒三千騎。金鞭爭道萬人看。香塵冉冉  
沙河市。琉璃杯深琥珀濃。新翻曲調聲摩空。使君一笑賜金帛。今年酒賽真珠紅。畫樓突兀臨官道。處處  
繡旗誇酒好。五陵年少事豪華。一斗十千誰復校。黃公壚下謾徜徉。何曾見此大隄倡。惜無顏公三十萬。  
往醉金釵十二行。

武林舊事行都官酒庫每歲清明前開煮。中秋前賣新。先期諸庫呈樣點檢所。所以呈府。既中擇日開沽。以白布三丈餘。揭竹竿頂。題曰某庫。選到酒匠某人。釀造上等醞辣無比高酒。三五人扶之而行。以鼓樂妓女雜技前導。聯纏穿市。觀者如堵。酒匠

則紫衣新巾乘馬從之。以府中所賞綵帛錢。

會銀碗。馱負馬前。謂之迎酒。楊炎正詩云云。

桂花

翠圍侍女擁紅幢。霞臉調朱笑額黃。共醉東君千日酒。更翻西母九霞觴。人間天上高低影。月下風前自在香。輸與廣寒宮裏客。年年綠鬢賞秋光。全芳備祖

蓮老寄龍涎香

瘴海驪龍供素沫。蠻村茉莉挹清滋。微參鼻觀猶疑似。全在爐烟未發時。翰墨大全

龐謙孺

謙孺字佑甫。籍之曾孫。南渡居吳興。有白蘋集。

奉使過汴京作

蒼龍觀闕東風外。黃道星辰北斗邊。月照九衢平似水。胡兒吹笛內門前。詩人玉屑

郊居九日

樹夾門方正。谿侵岸欲隕。水搖雲影動。風抑鳥聲回。籬缺舟常過。庭空客不來。故人經歲月。又見菊花開。前賢小集拾遺

時瀾

瀾號南堂。從學呂成公之門。

從先生明哲道中呈伯廣炳道

燕子楊花各自飛。雨乾溪路綠初肥。無人會得風雩意。可是千年瑟竟希。濂洛風雅



王子俊

子俊，字才臣，號格齋，廬陵人。周益公楊誠齋之客，以薦官成都帥幕。有三松集。

代漕使讌賀帥平蠻轉官樂語

紫橐仙人雲錦裳，碧油幢下受降羌。三邊外掃烟塵靜，一札中含雨露香。天上卽歸扶日轂，尊前莫惜醉霞觴。主賓情分今如許，飲罷相攜入帝鄉。三松集。

賀彥澤新得子

君不見白居易，五十八歲方得嗣。當時立名曰阿崔，香綳繡襦胎髮膩。又不見元微之，五十八歲方生兒。當時立名曰道保，可望成家得力時。西隣有親曰彥澤，天與明珠堪愛惜。今年年方四十三，甲庚少似唐元白。葛仙溪前燕子樓，燕子未老人風流。一年一度作湯餅，但願年年逢麥秋。翰墨大全。

句

大兒阻飢頗廢書，小兒忍寒粟生膚。婦縱有禪無一襦，不敢緣此相庸奴。題貧樂圖和徐思叔韻。鶴林玉露。

來 梓

梓、字子儀。

四朝聞見錄：來子儀與周洪道實布衣交。洪道爲樞使，子儀入都訪洪道，館于嘉會門外表忠觀，置酒極歡，示以近詩。子儀盡  
卷笑曰：周樞使詩也，非周洪道詩也。洪道問所以，子儀曰：昔徐師川少工詩，晚爲樞府，詩寢不逮。昔人以爲向來徐師川詩，後

自是徐樞使詩。

洪道笑而容之。

子猷訪戴圖

四山搖玉夜光浮。一舸玻璃凝不流。若使過門相見了。千年風致一時休。

杜甫遊春

典盡春衣不肯歸。熊兒扶道灑溪西。傷時懷抱深于海。掠眼風光醉似泥。以上前賢小集拾遺。

沈約之

挽張于湖

氣概凌雲孰敢先。中興事業冠英躔。朝廷議論一言定。翰墨風流四海傳。恰跨鼈頭升紫闥。忽騎箕尾上青天。竹林笑傲今陳迹。撫榭江臯涕泫然。錦繡萬花谷。

施士衡

士衡字德求。湖州人。嘗爲宣州簽幕。有同庵集。

挽張于湖

十年帥鉞倦馳驅。適意方謀一壑居。賈誼有才終太傅。薛收無壽處中書。傷心風月江山在。過隙光陰夢幻虛。紅紫飄零春色盡。後凋松柏獨蕭疎。錦繡萬花谷。

姜特立

特立字邦傑。麗水人。靖康中。父綬死難。補承信郎。孝宗召爲太子春坊。光宗卽位。除知閣門事。累官浙東馬步軍副總管。慶遠軍節度使。有梅山棗。續棗。

和陸放翁見寄

遙知三徑長荒苔。解組東歸亦快哉。津岸紛紛羣吏去。船頭袞袞好山來。平時佳客應相過。勝日清尊想屢開。若許詩篇數還往。直須共挽古風回。

和陸郎中放翁

午庭風雨撼高槐。一洗城頭十丈埃。老子坐閒尋句好。故人門外寄詩來。勁鋒久服穿楊妙。鈍思深慚擊鉢催。清佩左符君未可。要聽吟思發春雷。

寄汪尙書大猷

五十年閒歎闊疎。相忘兩地復江湖。書來筆底驚強健。詩去吟邊想步趨。好對青山看歌舞。莫嫌紅粉笑髭鬚。鳳毛已有哦松韻。尙記金華舊範模。

冬夜不寐

宵柝迢迢警睡魔。靜思甘分老林坡。忍胞向有稽康嬾。扣角曾無寧戚歌。不起妄心思世事。祇將閑意養天和。時人休說長生術。學著長生事轉多。

李仲永墨梅

寫竹如草書。患俗不患清。畫梅如相馬。以骨不以形。墨君曩有文夫子。蟬腹蛇跗具生意。當時一派屬蘇

公雨葉風枝略相似。花光道人執天機。信手掃出孤山姿。陳元幻卻西施面。此妙俗人那能知。近時賞愛楊補之。補之嫵媚不足奇。李生于梅卻有得。高處自與前人敵。倒暈疎花出苦心。暝雲暗谷藏春色。我一見之三歎息。意足不暇形模索。君若欲求之。點畫胡不去看江頭千樹白。

### 漁舍新成

旋規漁舍傍溪山。山轉溪迴翠竹閒。閑看羽觴行詰曲。戲拈竿線弄潺湲。浮家不入分風浦。歸棹休尋落照灣。漫說五湖烟浪好。幾人險處得心閒。以上梅山續稿。

### 方孝能

孝能、福州司理。

### 福唐元夕

街頭如畫火山紅。酒面生鱗錦障風。佳客醉醒春色裏。新妝歌舞月明中。  
薄薄春衫新繡金。樽前風細怯輕陰。酒香隱約生紅粉。正與桃花共淺深。  
燈外風搖沽酒旆。月中人數買花錢。少年心緒如飛絮。爭逐遺香拾墜鈿。淳熙三山志。

### 張履信

履信、字思順。號遊初。鄱陽人。侍郎南仲之子。嘗監京口鎮。官至連江守。

### 飛來峯

飛來何處峯。木杪夜千尺。愁猿喚不應。月色同一白。

冷泉亭

水石一闌干，僧歸四山靜。攜琴譜澗泉，月浸夜深冷。

翠微亭

朝朝烏北出，夜夜烏南歸。所謀在一食，所息在一枝。人生竟何得，與烏同此機。身世忽過慮，泉石良自怡。月上飛來峯，更誰登翠微。以上咸淳臨安志。

訪丹陽玉乳泉已變昏黑因賦詩淳熙十三年

觀音寺裏泉經品，今日唯存玉乳名。定是年來無陸子，甘香收入柳枝餅。游宦紀聞。

徐逸

逸字無競，號抱獨子，天台人。

仇遠稗史：徐抱獨少與朱文公爲友，公提舉浙東，日過其家，然燈夜話，至鐘鳴而別。公嘗托無競作謝恩表，書云：可放筆力稍低，使人見之無假手之議也。其推獎如此。

晝眠治平寺在西湖北山

頻年游覽不暫寘，野艇往來無水程。雨休最好是鷗浴，風靜更清聞鶴聲。酒家新熟欠前債，僧榻借眠餘宿醒。崧高泰華未挂眼，鬢影蕭颯難爲情。咸淳臨安志。

孤山

咸平處士風流遠，招得梅花枝上魂。疎影暗香如昨日，不知人世幾黃昏。全芳備祖。

蔡開

開字子明。崇德人。淳熙開進士。官至漕憲。弟闢字子正。慶元開進士。官至國子祭酒。

題資福院平綠軒

瞰水地仍敞。開窗望不迷。良疇連遠近。秀野混高低。曉起烟千樹。春耕雨一犁。道人深樂此。壤衲且幽棲。

至元嘉禾志。觀音資福院。在崇德院西南一里。西廡有軒。瞰流。扁平綠。陳炳退菴蔡開長齋武林莫若拙輔廣潛齋王用亨釣臺江表祖張揆敬齋長樂王益祥南豐曾揆茗水莫柯陸德輿魯齋皆有詩。

李安期

安期字泰伯。邵武人。以詩游江湖間。一日謁四川茶馬使王淮。淮將以賢良薦。因奕爭道。遂拂衣而去。

賦白鷺

漁父家風不設罾。錦鱗爲飯水爲羹。銀袍祇當蓑衣著。自在江湖過一生。邵武府志。

盧蹈

蹈字衷父。青社人。寓犍爲郡夾江縣。佳士也。

絕句

客懷耿耿自難寬。老傍京塵更鮮歡。遠夢已回窗不曉。杏花同度五更寒。放翁題跋。

應廓

廩、閩縣令

七夕

烏鵲成橋架碧空。人閒天上此歡同。仙查逐浪浮銀漢。青鳥傳音到帝宮。牛女佳期情不斷。古今遺恨意難窮。綵樓乞巧知多少。直至更闌漏欲終。淳熙三山志。

王佐才

佐才字呂輔。崇安人。少游邑庠。范汝爲叛。總義兵禦賊建陽。以功補承信郎。後爲吉州水軍統領。與賊魁殊死戰。中流舟壞而沒。吉人廟祀之。

荅秦兵部求墨竹

夜到茅亭近竹籬。影隨寒月下苔墀。吟餘未嬾蕭疎興。曾寫離披一兩枝。

贈徐子虛畫魚

我嘗放意游江湖。喜從釣叟觀真魚。有時臨溪行復坐。秋水無風魚自如。鮮鱗滑鬣隨上下。回旋戲躍形皆殊。兩兩相逢若對語。聚頭戢戢搖雙鬚。忽然散漫背游去。一半掉尾潛菰蒲。往來得所弄晴色。員波觸動生浮珠。困依垂楊看不足。盡日忘歸誰與俱。自從北走塵土窟。十年不復瞻蓴鱸。憑誰畫出江湖趣。東海今聞徐子虛。毫端奪得生時意。京師好事爭傳摹。寫成雙幅輒遺我。展舒活動驚堂隅。窮搜前古少奇筆。此本祇恐人閒無。任教澗轍強濡沫。對面相忘千里書。以上聲畫集。

陳國材

國材、廬陵人。

句

紅日晚天三四雁，碧波春水一雙鷗。

鶴林玉露云：周益

公楊誠齋盛稱之。

周 鄉

鄉、吳江縣尉。見陸游入蜀記。

三高亭懷范石湖

尊脆鱸肥酒細傾，浩歌悲壯欲誰聽。沈迷簿領頭將白，彈壓江山眼自青。魚躍紫鱗衝葦岸，鷗翻白雪下沙汀。西風散髮危亭上，醉倚豐碑照日星。百城煙水。

邵經國

經國、永嘉人。

上樓參政

聞道先生欲挂冠，先生幾日出長安。去時莫待淋頭雨，歸日須防徹骨寒。已遂平生多少志，莫令末路去留難。二疏畢竟成何事，留取他年作畫看。



吹劍錄。樓攻媿。既參大政。屢欲丐閑。  
至繪二疏。以見意。邵經國作詩云。

傅大詢

大詢字公謀。宜春人。

鶴林玉露。傅公謀。尤工作酸文。嘗作無遮榜語云。紅旗  
渡口。淒涼芳草夕陽天。白紙山頭。慘淡落花寒食節。

賀雨爲分宜宰許及之作

獅子關前半篆烟。二龍飛下卓篙泉。銀河掣電連宵雨。綠野翻雲四月天。便覺春生花一縣。會看秋熟米三錢。何時卓魯登黃閣。都與寰區作有年。袁州府志

劉鄂

鄂字國相。

讀許右丞翰所作陳少陽先生哀詞

并州更作桑乾客。道逢舍者來爭席。掀髯對坐有鉅人。開口劇談如舊識。試問客子從何方。興言扼腕微有傷。吾祖昔遑卹。緯計屢以直論干君王。譏諛弄國賢者避。禍福相乘呼吸異。懸知必有代庖責。被髮纓冠赴東市。大明既爭日月光。眞與天地同久長。嗟予之生後長者。卻識前輩奚其詳。大臣罔上擅行戮。揚以浮言蓋私曲。誅姦發德示後世。右丞之文端可復。中興名門凡幾門。聖朝報稱非少恩。芟蘭袖出承命

帖猶幸及識公之孫。春秋愛賢許之宥。十世已往未爲厚。況今公議方大明。叩天大叫君無後。故人夢想規大賢。仰止高山思執鞭。典刑方及見故物。條爾長別良依然。土田未足爲君勸。官爵未足酬君願。行矣志意勿倦遊。歸而視之有家傳。盡忠錄附

楊輔世

輔世字昌英。廬陵人。誠齋之族。

南溪

碧玉寒塘瑩不流。紅蕖影裏立沙鷗。便教不作南溪看。當得西湖十里秋。詩人玉屑

游開

開字子蒙。建安人。定夫從孫。

和劉叔通

昨夜劉郎叩角歌。朔雲寒雪滿山阿。文章無用乃如此。富貴不來爭奈何。邴鄭向嘗依北海。晁張今復事東坡。吹噓合有飛騰便。未用溪頭買釣蓑。

朱子語類云。詩須不費力方好。此等詩使蘇黃見之。定當賞音。

丁世昌

世昌字少明。號竹坡。黃巖人。

次虞仲房司馬送秋韻

自入秋光能幾時。無端又賦別秋詩。夜長月冷蟲鳴急。天闊風高雁過遲。三徑黃花存舊節。半欄紅葉墮殘枝。往來畢竟乘除法。何用年年宋玉悲。黃巖英氣

聞人滋

滋字茂德嘉興人嘗爲勅局刪定官。

陸游老學菴筆記嘉興聞人茂德老儒也喜留客食不過蔬豆而已郡人求館客者多就謀之多蓄書喜借人自言作門客牙充書籍行開豆腐羹店予少時嘗與之同在勅局爲刪定官談經義衮衮不倦發明尤多尤邃於小學云

早秋游靈巖

凭闌山翠溼濛濛。佛閣依然水殿風。欲採蓮花何處所。年年金井落梧桐。橋李詩繫

王用亨

用亨字子安自開封徙崇德淳熙閒進士分教襄陽。

平綠軒在資福院

禪窗虛敞瞰西南。野色溪光接畫簷。雲去碧天無閒斷。一眉依約見山尖。橋李詩繫

# 宋詩紀事卷五十八

錢唐 厲鶚 緝

德清 徐以坤 勘定

劉宰

宰字平國。金壇人。紹熙元年進士。調江寧尉。真州司法。寧宗朝。韓侂胄枋國。不復仕。自號漫塘病叟。寶慶初。除將作少監。進直敷文閣。知寧國府。不拜。卒。諡文清。有漫塘集。

北固山望揚州懷古

北固城高萬象秋。煙竿一縷認揚州。試乘綠漲三篙水。要見珠簾十里樓。淚溼宮衣朝霧重。愁薰寒草夕陽浮。隋隄舊事無人問。兩兩垂楊繫客舟。

秋懷

一抹紅綃日腳霞。千林暮靄納歸鴉。西風捲盡梧桐葉。乞與中庭散月華。

雲邊阻雨

薔薇籬落送春闌。筍蕙園林早夏閑。牛背牧兒酣午夢。不知風雨過前山。以上漫塘集。

張嗣古

嗣古宜春人。紹熙元年進士。歷起居舍人。中奉大夫。直龍圖閣。

仰山龍湫

崎嶇鳥道開烟蘿。長空偃蹇聲蕩摩。白龍怒吼挂絕壁。蒼兕離立迎清波。枯竹拄破青苔色。雷雨收功神斂迹。窮源不得空歸來。掬雪搏珠三歎息。

登妙高亭

雨餘山石洗孱顏。臥虎蹲羊各自閑。杖屨貪穿秋色好。不知衣惹蘚痕斑。以上袁州府志。

聶子述

子述字善之。建昌軍南城人。紹熙元年進士。嘉定中。四川制置使。曾以顯謨閣學士使金。卒諡文定。

曾公道夫出示先世手澤斂衽拜觀之餘敬題二小詩。嘉定壬午下元日。

香瓣平生滿意熏。更參曲阜問關津。祇宜黃閣官尊貴。不敢近前丞相噴。

一門翰墨森圭璧。諸老題評粲錦花。珍重雲仍好收拾。夜虹貫月定君家。鐵網珊瑚。

李稟

稟字季永。燾次子。紹熙元年進士。理宗朝。歷官同知樞密事。四川宣撫使。有悅齋集。

離巫山晚泊棹石灘下

黃昏風雨阻江濱。翠綰羣峯暮色勻。一夜子規啼到曉。孤舟愁殺未歸人。

上巳從史巫山祓飲江臯

風沙一夕卷冥冥。曉色瞳矇上翠屏。薄宦驅人成老大。佳時得酒慰飄零。紅餘晚樹迷幽谷。綠漲晴波失遠汀。卻是崇山兼峻嶺。看來渾不減蘭亭。以上全蜀藝文志。

詹義

義都昌人。紹熙元年進士。

登科後解嘲

讀盡詩書五六擔。老來方得一青衫。佳人問我年多少。五十年前二十三。清夜錄。

詹義

遊武夷

石廩巖前繫小舟。娟娟明月照清秋。仙人一夜吹長笛。三十六峯雲盡收。武夷詩集。

滕岑

岑字元秀。嚴州建德人。紹興乙卯領鄉薦。屢上南宮不第。紹熙元年。庚戌特奏名。仕爲温州平陽縣丞。有無所可用集。

方萬里序。回至郡。讀鈞臺集。見有日月色搖江如汞走。又有所謂

七里風煙萬里寬者。心異之。細視則郡人龍嶺老樵滕公作也。

嚴州府志。元秀平生苦吟。與陳垣相倡和。佳處自謂高視大歷十才子。詩凡三千首。趙汝歷知郡日。借其集不還。故傳者甚少。大抵皆江西體也。後宋景濂序睦州詩派。岑實與焉。

秋晚

槭械霜風勁。駸駸物象雕。屢遷憐蟋蟀。一敗笑芭蕉。林葉疎逾響。山雲薄易消。雖無遠行役。對此亦何聊。

瀛奎律髓

句

斷橋測水露半影。野渡攬泥留亂痕。拄杖送僧。嚴州府志。

鄭興裔

興裔字光錫。顯肅皇后外戚也。紹熙初知揚州。

瓊花

春晚驅車到古祠。看花復誦舊題詩。少年嘗記六七月。大暑曾開三五枝。醉酒輒來思往事。凭闌欲去立多時。八仙髣髴休疑似。相隔仙凡只一絲。瓊花譜

董道輔

道輔武陵人。于湖張孝祥門人。

紹熙庚戌中秋後三日拜于湖先生墓

曉出白下門。瘦馬踏秋色。鍾山度蒼翠。慰我遠游客。暮投清果寺。花草獻幽寂。長廊靜無人。落日照東壁。平生張于湖。萬里去一息。翩然九州外。汗漫跨鯨脊。乾坤能幾時。安用較顏跖。文章失津梁。所念斯道厄。夜闌耿不寐。搔首聽蕭瑟。懷人感西風。翁仲守孤柏。景定建康志

張 沔

沔字聲父，吳興人。紹熙二年發解。

詠苔梅

老龍全身著艾蒺，不耐久蟄潛擊空。爪頭撥動陽春信，香在霜痕雪點中。

題黃巖酒肆

東風吹雨水平沙，下卻籃輿訪酒家。行役不知春早晚，牆頭紅杏欲飛花。以上梅壩詩話。

歐陽謙之

謙之字希遜，廬陵人。學于朱子。

題睢陽五老圖款題紹熙壬子。

厚德良多積善根，賢才他日在兒孫。當知相里非凡壻，豈有陳平久席門。五老繪圖千載譽，羣公詩禮百年存。憑君挾取傳家學，青史賢良有後昆。鐵網珊瑚。

韓 梈

梈，蘄王世忠孫。紹熙初官直祕閣，知真州。

游洞霄宮

雲去山空鶴自來，天壇石室已蒼苔。洞前石鼓叩即應，巖上仙真挽不回。明月照人山霧合，東風吹溷野蘭開。高眠百尺長松下，閑看飛花落酒杯。洞霄詩集。



韓松

松、榭弟。

游棲真洞

黃冠具竹輿。邀我游棲真。山家雜水樹。野徑橫荆榛。長松臥蒼蛟。亂石錯紫鱗。委曲至洞府。積雪開雙門。結頂寶蓋高。下可容百人。神仙獨何之。碁局今猶存。翠子拂不落。衣袖生清芬。山門局未終。浮世三千春。安得從之游。一笑凌層雲。洞霄詩集

陸淞

淞字子逸。號雲溪。山陰人。官辰州守。放翁雁行也。

書舊續聞。陸辰州子逸。左丞相之孫。晚以疾廢。卜築于秀野。越之佳山水也。放做世間。不復有營念。對客則終日清談不倦。尤好語前輩事。

鄉校頌并序

鄉校。海鹽縣大夫能教育人材而成之也。

維鄉有校。示民有知。教始豫遜。迪于訓彝。維風化是禕。

維校在鄉。示民有防。入孝出悌。為忠為良。斯邦家之光。

鄉校有基。如德弗虧。劉侯遷之。魏侯新之。李侯能成之。

其遷者初。其新者中。肄業傳道。有師有宗。繫李侯之功。

樂只君子。孰後孰先。顯有嘉聞。於斯萬年。維大夫之賢。

鄉校五章章五句

海鹽縣圖經。李直養。字無害。維揚人。正民之孫。紹熙中。爲海鹽令。興學校。修大成殿。置書籍祭器。兼設小學。擇師教之。陸淞有詩。

陳亮

亮字同父。婺州永康人。淳熙中。詣闕上書。光宗紹熙四年。策進士擢第一。授簽書建康府判官廳公事。未至而卒。端平初。謚文毅。有龍川集。

及第謝恩和御製詩韻

雲漢昭回倬錦章。爛然衣被九天光。已將德雨平分布。更把仁風與奉揚。治道修明當正寧。皇威震疊到遐方。復讐自是平生志。勿謂儒臣鬢髮蒼。龍川集

梅花

疎枝橫玉瘦。小萼點珠光。一朵忽先變。百花皆後香。欲傳春信息。不怕雪埋藏。玉笛休三弄。東君正主張。全芳備紀

崔與之

與之字正子。廣州增城人。紹熙四年進士。理宗朝。累除廣東安撫使。拜參知政事。右丞相。致仕卒。累封南海郡開國公。謚清獻。有菊坡集。

送藥門丁帥赴召

議論方前席。功名早上坡。去帆瓜蔓水。遺愛竹枝歌。同志星辰少。孤愁暮雨多。倚風窮望眼。碧色淼平沙。

峽山飛來寺

萬里星槎海上旋。名山今喜得攀緣。猿揮孫恪千年淚。月照維摩半夜禪。磴長荒苔人跡少。厓攢古樹鶻巢懸。江流上溯曹溪水。時送鐘聲到洞前。以上菊坡集。

孫伯溫

伯溫字南叟。豐城人。紹熙四年進士。知臨湘縣。

游麻姑山瀑布泉

九官守不嚴。失卻兩玉龍。塵世著不得。忽來此山中。雷電白日閒。冰雪詩人胸。天公不汝尤。爲人作年豐。

娛書堂詩話麻姑山瀑布分作兩派而下灌漑甚廣豐城孫南叟嘗賦古風云甚有西江體

馮多福

多福常州人。紹熙四年進士。寶慶中以直寶謨閣出守鎮江。

鶴林寺

春郊躬勸相。稅駕擬禪關。院古深藏竹。堂虛淨對山。日曛農父醉。雲伴老僧閑。暇日還攜茗。同來淪虎斑。

鶴林寺志

喬行簡

行簡字壽朋。婺州東陽人。紹熙四年進士。理宗朝。拜左丞相。平章軍國事。封肅國公。及請老。加少保。保寧軍節度使。醴泉觀使。封魯國公。卒。贈太師。諡文惠。有孔山集。

池荷

萱草軒窗處處幽。酒中不著客中愁。芭蕉葉上無多雨。分與池荷一半秋。全芳備祖。

游三丘山

在東陽縣南晉義熙間殷仲文爲東陽守嘗登此山後人思之若襄陽之羊祜故又名峴山。

疑是乘風到九天。不知身在此山巔。萬家攢簇炊煙底。一水縈紆去鳥邊。便覺塵緣輕似羽。何妨詩思湧如泉。停杯更待林梢月。歸去家僮想未眠。東陽縣志。

程瑛

瑛字懷古。休寧人。先世本洛州。自號洛水遺民。紹熙四年進士。理宗朝。累官禮部尚書翰林學士。知制誥。歷端明殿學士致仕。卒。贈少師。有洛水集。

流觴西湖用范左史韻

畫船同載若登仙。卻笑泥羈馬不前。要識冷烟催穀雨。須知澹日養花天。千條翠柳隨風舞。一樹夭桃照水妍。始信人生行樂耳。虛名那用世閒傳。

出南郊清甚

春風吹屣到南園。著酒塗酥花正繁。更喜滿前無俗物。橫塘疎竹渭南村。以上洛水集。

句

黃麻芳草罷紅藥正花翻。省試紅藥當階翻詩。 吹劍錄。

許景迭

景迭，舊名闕，山陰人。紹熙癸丑進士。有野雪吟豪。

詠虞美人草

合歡枝葉想腰身，不共長安草木春。若聽楚歌能楚舞，未央空有戚夫人。全芳備祖。

詠菱

翠葉森森劍有棱，柔條鬆甚比輕冰。江湖若借秋風便，好與蓴鱸伴季鷹。蘇州府志。

句

野店青窺戶，春船綠漲篙。梅磻詩話。

周 燁

燁，字昭禮，邦之子。樞密麟之之族姪。南渡寓居臨安府之清波門。著清波雜志。曰瑄按今刊本清波雜

志作燁，舊本有紹熙四年張貴謨序，書中俱作燁，宜從之。

句

捲簾試約東君問，花信風來第幾番。春詞 清波雜志。

尹德鄰

德鄰字直卿永豐人紹熙中太學生

問寢龍樓曉

父母人皆有儀刑自冕旒問安趨燕寢拂曉過龍樓鶴駕嚴晨衛雞人徹夜籌慈闈天語接飛棟月華收  
萬姓齊歌舞三宮款獻酬小儒憂國切幾白九分頭

鶴林玉露光宗以疾不能過宮德鄰初參太學簾

引詩題出問寢龍樓曉詩成學官擊節人皆傳誦

周震

震紹熙中知泉州惠安縣

春月勸農至華林寺

飛廉怒見海天明十里籃輿出勸耕隴麥低頭須雨意林花仰面笑春晴熙寮連轡勤因事父老傳杯識  
至情及物無功慚竊廩豐年有願是忠誠泉州府志

馮椅

椅字奇之都昌人紹熙四年進士充江西運司幹辦公事攝上高令

詠歸亭任筠州上高縣

弓轉寒溪月一灣下臨虎豹踞爛斑林烟闊處飛層閣雲影窮頭護遠山衿佩光陰弦誦裏丹青人物畫  
圖閒紅塵堆案那能到只有漁船自往還瑞州府志

俞灝

灝字商卿。世居杭。紹熙四年進士。歷磨節皆有聲。寶慶二年致仕。築室九里松。自號青松居士。有集。

武康道中

竹窗聽雨自安眠。不道驚湍近屋前。省得去年桃葉渡。水痕祇到樹旁邊。前賢小集拾遺。

湖隄晚行

暝色俄從草色生。管弦羅綺盡歸城。不應閑卻孤山路。我自扶藜月下。行。咸淳臨安志。

孫惟信

惟信字季蕃。號花翁。開封人。居婺州。光宗時棄官隱西湖。有集。

文獻通考陳氏曰。花翁在江湖頗有標致。多見前輩。多聞舊事。善雅談。長短句尤工。

劉後村花翁墓誌。季蕃貫開封。少受祖澤調監當。不樂棄去。始昏于婺。後去婺游。留蘇杭最久。一榻之外無長物。躬爨而食。書無乞米之帖。文無逐貧之賦。終其身如此。名重江浙。公卿聞花翁至。爭倒屣。所談非山水風月。一不挂口。長身緼袍。意度疎曠。見者疑爲俠客異人。其倚聲度曲。公瑾之妙。散髮橫笛。野王之逸。奮袖起舞。越石之壯也。

賦女冠還俗

疊卻霞綃上醮衣。女童鬢髻綠楊垂。重調螺黛爲眉淺。再試弓鞬舉步遲。紫府烟花鶯喚醒。丹房雲雨鶴通知。簾低紅杏春風暖。清夢應曾見舊師。詩人玉屑。

垂絲海棠

嬾嬾垂絲不自持。更禁日炙與風吹。仙家見慣渾閑事。乞與人閒看一枝。後村千家詩。

禪寂之所有賣花聲出廊廡閒清婉動耳

曲巷深房憶帝州。賣花庭宇最風流。窗紗破曉斜開扇。簾繡籠陰半上鉤。少日喜拈春在手。暮年羞戴雪盈頭。泉南寺裏蕭蕭雨。婉婉一聲無限愁。詩家鼎鑪。

劉過

過字改之。號龍洲道人。吉州太和人。嘗伏闕上書。請光宗過宮。復以書抵時宰。陳恢復方略。不報。放浪湖海閒。有龍洲集。

多景樓關禱乙丑作。

金焦兩山相對起。不盡中流大江水。一樓坐斷天中央。收拾淮南數千里。西風把酒閑來游。木葉漸脫人閒秋。關河景物異南北。神京不見雙淚流。君不見王勃詞華能蓋世。當時未遇庸人耳。翩然落托豫章游。滕王閣中悲帝子。又不見李白才思眞天人。時人不省爲謫仙。一朝放跡金陵去。鳳凰臺上望長安。我今四海游將徧。東歷蘇杭西漢沔。第一江山最上頭。天地無人獨登覽。樓高意遠愁緒多。樓乎樓乎柰爾何。安得李白與王勃。名與此樓長突兀。



題謝耕道一犁春雨圖

阿耘無田食破硯。養親日糴供朝飯。凝塵壁上挂瓶罌。寒日窗前照藜莧。汝父訓汝汝當知。有田無田未可期。有田不耕汝嬾病。無田說田眞畫餅。畫田之外更畫牛。捕風捉影何時休。頭上安頭又詩軸。全家不應猶食粥。

寄湖州趙侍郎

桑柘村村烟樹濃。新秧刺水麥梳風。舟行苕雪雙溪上。人在蘇杭兩郡中。鼓角麗聲喧日暮。旌旗小隊閒青紅。主人夙有神仙骨。合住水晶天上宮。以上龍洲集

賦羊腰腎羹

拔毫已付管城子。爛胃曾封關內侯。死後不知身外物。也隨樽俎伴風流。

挽張魏公

背水未成韓信陣。明星已隕武侯軍。平生一點不平氣。化作祝融峯上雲。

山房隨筆辛稼軒帥浙東時晦菴南軒任倉憲使劉改之欲見辛不納二公爲之地云某日公宴至後筵便坐君可來門者不納但嗔呼之必可入既而改之如所教門下果誼譚辛問故門者以告辛怒甚二公因言改之豪傑也善賦詩可試納之改之至長揖公問能詩乎曰能時方進羊腰腎羹辛命賦之改之對甚寒願乞卮酒酒罷乞韻時飲酒手顫餘瀝流于懷因以流字爲韻卽吟云云辛大喜命共嘗此羹終席而去厚餽焉席散南軒邀至公解置酒語之曰先君魏公一生公忠爲國功卮于命

來挽者竟無一章得此意願君有意爲發幽潛改之卽賦一絕云云南軒爲之墮淚今龍洲集中不見此二詩豈遺珠耶

朱晞顏

晞顏字子困。新安人。慶元中廣西漕使。

慶元改元寒食日陪都運寺丞遊白龍洞時牡丹盛開小酌巖下夕陽西度並轡而歸  
小溪漱碧響潺潺路入龍宮杳靄閒佳節漫添新白髮故人賴有舊青山花朝幾共湘南醉萍迹何年嶺  
北還歸路聯鑣紅日晚多慚龍臥白雲閒粵西詩載

白嶽寄懷

林閒留我住多時似與烟霞夙有期野老烹茶來獻客巖猿偷果去呼兒靜思世上千年事不值山中一  
局碁欲說行藏舒卷意洞天惟有白雲知齊雲山志

鄒應龍

應龍字景初邵武軍太寧人慶元元年進士第一理宗朝累官端明殿學士簽書樞密院事知慶  
元府兼沿海制置使

遊寶蓋巖

夙有斯巖約今朝喜踐盟路從支澗入人在半空行六月如霜候四時長雨聲願求容膝地著我過浮生  
邵武府志

林士表

句

有書來進御。無語不關農。進農書。

陳伯震

句

修眉濃淡裏。寸碧有無閒。開簾出遠山。

鄧伯秀

句

在我時舒卷。從他自去留。鉤簾宿鷺起。

朱縉

句

冰玉詞新吐。塵埃氣不留。清文嬾皇猷。

陳瑄

句

似嫌秦閣小。欲際楚天浮。風幔不依樓。

吹劍錄。省題詩雖場屋末技。閒有以此見長。如林士表諸人句。皆主司所刮目。

鷓按以上皆南宋中葉人，不可詳其次第，姑附于此。

羅椿

椿字永年，自號就齋，廬陵人。楊誠齋高弟。

寄楊誠齋慶元初，誠齋與朱文公同召，誠齋力辭。

不愁風月祗憂時，髮爲君王寸寸絲。司馬要爲元祐起，西樞政坐壽皇知。苦辭君命驚凡子，清對梅花更與誰。夢繞師門三稽首，起敲冰硯訴相思。

送永豐汪令

錦纜梅花浦，江南作縣歸。新來薦鶚牘，驚動袞龍衣。歲晚情難別，心親事卻違。恐君天上去，扶病出烟霏。

露溼看花腳，鶯啼欲曉山。春消千嶂雪，清逼五湖秋。以上鶴林玉露。

林亦之

亦之字學可，號月漁，福清人。林光朝嘗講學莆之紅泉，及卒，學者請亦之繼其席。趙汝愚帥閩，嘗以亦之行業上于朝，未幾卒。學者稱網山先生。景定閒，諡文介，贈迪功郎。有集。日瑄按明王應山云：縣志贈官不言賜諡，三山續志稱文介先生，蓋私諡也。

劉後村跋網山律詩

高妙者絕類唐人

題林稚春菊花枕子歌

故人所說菊花枕。似把冰丸月下飲。秋水一雙明炯炯。數在青囊第一品。狂風江上吹蒹葭。往往得之嵇阮家。閉門讀書二十載。眼睛損盡生空花。建陽小作箸頭書。殘更燈火亂蟲魚。石渠文字大如斗。場屋歲月又不偶。卻來南山青草邊。東西盡爲菊花田。手提長筐向山曲。一下收拾三百斛。昨者昏迷才起來。解把蠅頭小字讀。乃知妙物通羣仙。一切藥裹應棄捐。

丁亥九月十六夜。偕李監倉宿龍臥山中。聽雨看月。同時事也。所謂魚與熊掌兼得之。賦詩一篇。以紀其事。

相喚此山來。狂風吹我衣。把酒桂花下。山雲片段飛。掩門雨初滴。開門月還上。倚門看月明。半山聞雨響。人閒有佳景。詩句頗發越。何曾似今夕。聽雨還看月。

九日下水口

黃花時候苦思鄉。急水還家一日強。不道南風打頭上。客船搖櫓作重陽。

寄表弟章由之爲理曲堆屋廬

苦來爲客竟何爲。宅舍荒村誰與治。別墅雖無輞川畫。生涯堪入杜陵詩。身如燕子年年去。家似漁舟處處移。丹井西頭曲堆下。更煩歲晚定疎籬。

輓光澤朱君

諱養字師賢

諸老蕭蕭似卷塵。不堪再見素旌新。白頭縣尉笞笞浦。夜雨寒窗是舊人。以上網山集。

曾從龍

從龍字君錫，晉江人。公亮四世從孫。慶元五年進士第一。累官知樞密院事，兼參知政事。卒，贈少師。

題衢州順溪館

紅照西沈暫解鞍，偶然假館豈求安。新豐獨酌誰爲侶，坐對窗前竹一竿。

娛書堂詩話：曾參預從龍赴省時，館于衢之順溪，題一絕云云。識者已疑之矣。是年竟至大魁，致身政府，至今其館扁爲狀元。

魏了翁

了翁字華父，號鶴山，邛州蒲江人。慶元五年進士。理宗朝，累官簽書樞密院事，改資政殿學士。福州安撫使，卒，贈太師，諡文靖。有鶴山集。

題謝耕道一犁春雨圖

牀頭夜雨滴到明，村南村北春水生。老婦携兒出門去，老翁赤脚呵牛耕。一雙不借挂木杪，半破夫須衝曉行。耕罷洗泥枕犢鼻，臥看人閒蠻觸爭。

題上亭驛

紅錦綳盛河北賊，紫金盞酌壽王妃。弄成晚歲郎當曲，正是三郎快活時。

十二月九日雪融夜起達旦

原注：俗所謂快活三郎者，即明皇也。

遠鐘入枕報新晴，衾鐵衣棱夢不成。起傍梅花讀周易，一窗明月四簷聲。

梅磻詩話後二句寄

與高遠人所傳誦

### 紫宸殿御筵卽事

峨眉班捲戴花回，遙望君王玉色開。畫楯諸班謝茶酒，尻高首下一聲雷。以上鶴山集

### 題米南宮雲山圖

漠漠雲林小小山，誰家茅屋隱松閒。石橋雨過天台遠，采藥仙人去未還。式古堂畫考

### 盧祖臯

祖臯，字申之，又字次夔，號蒲江。永嘉人。樓攻媿甥。慶元五年進士。嘉定中，爲軍器少監，權直學士院。

貴耳集：蒲江貌字修整，作小詞纖雅。詩如舟中獨酌云：山川似舊客，懷老天地何言春事深。及玉堂有感松江別詩，余領先生詞外之旨。

黃玉林云：蒲江乃趙紫芝翁靈舒諸賢之詩友，其詞甚工，字字可入律呂，浙東西皆歌之。

### 玉堂有感

兩山風雨故留寒，九陌香泥苦未乾。開到海棠春爛漫，擔頭時得數枝看。

松江別詩

明月垂虹幾度秋。短篷長是繫人愁。暮烟疎雨分攜地。更上松江百尺樓。以上賈耳集。

廟山道中

粉黃蛺蝶遠疎籬。山崦人家挂酒旗。細雨嫩寒衫袖薄。客中知是菊花時。梅磻詩話。

醱醑

雪榦雲條一架春。酒中風度夢中聞。春風不是無顏色。過了梅花便是君。全芳備祖。

讀書

細字燈前老不便。小齋新冷夜無眠。數聲牆竹蕭蕭雨。一縷銅爐淡淡煙。

種橘

小壁枝頭滿袖香。纍纍秋實正宜霜。每來長是移時去。爲爾風流似故鄉。以上僧居簡北磻集附。

雨後得月小飲懷趙天樂

梅花此夜稀。嘉月弄光輝。不飲強呼酒。欲眠重啓扉。語高驚鶴睡。坐久見烏飛。想見湖居友。扁舟不肯歸。

東甌詩集

周師成

師成字宗聖。號雉山。長興人。慶元五年進士。



貴耳集宗聖少年秀麗。讀書善記。議論古今。落落可聽。有詩高遠。愛作選格。仕不得志。晚年若有所遇。如遊仙散聖之徒。

梅

采采芳梅枝。瑣碎白雲姿。在山千花怨。出山百鳥啼。操持思所寄。轉趾述所思。清披太始風。寒應太虛月。一日拂人衣。三歲香不歇。貴耳集

敖陶孫

陶孫字器之。長樂人。慶元五年進士。官泉州簽判。有臞翁集。

次韻馮孔武雪中簡聞人簿乞炭

君不見朱門煌煌多近臣。豹胎猿麋蠟爲薪。庭中盛設潑寒戲。炙手欲近還噴人。誰知曝背茅簷下。欲獻要是山林真。兒童抑搔皮肉輒。日輪過中方欠伸。懸鶉結駟兩相笑。百年俱成一窖塵。先生自是冷官樣。要看入火紅麒麟。撚鬚自作詠雪句。祕思早與相如親。蒲團擁裘結僧坐。別有絺綌君南鄰。願迴六龍照后土。施與萬國無邊春。屑瓊鏤玉入肺腑。拍手一笑吾未貧。

奉寄旌德尉劉申之

諸劉兄弟賢。一一無可選。竹林銳頭郎。風味吾小阮。平生天機深。善閉得內健。邇來卿何曹。不辦折腰本。稍傳詩語東。朝日照蘭畹。伊余戰紛華。心旆凡幾偃。劃逢君家語。雋永初一巒。識遺飽新得。友勝悟夙損。緬懷歌商地。蕭瑟松湖遠。陰陰蕪菁花。碧蜺相與晚。是中著高士。物意自假蹇。向來白衣宰。雲壑論補袞。

優游濟艱難。如以禹代鯀。劉郎秀眉宇。秋隼立高巘。端能謝師匠。萬卷自鉏墾。時須閱世諦。一及城門窺。功名頭上簪。日月風中憶。何時會吳下。春動長洲苑。以上龐翁集

### 題三元樓壁

左手旋乾右轉坤。如何羣小恣流言。狼胡無地居姬旦。魚腹終天弔屈原。一死固知公所欠。孤忠幸有史長存。九泉若遇韓忠獻。休道如今有末孫。

四朝聞見錄。慶元初。韓侂胄既逐趙忠定。太學諸生敷陶孫賦詩于三元樓云云。方書于樓之木壁。壁已不復存。陶孫知捕者至急。更行酒者衣持煖酒具下。捕者與交臂。問放上舍在否。對以若問太學秀才耶。欲方酣。陶孫亟亡命歸走闕。後登乙丑第。

### 西樓

祇有西樓日日登。闌干東角每深凭。一層已是愁無柰。想見仙人十二層。後村千家詩

### 蘇大璋

大璋字顥之。古田人。慶元五年進士。官著作佐郎。出知吉州。

鳳獅峯在古田縣五花石。

早起聯鑣上翠微。瞰虛歷級步嶽嶷。昔聞華頂蓮生藕。今見南山菊滿籬。縱眼橫看天地闊。壯懷唯有鬼神知。安期引我丹霄路。十里雲烟特地披。福州府志

### 眞德秀

德秀字希元。浦城人。慶元五年進士。中詞科。紹定中。拜參知政事。進資政殿直學士。提舉萬壽觀。

卒諡文忠。學者稱西山先生。有集。

挹仙亭

漢宮葦篋兒呱呱。濟南梓柱陰扶疎。富平家人正媮樂。安昌帝師工獻諛。子真東南一尉耳。黃綬淒涼百僚底。手持短疏叩天關。義激丹衷淚橫背。翩然一朝徑拂衣。愛君無路空依依。人傳九江已仙去。吳門再見是邪非。神仙茫茫那可測。上帝從來賞忠直。天上果有驂鸞人。合領羣真朝北極。自從舉手謝世閒。千年白鶴何時還。玉簫聲斷杉檜冷。祇餘丹竈留空山。谷口之孫古膚使。亭斲青冥挹仙袂。耿耿應懷貫日忠。飄飄那羨凌雲氣。我來快讀華星篇。清徹毛骨風泠然。何當結屋最高頂。一榻容我分雲烟。

會長沙十二縣宰作

從來守令與斯民。都是同胞一體親。豈有脂膏供爾祿。不思痛癢切吾身。此邦祇以唐時古。我輩當如漢吏循。今日湘潭一卮酒。直須散作滿懷春。

蓉塘詩話。西山

先生帥潭時作。

皇后閣端午帖子

記得當年夢月符。浴蘭節後恰旬餘。欲知天錫無疆壽。認取仙螭頷下書。瑤池十丈藕花香。清賞尤便水殿涼。聞說內家多樂事。前星親自捧霞觴。

贈張童子

虎頭燕頤及鳶肩。自笑都無一事全。惟有數條瓜樣骨。尙堪山澤作臞仙。如瓜骨出人倫書。  
聞君早號張童子。顧我初非韓退之。可惜浪拋洙泗業。祇看風鑑學希夷。以上西山集。

易 祓

祓字彥章。潭州人。第進士。開禧官左司諫。

浯溪中興頌

湘江東西直浯溪。上有十丈中興碑。誰鑿豐碑鎮山曲。溪邊美人美如玉。想當歌頌大業時。胸蟠星斗光陸離。蠶頭蝨尾更清勁。凜凜襟懷冰雪瑩。水部之文魯公書。兩翁寥寂千載餘。後來更有黃太史。健筆題詩起翁死。一派溪流徹底清。溪邊鏡石堅而明。我思古人不可見。水石猶作瓊瑰聲。偶來真仙訪遺跡。烟雨淒迷山路溼。野叟蒙頭看打碑。君其問諸水邊石。浯溪集。

葉秀發

秀發字茂叔。金華人。慶元進士。知休寧縣。

題龍吟寺

曉色愁征轡。疎鐘忽斷林。荒溪窮虎跡。古寺到龍吟。竹影殘燈暗。苔痕落葉深。客懷無共說。敲枕聽霜砧。  
黃山志。

吳 豐

豐官韶州經幹。

贈胡彥忠

古羊人物舜風餘。子姓傳來祗舊廬。爲愛一門能守義。相承五世不分居。

廣東通志。胡彥忠。曲江人。五世同居。慶元己未。經幹吳豐。假宿其家。深加獎歎。爲言于臺闕。列上其事。旌表其門。

俞成

成字元德。東陽人。著螢雪叢說。慶元庚申自爲序。

題釣臺

千古英風想子陵。釣臺緣此幾人登。誰知避諱更嚴氏。灘與州名總誤稱。

螢雪叢說。嚴子陵本姓莊。避顯宗諱。遂稱嚴氏。若釣臺。若七里灘。亦皆以嚴命名。無非循習之訛。而莫知其非也。宣和閒。方臘寇江浙。改睦州爲嚴州。蓋本于此。至如范蔚宗。操東漢之史筆。初不究其姓氏之由。遽曰嚴光而傳之。無乃以田千秋爲車千秋乎。

黃元夫

句

葦村風下鴉千點。麥隴天垂月一梳。螢雪叢說。

王廉清

廉清、字仲信。汝陰人。雪溪先生銓長子。問學該博。與弟明清齊名。著有京都歲時記。廣古今同姓名錄。補定水陸章句。新乾曜真形圖。

題玉霄亭 在台州子城上。曾守絃父建。絃父廉清之舅氏也。

憶昔新亭敞玉霄。使君髯舅意飄飄。春風激灑黃金棧。明月參差紫玉簫。歌吹舊蹤空草木。風流閑話屬漁樵。凭欄無限淒涼意。寂寞寒江落暮潮。赤城志。

王明清

明清、字仲言。汝陰人。雪溪先生銓之次子。慶元閒。寓居嘉禾。官泰州倅。著有揮麈三錄。玉照新志。投轄錄。清林詩話。

句

淒清寶鈿初分處。愁絕清光欲破時。

玉照新志。紹興閒乙卯。張安國爲右史。明清與仲信兄鄭舉善郭世禎李大正李泳多館于安國家。春日同游西湖。至普安寺。于窗戶閒得玉鈿半股。青蚨半文。想是游人歡洽所分授。偶遺之者。各賦詩以紀其事。明清云云。

葉樾

樾慶元初。監海鹽澈浦鎮稅。

三里塘搯梅

扶疎不耐繁華。意足自然清絕。壁閒幻出橫斜。祇欠紗窗明月。澈水志。

孔夢斗

追詠鄒道鄉所植揚州學四柏

道鄉採芹暇。手植四株柏。相對有真味。愛此歲寒格。忠言賈奇禍。幾削諫臣跡。柏亦助道鄉。每號風雨夕。柏死公不死。大名日皦白。後人補種之。存棠思召伯。亭亭儼相持。撐雲空百尺。是柏出雖晚。風致猶古昔。我來跋遺芳。清坐假一席。徘徊意難捨。猛把闌干拍。寄語景行人。用意謹勿窄。維揚志

倪 屋

屋淮南節度判官。

追詠鄒道鄉所植揚州學四柏次前韻。

斯文以道重。所取不但柏。借彼剛特姿。昂然見標格。歲華閱如流。蒼髯尙陳跡。田晝亦奇士。三歎子革夕。人生運窮達。敢愛母頭白。泠泠清風閒。媿死幾侯伯。誰歟繼遺響。高臥樓百尺。袖攜萬斛珠。一笑俯今昔。知心古槐樹。交蔭上簾席。大開多士鑪。詔竽辨節拍。所養貴所用。量廣滄海窄。維揚志

薛 真

真字持志。明州昌國人。慶元五年進士。調衡陽簿。

洩潭瀑布

秋高水壯雪飛濤。巖木招風怒竅號。不是玉虹低澗飲。白龍拖雨下山腰。大德昌國州志

# 宋詩紀事卷五十九

錢唐厲鶚輯  
錢唐金肇鑾勘定

鄭域

域字中卿。號松窗。三山人。慶元中。曾隨張貴謨使金。著燕谷剽聞二卷。官幹辦行在諸軍糧料院。

玉蕊花

維揚后土廟瓊花。安業唐昌宮玉蕊。判然二物本不同。喚作一般良未是。瓊花雪白輕壓枝。大率形模入仙耳。山谿野路多見之。樵斧摧殘如獼薙。比之玉蕊似實非。金粟冰絲那有此。花鬢中有碧膽瓶。別出玲瓏高半指。清馨靜夜衝九天。招隱瑤臺女仙子。乘風躍馬汗漫遊。偷折繁香分月姊。紫莖柘葉荼蘼條。少到尋常人眼底。翰林內苑集賢閣。雨露承天近尺咫。後人不識天上花。又把山礬輕比擬。葉酸而澀供染黃。不著霜縑偏入紙。江鄉老少知此名。鄭榕瑒音無正字。方言土諺隨舌訛。烏馬成焉固應爾。

山丹

團纒絳蕖發枝閒。鉛鼎成丹七返還。乞與幽人伴幽壑。不妨相對兩朱顏。以上全芳備祖。

黃楊巖

暮秋訪幽隱。謝屐凌崩空。行到山根門。還與平地同。舉手扶層雲。下視無高峯。疎藤挂赤蚪。枯苔糝青茸。



回首三神山。縹緲滄海東。指點笑語高。吹聲半天中。安得大鵬背。載我遊無窮。延平府志。

林 嶼

嶼、三山人。右科首選。慶元中。以閣門舍人守潮州。

題觀稼亭

在潮州西北一里湖山下。唐貞元間御史中丞李宿建。

咫尺移文喚卽磨。此亭便可配韓亭。溪流橫過一灣碧。山色平分兩岸青。落日鐘聲鳴遠樹。半空塔影倒寒汀。雲烟滿目皆親種。留與邦人作畫屏。廣東通志。

呂祖儉

祖儉字子約。成公弟。用父蔭入官。爲太府丞。疏論韓侂胄。安置韶州。改吉州。量移筠州。卒。理宗朝。賜諡曰忠。有大愚叟集。

泛舟至竹洲

沈煥叔晦所居。

朝光拍天浮竹洲。隱然一面城之幽。中有高士披素裘。我欲從之恐淹留。探囊百金辦扁舟。又煩我友著意修。微風一動生波頭。飛棹來往倦則休。兀兀坐曹如繫囚。吏餘祇有萬斛愁。一生安坐無幾求。今日棲遲如置郵。脫帽露頂固狂流。俯首折腰亦可羞。誓將入海登之罍。棄置人間繞指柔。蒼然暮色下羊牛。出處語默兩悠悠。九原可起柳柳州。燕坐相與未始遊。至正四明續志。

題史子仁碧泚

相家小有四明山。更葺桃源渺莽閒。四面樓臺相暎發。一川烟水自灣環。

中川壘石勢嵯峨。城外遙岑聳翠螺。舊說夕陽無限好。此中更得夕陽多。

寧波府志。子仁。名守之心。非叔父。彌遠所爲著昇聞錄。以寓規諫。避勢遠嫌。退處月湖。與慈湖諸公講肄。爲樂寧宗御書。碧泚字賜之。

呂祖异

祖异。東萊人。

呈洞霄孫元素

匹馬先來破曉雲。千章喬木翠繽紛。山圍道院窗窗見。泉出丹池處處分。酒好便能澆魂魄。飯香何必御羶葷。明朝又踏紅塵去。多羨烟霞總屬君。洞霄詩集。

張震

震字東父。號無隱居士。蜀之益寧人。慶元中知湖州。除福建提刑。

遂寧府作

春苗半沒脛。社酒期滿腹。肩輿太守醉。燈火歸騎趣。唯有漢月明。依然照山曲。方輿勝覽。

錢鞚

鞚慶元開衡州守。趙忠定汝愚謫永州。至衡道病。鞚窘之。暴薨。天下聞而冤之。

次袁尙書巫山十二峯二十五韻

文昌仙伯天人姿。愛山尋勝如書癡。忽摩台符歷參井。麾幢泝峽春遲遲。山林川后總效職。萬壑千巖俱

獻奇就中巫山絕雄勝。插天紫翠相參差。神妃來下佩聲遠。駐此名地相安之。峯旋地轉自前後。屹立萬馬如追隨。兩山有川幻天巧。禹功到此神應疲。仰天照眼如疋練。舟行掣電翻雲旗。迅帆競惜峯巒過。餘艎望眼裳褰帷。懸崖下有欲落石。古木上有參天枝。龍登鶴聚仙既集。雲昇雨暗天如低。從來三峽號至險。高牙穩泛相遊嬉。揚旌一覽天下勝。詞源倒峽知優爲。嘗聞奇觀天亦惜。遇賢輒與因其時。少陵寓此雖窮寂。妙語驚人多在茲。彫鑿萬象發天闕。衙官屈宋聲爭馳。公今曳履星辰上。調元妙手行將施。天教來作東道主。歡聲和氣生江湄。公來頓覺雪山重。青城增氣連峨眉。首驅巫陽入新句。一洗前作堪解頤。英詞從此徧蜀道。迥出塵表無纖縑。嘗憂此地難久駐。轉首絕景成嗟嘻。直欲使拂素練圖翠巖。寫松巒起雲之狀。模翠屏栖鳳之帽。終朝誦公有聲畫。卻來看此無聲詩。全蜀藝文志

趙蕃

蕃字昌父。暘之曾孫。其先鄭州人。南渡寓信州之玉山。用蔭入仕。監衡州安仁贍軍酒庫。理宗立。除太社令。不拜。轉承議郎。直祕閣致仕。卒諡文節。有章泉集。

劉漫塘志墓云。先生在太和。便座有齋。榜曰思隱。蓋當策仕之初。已有山林之思。在官清若。唯以賦詠自娛。以是受知于吉之鄉先生楊公萬里。贈詩有云。西昌主簿如禪僧。日澹秋菊嚼春冰。又云。勸渠未要思舊隱。且與西昌作好春。又贊云。貌恭氣和。無日下推敲之勢。神清骨聳。非山頭瘦苦之容。一笑詩成。萬象春風。

劉後村跋云。近歲詩人。唯

趙章泉五言有陶阮意。

挽趙丞相汝愚

五王不解去三思，石顯端能殺望之。未到涪溪讀唐頌，已留衡嶽伴湘纍。生前免見焚書禍，死後重刊黨籍碑。滿地蒺藜誰敢哭，漫留楚些作哀辭。方輿勝覽

蒼施榮甫

昨韻村中好客希，今吟臨水送將歸。笑談未了風吹斷，何日重來款竹扉。詩家鼎鑪

上巳

朝來一雨快陰晴，東郊百鳥閒關鳴。受風柳條不自惜，蘸水桃花可憐生。不見山陰蘭亭集，況乃長安麗人行。東西南北俱爲客，且送江頭返照明。瀛奎律髓

哭蔡西山

鵲叫春林復遞詩，雁回霜月忽傳悲。蘭枯蕙死迷三楚，雨暗雲昏礙九疑。早歲力辭公府檄，暮年名與黨人碑。嗚呼季子延陵墓，不待錢辭行可知。

柳溪詩話。朱晦菴書西山墓碣云。嗚呼有宋蔡李通父之墓。效夫子之書延陵墓也。當時哭詩推此篇爲首。

句

青雲道遠龍媒老，白雪詞高鬼膽寒。贈阮梅峯。桐江文集。

韓 澗

灑字仲止元吉之子有高節從仕不久卽歸信上嘉定中卒有湧泉集

書姜白石昔遊詩後

平生未踏洞庭野亦不曾登南嶽峯因君談舊游恍如常相從江淮歷歷轉湘浦裘馬意氣傳邊烽吾嘗汎大江祇見匡廬松乘風醉臥帆影底高浪直濺嵐光濃日暮泊船時是時方嚴冬雪花壓船船背重纜搖柁鼓聲如鐘當年意淺語不到無句可寫波濤春君詩乃如許景物不易供盡歸一毫端狀□□飛龍人間勝處貴著眼雖有此興無由逢錢唐山水亦自好柰何薄宦難從容南高北高一千丈潮頭日夜鳴靈蹤應有隱者爲識賞青鞵布韞扶杖筇君無詫彼我媿此急還詩卷心徒恂白石道人詩集附

懷古

近城人語雜深山人語少重露滴烟嵐野水見魚鳥稻梁豐稔外耕鑿願溫飽所以桃源人不與外人道少壯旣奚爲老矣復難強紫芝未必仙采之亦可餉耆耄八九十道可無俯仰所以商人辭漢寧獨往

戴石屏哭澗泉詩云雅志不同俗休官二十年隱居溪上宅清酌澗中泉慷慨商時事淒涼絕筆篇三篇遺稿在當並史書傳自注聞時事驚心得疾而死作所以桃源人所以商人所以鹿門人三詩蓋絕筆也

七月

水石雲山裏歸來已九秋隔城如淺近鄰寺始深幽慧遠逢修靜文淵說少游徑荒殊不埽風葉上牽牛

雨多極涼冷

焉知三伏雨已作九秋風木葉涼應脫禾苗潤必豐地偏山吐月橋斷水浮空雞犬鄰家外魚蝦小市中

晚雨可愛

燈火涼秋夜。空山雨到簷。吹聲初甚少。落勢近頻添。籬菊叢叢潤。畦蔬種種霑。沈思仍靜聽。香鼎伴書籤。  
以上瀛奎律髓。

余儔

儔字季倫。號癡齋。鄱陽人。有蛙吹集。

題韓仲止壁

謁入久不出。兀坐如枯荄。蒼頭前致詞。問我何因來。士節久凋喪。人情易嫌猜。本無性命憂。不去安待哉。

游宦紀聞。余癡齋。吾鄉詩人也。章泉雅愛之。作書使訪韓仲止。及門候謁甚久。猶未出。余題詩壁間。拂袖去。仲止見詩。使人追之。不返。

范模

模字叔范。豐城人。有竹林類藁。

哭趙忠定

日月開黃道。乾坤奠渾儀。斯人今已矣。吾道竟何之。玉鉉憂思苦。金縢感慨遲。仆碑今復立。恨不見封彝。甞董青冥上。夔龍紫極邊。五龍方夾日。九虎已當天。夷險丹心直。安危白髮卷。弔湘人不去。何用解膠弦。

南昌府志。

姜夔

夔字堯章，鄱陽人。蕭東夫識之于年少，客游，妻以兄子。因寓居吳興之武康，與白石洞天爲鄰。自號白石道人。慶元中，會上書乞正太常雅樂，得免解，訖不第而卒。有白石詩集。

題嚴州烏石寺

諸老凋零極可哀，尙留名姓壓崔嵬。劉郎可是疎文墨，幾點胭脂澆綠苔。

鶴林玉露：嚴州烏石寺在高山之上，有岳武穆飛張循王俊劉

太尉光世題名，劉不能書，令侍兒意真代書。姜堯章詩云：

姑蘇懷古

夜暗歸雲繞柁牙，江涵星影鷺眠沙。行人悵望蘇臺柳，曾與吳王埽落花。

送朝天續集歸誠齋時在金陵

翰墨場中老斲輪，眞能一筆埽千軍。年年花月無閑處，處處江山怕見君。箭在的中非爾力，風行水上自成文。先生祇可三千首，回施江東日暮雲。

鶴林玉露：姜堯章學詩于蕭千巖，琢句精工。有姑蘇懷古詩云：楊誠齋喜誦之，嘗以詩送江東集歸誠齋云：誠齋大稱賞，謂其家嗣伯子曰：吾與汝勿如姜堯章也。報之以詩云：尤蕭范陸四詩翁，此後誰當第一功。新拜南湖爲上將，近差白石作先

鋒。可憐公等皆癡絕，不見詞人到老窮。謝道管

城儂已晚，酒泉端欲乞疏封。南湖謂張功父也。

除夜自石湖歸苕溪

細草穿沙雪半銷。吳宮烟冷水迢迢。梅花竹裏無人見。一夜吹香過石橋。  
美人臺上昔歡娛。今日臺空望五湖。殘雪未融青草死。苦無麋鹿過姑蘇。  
黃帽傳呼睡不成。投箸細細激流冰。分明舊泊江南岸。舟尾春風颭客燈。  
千門列炬散林鴉。兒女相思未到家。應是不眠非守歲。小窗春色入燈花。  
三生定是陸天隨。只向吳淞作客歸。已拚新年舟上過。倩人和雪洗征衣。  
沙尾風回一櫂寒。椒花今夕不登盤。百年草草都如此。自琢春詞翦燭看。  
笠澤茫茫雁影微。玉峯重疊護雲衣。長橋寂寞春寒夜。祇有詩人一舸歸。  
桑閒篝火卻宜蠶。風土相傳我未諳。但得明年少行役。祇裁白苧作春衫。  
少小知名翰墨場。十年心事祇淒涼。舊時曾作梅花賦。研墨于今亦自香。  
環玦隨波冷未銷。古苔留雪臥牆腰。誰家玉笛吹春怨。看見鵝黃上柳條。

文獻通考直齋陳氏曰。楊誠齋賞此十絕。以爲有裁雲縫月之妙思。敲金戛玉之奇聲。

### 過垂虹

自作新詞韻最嬌。小紅低唱我吹簫。曲終過盡松陵路。回首烟波十四橋。  
以上白石詩集

硯北雜志。小紅。順陽公青衣也。有色藝。順陽公之請老。姜堯章詣之。一日授簡徵新聲。堯章製暗香疎影二曲。公使二妓習之。音節清婉。公尋以小紅贈之。其夕大雪。過垂虹。賦詩云。順陽公即范石湖。



嘉泰壬戌上元日訪全老于淨林廣福院觀沈傅師碑隆茂宗畫贈詩

深衣跨羸驢。杳杳春山路。入寺君未知。閑看移桂樹。

沈碑含秀潤。隆畫出神奇。道人那得此。老子乃耽之。

龍井

年時六月海揚塵。遙見青山起白雲。聞有高僧來誦咒。巖前拋玃問龍君。以上咸淳臨安志。

燈詞

燈已闌珊月氣寒。舞兒往往夜深還。祇應不盡婆娑意。更向街心弄影看。  
南陌東城盡舞兒。畫金刺繡滿羅衣。也知愛惜春游夜。舞落銀蟾不肯歸。

武林舊事都城自舊歲冬孟駕回已有乘肩小女鼓吹舞縮者數十隊以供貴邸豪家幕次之翫而天街茶肆漸已羅列燈毬等求售謂之燈市三橋等處客邸最盛舞者往來最多每夕樓燈初上則簫鼓已紛紛自獻于下酒邊一笑所費殊不多往往

至四鼓乃還

白石有詩云云

沙河雲合無行處。惆悵來遊路已迷。卻入靜坊燈火空。門門相似列蛾眉。  
遊人歸後天街靜。坊陌人家未閉門。簾裏垂燈照樽俎。坐中嬉笑覺春溫。

武林舊事邸第好事者如清河張府蔣御樂家開設雅戲烟火花邊水際燈燭燦然游人士女縱觀則迎門酌酒而去又有幽坊靜巷好事之家多設琉璃五色泡燈更自雅潔靚妝笑語望之如神仙白石詩云云

珠絡琉璃到地垂。鳳頭銜帶玉交枝。君王不賞無人進。天竺堂深夜雨時。

武林舊事。西湖諸寺。惟三竺張燈最盛。往往有宮禁。

所賜貴瑤所遺者。都人好奇。亦往觀焉。白石詩云云。

貴客鉤簾看御街。市中珍品一時來。簾前花架無行路。不得金錢不肯回。

武林舊事。元夕節物。婦人皆戴珠翠鬧蛾玉梅雪柳菩提葉燈毬銷金合蟬貂袖項帕。而衣多尙白。蓋月下所宜也。節食所尙。則乳糖圓子。鮭餠。料斗粉。鼓湯水晶。臍韭餅。及南北珍果。并卓兒糕。宜利少澄沙。欄子。滴酥。鮑螺。酪麵。玉消膏。琥珀。餠。輕餠。生。

熟灌藕。諸色龍纏蜜煎。蜜果。糖瓜。蕪煎。七寶。薑。鼓十般糖之類。皆用鏤餠裝花盤架車兒。簇插飛蛾。紅燈。綵盞。歌叫喧闐。幕次往往使之吟叫。倍酬其直。白石亦有詩云云。

### 自題畫像

鶴驚如烟羽扇風。賦情芳草綠陰中。黑頭辦了人間事。來看凌霜數點紅。硯北雜誌。

### 句

小山不能雲。大山半爲天。

瞿佑歸田詩話。姜

堯章句造語奇特。

屋角紅梅樹。花前白石生。

愛日齋叢鈔。姜堯章居苕溪上。與白石洞天爲鄰。潘德久字之曰白石道人。有句云云。白

石生見神仙傳中。黃丈人弟子也。歲煮白石爲糧。時號白石生。堯章用此三字。蓋有據。

蘇石

石慶元中溧陽令。

句

所幸小紅方嫁了，不然啼損馬塍花。

觀北雜志：堯章每喜自度曲，吹洞簫，小紅輒歌而和之。堯章後以疾歿，故蘇石挽之云云。宋時花藥皆出東西馬塍，西馬塍皆名人葬處，白石歿後葬此。

葛天民

天民字無懷，山陰人有小集。

癸辛雜識：葛無懷初爲僧，名義銛，字朴翁，其後返初服居四湖上，一時所交皆勝士，有二侍姬，一曰如夢，一曰如幻。

絕句

夜雨漲波高二尺，失卻搗衣平正石。天明水落石依然，老夫一夜空相憶。

看山

我本田夫作比丘，也知騎馬勝騎牛。如今馬上看山色，不似騎牛得自由。

訪端叔提幹

月趁潮頭上，山隨柁尾行。大江中夜滿，雙櫓半空鳴。雁冷來無幾，鷗清睡不成。平生師友地，此夕最關情。

西湖泛舟入靈隱山

晴嵐漠漠水溶溶。落葉遮船翠蓋重。秋色盡爲漁者占。山光多向道人濃。雲連合抱前村樹。磴繞飛來小朶峯。送罷夕陽迎素月。樓臺高下自鳴鐘。

孤山後寫望

凭高每歎昔人非。空有峯峯礙落暉。大雅風流誰舉似。長安秋草又衰微。寒花負約開猶嬾。幽鳥忘機趁不飛。來往半生堪記處。西村燈火夜船歸。

卽事

寒食少逢天氣佳。十日九日雨如麻。新巢初見燕生子。小巷已無人賣花。

六月一日與堯章泛湖

六月西湖帶雨山。小舟終日傍鷗閑。風烟如許關情久。賓主相推下語難。幾點送君歸大雅。一涼今夜滿長安。江湖遠思知多少。歸去風前各倚闌。

荷葉浦中

急雨捎荷分外奇。珠璣狼藉錦紛披。下塘六月關心處。西塞扁舟入手時。卻傍青蘆深處宿。還思白石去年詩。平生浩蕩烟波趣。月淡風微祇自知。

正月二十七日雨中過蘇隄

一隄楊柳占春風。柳外羣山細雨中。人苦未晴渾不到。祇宜老眼看空濛。

清明訪白石不值

花簷懸燈柳插簷。老懷那復似錫甜。畫船已載先生去。燕子無人自入簾。以上無懷小集。

絕句

二十四友金谷宴。千三百里錦帆遊。人間無此春風樂。樂極人間無此愁。

貴耳集云。

朴翁絕唱。

嘗北梨

每到邊頭感物華。新梨嘗到野人家。甘酸尙帶中原味。腸斷春前不見花。山家清供。

船子釣灘

澤國茫茫水接天。孰云無法與人傳。見成風月難迴避。盡在華亭一釣船。松江府志。

周文璞

文璞字晉仙。號方泉。又號野齋。又號山楹。陽穀人。有方泉先生集。

貴耳集。野齋周晉仙嘗語余曰。花間集祇有五字絕佳。細雨溼流光。

景意俱微妙。野齋灌口二郎歌。聽歐陽琴行金銅塔歌。不減賀白。

姜堯章金銅佛塔歌

白石招我入書齋。使我速禮金塗塔。我疑此塔非世有。白石云是錢王禁中物。上作如來捨身相。飢鷹餓

虎紛相向。拈起靈山受記時。龍天帝釋應惆悵。形模遠自流沙至。鑄出今回更精緻。錢王納土歸京師。流落多在西湖寺。錢王本是英雄人。白蓮花現國主身。蛇鄉虎落狗腳朕。何如紅袍玉帶稱功臣。天封拆開。卽退聽。兩浙不聞笳鼓競。歸來佛子作護持。太師尙父尙書令。一枚傳到白石生。生今但有能詩聲。同袍秦外銛師兄。哦詩禮塔作佛事。同喫地爐山芋羹。何曾薰陸綺牀供。但見相輪銅綠明。哦詩禮塔猶未畢。蘆葉低飛山雨溼。

南華陽洞

稽首游名山。駕言入華陽。南洞極祕怪。松草泉水香。曲几妙隸畫。殘碣刊靈章。俯首試一窺。冷風襲綃裳。守菴敬愛客。暖我紫朮湯。遺我鵝眼錢。云是洞所藏。往有尋幽徒。入見黃金牆。侈心或已起。幾受奇鬼狀。身儻獲會遇。敢恨飛蓬霜。更丐一片土。小築安閑房。朝披神芝圖。暮試飢飯方。

金牛洞

凌兢下危梯。僂僂入深穴。回身避雲霧。偃面眎日月。藥苗護拾訝。竹節截薛孽。安知幽蹊下。有此大奇絕。金牛鑿光景。仙謀尙可閱。岡頭春已半。枸杞如點血。便恐顛風興。橫吹石崖裂。

道中望茅山有感

危亭對名岳。畢景扶鉤闌。白鷺伺察過。低昂若弓彎。去歲負笈遊。最佳元符閒。櫟林帶脩竹。派流清珊珊。離留叫晝靜。洞天生春寒。偉哉老宗師。作屋雲雨端。竟爲殺蟲蟻。不活升龍鸞。遺體但解蛻。故宮亦燒殘。今瓶已半舊。萬柱扶元壇。遂以兩不借。一筇履幘屨。入宅問玉斧。采芝投金環。墨沼篆結字。丹臺氣成盤。

將謂使隱遁。遽亦羅開關。夷甫塵尾墮。荀令香爐閑。再拜望奇秀。恍然神觀還。如見大仙伯。初髮綠映山。兩君控鶴從。俱著漢小冠。俗累當復馳。煮藥鼎欲翻。

吳中秋日

郊原落葉已離離。尚有孤花闌短籬。小醉不成憐病後。苦吟未了說愁時。鬪雞走狗衰絲喜。臨水登山宋玉悲。豆角已收無別事。待同野老赴襟期。

歸憩仁王寺

重到招提未覺遲。鉢單初副袷衣時。僧房齋院門門閉。梅子枇杷樹樹垂。蟻蔭經牀求託化。龍纏佛座學慈悲。長年無事閑來此。坐對空山諷小詩。

山居書事

茶蘼架倒無人架。全似老夫狂醉時。昨夜一番溪雨橫。又漂苔蘚到花枝。

歐陽琴歌

嗚呼箇是文忠琴。嗚呼此琴今尙存。堂中圖書散失盡。留得七弦傳子孫。六字自書書在腹。古錦梅花留不得。嗣孫賢者能忍貧。不向豪家博珠玉。初鼓如撼昭陵松。鞏原流水青溶溶。三宗龍袞在帝左。留把鈞天賜與公。再鼓似播清潁水。祇將漱流肯洗耳。曾蘇兩生招不來。自寫新聲付兒子。堯囚山舜放野。自茲以下不平苦。與君所得歸女謗。此日一洗清萬古。小儒昔誦五季傳。頗訝春秋體微變。今來再聽七弦琴。南薰遺製喜復見。浮雲流盡白日逃。何用廣陵與離騷。譜成祇度歐公曲。秋聲賦共廬山高。琴有公題

晨起

閉門不與俗人交。元晏春秋日日抄。清曉偶然隨鶴出。野風吹折白櫻桃。

訪梅

幽花墜在石根傍。幾欲攜將近草堂。草草一尊聊爾爾。跨驢歸去月荒涼。

山樂官

山樂官爾誰魂。逃河入海俱奔奔。伶倫梨園何可論。山樂官。予欲爾兮無言。如有言。爲予歌雲門。

大滌洞

嵌空纔入泉濺濺。隔凡倒懸若錐立。道士云是閻王公。入向華陽便門出。

題鍾山

往往秦淮問六朝。江樓祇有女吹簫。昭陽太極無行路。幾處鵝黃上柳條。

壽星寺聞子規

莫向空山惱病僧。暮雲臺殿異鄉人。多時不識巴江路。守著濃花哭過春。以上方泉先生詩集。

題洞霄宮

久知靈境無緣到。今被春風引得來。上帝殿頭聞雨過。仙人石面欠花開。便燒沈水禮三拜。快引流霞酬

一杯。落日斷霞催去緊。掉巾祇等白鴉回。洞霄詩集。

潘 檉



禮、字德久，永嘉人，舉進士不第，用父賞授右職，爲閤門舍人，福建兵鈐，有轉菴集。

葉水心序：德久十五六，詩律已就，永嘉言

詩者皆本德久，讀書評文得古人深處。

劉後村跋：元祐間最爲本朝文章盛時，惟賀方回、劉季孫不緣師友，頡頏其間。

雖坡谷亦深嘉屢歎，其後有劉翰武子潘檉、德久，尤爲項平菴、葉水心賞重。

### 送友人游金陵

酒盡談餘意轉新，北風一舸下寒津。  
遙知白下登樓處，正欠黃初著句人。  
往事生來多歲月，舊遊疎似曉  
星辰。半山斜日荒涼寺，更有殘碑待拂塵。

### 出郭

酤酒三家市，題詩十里塘。  
薄雲鷗外影，空翠馬頭香。  
出郭知無事，尋僧有底忙。  
終當成野逸，小築近滄浪。  
歲暮懷舊

白髮將朱顏，一去幾時返。  
懷哉不能寐，展轉復展轉。  
雀噪曉窗白，雞鳴芳歲晚。  
梅花眼中春，故情千里遠。  
還自錢塘道中

江上青山落照邊，江頭歸客木蘭船。  
春鷗自共潮回去，一點飛來是柳綿。

### 自滌陽回至烏衣鎮

行人元不恨長途，下馬旗亭酒可沽。  
回首琅邪山不見，西風吹起豆田烏。  
以上前賢小集拾遺。

姜堯章自號白石道人贈之以詩

世間官職似撻菹，采到枯松亦大夫。白石道人新拜號，斷無繳駁任稱呼。

書姜白石昔游詩後

我行半天下，未能到瀟湘。君詩如圖畫，歷歷記所嘗。起我遠游興，其如鬢已霜。何以舒此懷，轉軫彈清商。  
以上白石道人集附。

鷺

銀潢何限鵲查查，看得橋成度寶車。如許風標無用處，年年分占水蒹花。  
詩家鼎鑿。

麗春花

梁苑花銷去，黃臺早自薰。不同鶯子粟，別是石榴裙。婀娜纔勝掌，參差莫夢雲。王郎尋水竹，駐履幾殷勤。  
合璧事類別集。

題釣臺

蟬冠未必似羊裘，出處當時已熟籌。但得諸公依日月，不妨老子臥林丘。英雄陳迹千年在，香火空山萬木秋。自笑黃塵吹鬢客，愛來祠下繫孤舟。

上龜山寺

菜花開處認遺基，荒屋殘僧未忍離。寺付丙丁應有數，岸分南北最堪悲。金鈴塔上如相語，鐵佛風前亦皺眉。野匠不知行客意，競磨濃墨打殘碑。  
以上瀛奎律髓。

遇舊有感

人閒百寒暑。正似須臾期。當年同袍子。一見雪滿頤。不惟形容改。亦復聲音移。坐定問姓字。始省從師時。見此發永歎。勞生果何爲。不如多飲酒。滿腹同鴟夷。

客舍

急雨鳴空壁。輕寒上薄幃。愁多空被酒。夢短不成歸。暗想桃花落。遙憐燕子飛。偷兒欺客寢。夜靜卷春衣。

雪上簡婁舜章

雞頭旋煮蓮新拗。蒨鳳排花鱠更鮮。清夜故人忻客到。小船載酒大船邊。

平江道中

不載圖書載酒杯。姑蘇臺下小徘徊。東風不識人心老。擺柳吹花一併來。以上東甌詩集。

沈繼祖

繼祖富川人。慶元中御史。有梔林集。

寄題新昌簿廳綠陰亭

洛下追收黃耳信。林閒聞瓶綠陰亭。千章古樹虛簾接。四月清風羽扇停。兄弟頭顱時感歎。江湖歲月久飄零。對牀夜話知他日。幽賞何如得細聽。瑞州府志。

王遂

遂字去非。一字穎叔。金壇人。嘉泰二年進士。理宗朝。歷江西安撫使。權工部尚書。卒謚正肅。

題蘇端明書天慶觀乳泉賦後陵陽李心傳云此軸蓋蘇公元符北歸所書

天一生兮上浮。羽人竒兮丹正。邈儻耳兮東注。夾崑崙兮倒流。式古堂書考

曹 翬

翬字西士。號東剛。温州瑞安人。嘉泰二年進士。擢祕書丞。倉部郎。累遷知福州寶章閣待制致仕。卒諡文恭。

暮春

門外無人問落花。綠陰冉冉徧天涯。林鶯啼到無聲處。春草池塘獨聽蛙。後村千家詩

題括蒼馮公嶺二首

平蕪千里綠迢迢。水宿山行好耐勞。最是愁人最奇崛。馮公之巘浙江潮。

村南村北梧桐樹。山後山前白菜花。莫向杜鵑啼處宿。楚鄉寒食客思家。梅磧詩話

楊柳

春至風花各自榮。就中楊柳最多情。自從初學宮腰舞。直至飄綿不老成。詩林萬選

詠緣竿伎

又被鑼聲送上竿。者番難似舊時難。勸君著脚須教穩。多少旁人冷眼看。

齊東野語。趙南仲以誅李全之功。見于趙清臣史。揆每左右之。遂留于朝。其後恢復事起。遂分委以邊面。赴鎮日。朝紳置酒以餞。適有呈緣竿伎者。曹賦詩云。師果不競。

劉鎮

鎮字叔安，南海人。嘉泰二年進士。學者稱隨如先生。有隨如百詠，刊于三山。

贈隱者

夫子生東野，經年不到城。愛吟無俗趣，貪畫得閑名。荒徑侵山影，虛堂出燕聲。我慙爲謫吏，泉石負幽情。

後村千家詩

鄭鄖夢

鄖夢，建安人。

游洋州崇法院

曉色熹微麥隴閒，杖藜徐步扣禪關。兩澆水足東西堰，一抹雲收南北山。世路飽諳驚歲晚，佛巖燕坐覺身閑。故園早辦歸來計，莫待星霜滿鬢斑。

陝西通志載此詩跋云：建安先生得句法于石湖范公，早以文章名世，今觀是詩，如藍田之珍，荆山之璞，不假雕琢而自爲至寶。僧正顯刻之精，藍當山水清絕處，乃復著此澄澹簡潔之語，使讀之當有蕭然脫去世網之意者矣。嘉泰癸亥四月既望，洋

州教授

張續跋

龔頤正

頤正，本名敦頤，光宗受禪，改今名。字養正，相之子。嘉泰中，國史院檢討官。著芥隱筆記，及元祐黨

籀列傳譜述續釋常談

秦伯廟迎享送神辭三章

翼翼兮新宮。蘭櫨兮栝桂。氛總總兮高靈下隊。君視八紘兮昔何殊于棄屣。今復何有兮一席之墮。惠我  
吳人兮曷日以弭。吁嗟君來兮我心則喜。君來不來兮我忘食事。迎神

登歌兮堂上。屢舞兮堂下。君來享兮清醑。溪毛陸離兮筐筥。鮒鱸芳鮮兮亦有肥粃。君不來兮使我心苦。  
享神

車兮載旃。舟兮揚颿。鼓咽咽兮君當還。君肯來兮尙盤桓。我心熒熒兮其無端。君不我留兮下土。囂福我  
吳人兮無疾與患。千秋萬歲兮歌至德以何言。送神 吳郡志

張達明

達明嘉泰中知吳江縣

題吳江甘泉在石塘第四橋下。陸羽茶經品爲第四。張又新品爲東南第六。

橋下四櫺水。人閒六品泉。松陵無魯望。山茗爲誰煎。吳江縣志

朱軹

軹字叔止。翌之姪。嘉泰閒知南劍州。

題汪浮溪先生墓

名高從昔毀相隨。未免羣兒著力擠。一日狼心萌偃月。十年豹霧隱愚溪。不逢華日開昌運。終抱沈埋返

宋詩紀事 卷五十九

故棲已矣九原寧可作蕭蕭古木亂蟬嘶游宦紀聞

# 宋詩紀事卷六十

黃順之

順之字佑甫邵武人開禧元年進士

聽悟師彈招隱

悟師手攜清風琴爲我再奏招隱吟九原靈均不可作後人遺恨空沈沈我今聽之淚霑襟楚山日落秋聲起古猿啼月空山裏千年愁思上青楓幽蘭無香桂花死吾道非耶何至此曲中歷歷分明道苦怨王孫負春草歲晚山中難久留憶君一夕令人老王孫王孫知不知琴心招君胡不歸下沿湘江之水流上逐湘山之雲飛一彈一招一太息水流雲飛朝復夕

送葉靖逸

山高積雪明歲序冉以逼佳人抱書去西湖失顏色清夜獨慨慷詩壇夢生棘我有雙鯉魚對之不敢食

初寓橫涇

十年泉石夢及此始依然野迴天垂地身閑日抵年稍欣聞見少漸與土風便分得漁樵席白雲相共眠

題九曲尼院

錢唐厲鶚輯  
德清徐以坤勘定



曾是霓裳第一人。曲終認得本來身。多年不作東風夢。閑卻薔薇一架春。

觀冷水峪桃花

石家步障久成塵。移作包山一段春。惆悵日斜原上路。年年紅雨打行人。以上前賢小集拾遺。

韜光菴

瘦筇拄到古韜光。分得山僧半榻涼。幽鳥一聲春夢斷。溼雲漠漠護殘香。咸淳臨安志。

李宗勉

宗勉字強父。富陽人。開禧元年進士。理宗朝。拜參知政事。左丞相兼樞密使。卒。贈太師。諡文清。

題六和塔

經從塔下幾春秋。每恨無因到上頭。今日始知高處險。不如歸去臥林丘。咸淳臨安志。

危和

和字祥仲。逢吉弟。號閑靖居士。又號蟾塘。開禧元年進士。知德興縣。有蟾塘集。

積翠樓

著我高遠堂。恍若非人世。一榻臥白雲。清寒不成寐。松竹四山秋。颼颼驚客耳。誰在隔窗中。朱弦寫流水。

撫州府志。

陳垓

垓字漫翁。閩縣人。密學襄六世從孫。開禧元年進士。官至淮東提刑。

絕句

硯乾筆秃墨糊塗，半夜敲門送省符。  
擲得么么監獄廟，恰如輸了選官圖。

吹劍錄。陳漫翁監轉般倉，與鎮江守喬平章爭一事，平章乞回避，漫翁得獄祠吏持牒索回文，漫翁就書一絕云云。

華岳

岳字子西，貴池人，爲武學生，開禧元年上書請誅韓侂胄，蘇師旦下大理鞠治，編管建寧園土中，侂胄誅放還，登嘉定武科第一，爲殿前司官，以史彌遠當國謀去之，事覺下臨安獄，杖死東市，有翠微南征錄。

春暮

麥髻豆莢雨生肥，閑綠園林粉蝶飛。  
賸寔好花安四壁，不教人道是春歸。

游溪西寺次府判湯丈韻

寺覺重遊好，僧期後會賒。  
青蟲雕病葉，白鳥冢平沙。  
水瘦石生齒，山寒梅未花。  
功名應有待，且謁惠公茶。

別館卽事

十年客裏過春光，客裏逢春分外狂。  
半堵碧雲蝸路溼，一簾紅雨燕泥香。  
銜山西日辭香閣，拍岸春風趁夜航。  
莫向錢塘蘇小說，東吳新髻李紅娘。  
以上翠微南征錄。

呂聲之

聲之字大亨。新昌人。官宿松尉。徙平陽丞。終昭信軍節度推官。有沃洲雜咏。

賀葉司業兼中書舍人

英妙才華四十年。山林朝市姓名傳。何妨萬斛橫江上。不礙千帆過目前。我肯尾書于木紙。人饒首著祖生鞭。金鑿何日商風雅。伴直能呼孟浩然。

丹丘道中

夜宿溪頭十里村。數星魚火照籬門。鴈山峭絕經行處。猶帶煙霞入夢魂。以上四朝詩。

嚴大猷

大猷。蒼溪人。特奏名。官隆慶府參軍。

句

笏末到身難擊。泚兵如入手易擒。吳

萬姓統譜。吳曦傳。

蜀大猷詩云云。

王翥

翥。字一飛。成都人。篤學尙氣。吳曦謀反來請。翥陽病風瘖。潛往安丙謀誅曦。事定匿巴中。爲農終身。

送張判官歸巴州

回首三巴曲。平生萬里橋。衣冠無賴客。花月可憐宵。

灌口秋漲

所向愁無地。窮源欲上天。蛟龍胡爾怒。鷗鷺更誰憐。萬里朝宗意。羣兇跋扈年。生涯秋色裏。獨立問漁船。

吳宣撫故宅

社稷疲奔命。乾坤服至誠。扶持三蜀在。出入兩朝榮。豕犬有遺恨。麒麟空復情。家聲隕已盡。國法用猶輕。成季翻無後。花卿浪得名。門庭黃鳥語。几杖綠苔生。威福何偏重。精神恐不平。庶幾蒙世立。凡百慎持盈。

憶舍弟

藥物吾仍病。花時汝未歸。不眠愁月落。獨立看雲飛。詩禮自持律。飢寒誰解圍。遙知理舟楫。西望涕沾衣。

以上合音。

方信孺

信孺字孚若。興化軍人。以廕補官。開禧中。假朝奉郎使金。三往返不訕。歷淮東轉運判官。知眞州。至廣西漕。有好菴游戲詩境集。

劉後村序。公詩文操簡立。

成宮羽協諧。經緯麗密。

題龍隱巖

春波飽微綠。斗柄涵空明。方舟貫巖腹。鵝鶴相酬鳴。仰窺穹窿頂。宛轉百怪呈。僅餘鱗甲碎。不見頭角鯨。

下闔清冷淵。演迤萬頃澄。但同魚鳥參。勿遣蛟龍驚。挾苦撫奇篆。倚權看題名。三將標殊勳。自與山不傾。誰歟贅小築。政恐噴山靈。南洞更幽絕。仙佛依崢嶸。太虛可爲室。豈復資欒楹。乳泉助茗椀。中有冰雪清。何須驂鸞去。此卽白玉京。鼎來不速客。抱琴忽遲迎。愛此無弦曲。巖溜同一聲。爲我洗塵耳。喚我詩魂醒。祇愁白衣到。好句無繇成。

桂州黃潭舜祠

西風攪桂樹。落日明楓林。遊子懷歸期。余悲渺登臨。虞山一何高。湘水一何深。英皇僅枯冢。寂寞南薰琴。我欲奏古曲。俗耳更哇淫。古器不可見。聊作相思吟。相思長相思。相思無古今。一歌衆鳥聽。再歌萬籟沈。推手君勿歌。有酒且孤斟。落落此時意。寥寥千載心。五弦毋庸絕。四海誰知音。

重題龍隱巖

愛山那惜走千回。生怕前驅後騎催。石上參差鱗甲動。眼中在處畫圖開。驂鸞未辦乘風去。浮鷁何妨載雨來。人事百年俱變滅。祇應題字不塵埃。以上曹氏歷代詩選

游九言

九言字誠之。建陽人。父嘗。湖南安撫參議官。九言筮仕古田尉。開禧中。知光化宰。充荆鄂宣武參謀官。卒。端平中。特贈直龍圖閣。諡文靖。有默齋遺藁。

金陵野外廢寺

寒花窈窕蔓頽牆。古寺蒼苔畫掩房。犬吠屋頭山杳杳。蟲鳴塔隙草荒荒。池塘淡日兼葭冷。籬落西風橘

柚黃。六代江山金碧地。斷碑留得管輅亡。

聽鄭三彈雙韻子歌

寒窗積雪生虛明。玉壺風折層簷冰。朱霞秀色妙公子。理弦燈下高亭亭。遊絲兩兩挂孤月。雙聲應手無留停。月寒坏戶砌蟲泣。雲凍出浦邊鴻征。蒼蠅撲紙窗欲透。螺贏穴桑兒未成。琵琶寬詳雙韻切。含悽盡向弦中說。酒酣疏綺雜娛嬉。誰道壯夫心更折。一從氈毳被河山。學得聲容難辨別。鷓鴣金屋沸歌吹。鼠頭寶陌行鞞鞞。帕腰慢舞作彎弧。捉耳醕觴真折馘。眼前猶聽舊歌辭。風詔豈獨鏘虞時。罷彈三唱寢不熟。風定寒江靜夜悲。以上默齋遺藁

美人倚樓圖

簷頭燕子說春寒。胡蝶悠悠午夢殘。睡起高樓多少恨。天涯小雨怯闌干。

溪上

烟開曉日照溪頭。溪上人家岸下舟。啼鳥不知春已老。數聲啼破碧巖幽。以上詩家鼎鑪

游儀

儀字伯莊。長平之勝士。早遊京師。自北方縱覽名山。已而浮洞庭歸。隱武溪之上。

黃鶴樓

長江巨浪拍天浮。城郭相望萬景收。漢水北吞雲夢入。蜀江西帶洞庭流。角聲交送千家月。帆影中分兩岸秋。黃鶴樓高人不見。卻隨鸚鵡過汀洲。

詩人玉屑按柳溪呂炎近錄云伯莊此詩膾炙人口  
游默齋書畫南樓游受齋漕湖北日復爲之刻石

游 憫

憫字憲武。

金精山歌

皺裙蹙鳳金屈盤。秦釵□鬢香添寒。洞庭波橫嬌不起。舞娥拂桂棲孤鸞。寶□□色元宮闕。碧峽瑤草春  
漫漫。霜刀如泥割蒼玉。□綃閑綺白日閑。楮花紅飛洞雲溼。驚雷挾空老蚪泣。崖前紅落霞不流。縞衣丹  
使杓衡急。君不見石髮流漿翻柱礎。弱水液橫天上乳。西方七宿檣槍燄。長沙地遠豐鐘鳴。金精風月。

趙 靡一作雍

靡號竹潭。忠簡後人。開禧閒。爲處州太守。

雪夜黃州城下

雪後人家早閉門。江寒水落見沙痕。黃州城下東坡路。月浸梅花正斷魂。詩林萬選。

煙雨樓在處州

畫棟飛雲暮靄寒。樓臺城堞有無閒。煙收雨霽曾看否。見盡東南萬疊山。括蒼彙紀。

高孝璿

孝璿字公純。臨邛人。生開禧中。魏了翁表叔。

臨安西湖

朱簾白舫亂湖光。隔岸龍舟穢夕陽。今日權遊復明日。便將京洛看錢塘。魏鶴山題跋。

李丙

丙字仲南。官左修職郎。監臨安府都鹽倉。

夜夜曲

玉窗結怨歌幽獨。弦絕鸞膠幾時續。銅龍漏促春夜長。冷雨酸風亂心曲。閑熏翠被鬱金香。拂拭繡枕屏山綠。飛乳燕歸不歸。寂寞流蘇帳前燭。前賢小集拾遺。

高翥

翥字九萬。餘姚人。有菊磻小集。

過臨平

征帆一似白鷗輕。起揭篷船看曉晴。梅子著花霜壓岸。自披風帽過臨平。

春日湖上

清波門外放船時。盡日輕寒戀客衣。花下笑聲人共語。柳邊橋影燕交飛。曉風不定棠梨瘦。夜雨相連薺麥肥。最憶故山春更好。夜來先遣夢魂歸。

重午懷舊

獨守空庭日欲晡。滿斟濁酒不須沽。白頭兄弟三年別。青眼交游一字無。醉看葵榴懷舊事。饒思櫻笋夢



吾廬向時癡絕今愁絕。自讀離騷些老夫。

初聞雷

二月寒猶在。春雲溼未開。灑窗終夜雨。發輒數聲雷。薺麥綠生腦。棠梨紅拆腮。西湖花事動。從此日徘徊。

無題

風竹蕭蕭淡月明。孤眠真箇可憐生。不知昨夜相思夢。去到伊行是幾更。

秋興

數聲新雁夜初長。曉起開門衣袂涼。籬菊褪黃秋興嬾。瓦溝才試一痕霜。

題二小姬扇

慶娘顰翠眉。春瘦怯羅衣。笑問采花蝶。如何成對飛。

湘湘未識羞。獨坐抱箜篌。貪學耆婆舞。擡身拜部頭。

恭跋思陵宸翰拓本卷後

淡黃越紙打殘碑。盡是先皇御賜詩。白髮內人和淚讀。爲曾親見寫詩時。

下塘二首

河水新添三尺高。河邊蘆葦有龜巢。波流夜夜飄魚箔。空點籃燈照樹梢。

日出移船日又斜。蘆根時復見人家。水鄉占得秋多少。岸岸紅雲是蓼花。

輦下酒市多祭二郎祠山神

簫鼓喧天鬧酒行。二郎賽罷賽張王。愚民可煞多忘本。香火何曾到杜康。

### 過平原故相宅

拂曉官家簿錄時。未曾吹徹玉參差。旁人不忍聽鸚鵡。猶向雕籠喚太師。以上菊圃小集。

齊東野語。韓侂胄久用事。欲立奇功以固位。首謀北伐。出師諸將相繼潰敗。金人渡淮圍楚州。遣方信孺奉使通謝。信孺回言。金人欲太師首級。侂胄怒。謀再用兵。楊后俾榮王入奏。復命史彌遠。錢象祖。衛溼。王居安。張鉷。誅侂胄。時開禧二年十一月二日。侂胄愛姬三夫人號滿頭花者。生辰。張鉷移庖府中。酣飲至五鼓。其夕周筠聞其事。遂以覆帖告變。侂胄已被酒。叱曰。誰敢。遂升車而去。甫至六部橋。殿司夏震聲諾於道旁。曰。有旨。太師罷平章事。日下出國門。語未竟。建卒百餘人擁其轎出。至玉津園夾牆內。擲殺之。

### 西湖暮歸

風荷百頃占漣漪。煙樹冥濛乳燕飛。買斷小舟休喚客。暗穿萍葉載詩歸。咸淳臨安志。

### 感懷

漂泊南州又過年。恰如杜子客鄜川。酒堪度日難爲醉。詩怕傷時未可傳。店舍無煙兵火後。街坊有月試燈前。荒涼古驛聞吹笛。老淚縱橫落枕邊。

### 拜林和靖墓

玉函香骨老雲根。占斷孤山水月村。薦菊泉香涵竹影。種梅地冷帶苔痕。生前已自全名節。身後從誰問。

子孫惟有年年寒食日。遊人來與醉清尊。以上詩林萬選。

春詞

鬪草歸來上玉塔。香泥微汚合歡鞵。全籌贏得無人賞。依舊春愁自滿懷。貴耳集。

李熙輔

題真空閣

括蒼山上雲山好。雲亦好。可憐山下僧。看雲不知老。赤城志。

李迎

迎字彥將。濟源人。通判明州。有濟溪老人遺橐。

句

籍甚人言易已東。

陳振孫書錄解題。李迎彥將。永嘉周浮沚先生之壻。與先大父為襟。袂集中有送先君子赴戊子秋試詩首句云。蓋先君治易故也。

朱熊

熊字子大。

奉題周南仲正字所藏閣立本畫蘇李別

少卿昔在河梁別。執手踟躕不能發。萬古初傳五字詩。努力相期在明德。子卿海上甞為食。故人竭來重

相觀不覺看羊度歲年。卻因射雁傳消息。人閒此是長別離。少卿在虜子卿歸。歸歟尙握漢臣節。留者永衣胡人衣。天長地闊半尺絹。滿眼雲愁風景變。一人仰叫頭脫冠。一人橫涕褻著面。閤君國相稱畫師。未必想像能爾奇。前身恐是胡婦子。曾見兩公分袂時。前賢小集拾遺

陳炳

炳、龍泉人。官提轄文思院。有退菴集。

資福院平綠軒

水屋圍春綠。雲嵐送晚青。無心向朝市。信步到禪扃。野境連天遠。疎鐘隔岸聽。杯行莫辭醉。簷月笑人醒。白髮流年迅。青春盡日閑。烟消漁舍出。風約櫓聲還。往事空搔首。微官祇強顏。漂零那對此。歸夢繞雲山。至元嘉禾志

柯夢得

夢得、字東海。蒲陽人。屢上春官不第。後以特科入仕。有抱甕集。

陌上桑

朝采陌上桑。暮采陌上桑。一桑十日采。不見薄情郎。正是吳頭桑葉綠。行人莫唱江南曲。

見舊題壁

小遲點筆醉還噴。畫斷蕭梁古佛塵。今日重來應抵掌。十年分付未逢人。

晚望

宋詩紀事 卷六十

一五四九

無數寒鴉來遠鐘。物華心跡偶然同。不知海北江南路。更有愁人立晚風。以上前賢小集拾遺。

夢蝶

一覺千年一轉機。覺來還是夢還非。當時夢裏知爲蝶。便好穿花傍水歸。劉後村詩話。

吳伯凱

伯凱字虞賓。

夏夜書所見

吳牛見月喘。引重不得休。孤螢出露草。意行凌九秋。形大苦見役。物微長自由。世無漆園吏。持問逍遙遊。前賢小集拾遺。

鮑、壑

壑字份甫。

仰止亭

昔年曾此戀青山。幾度秋風入夢寒。想得玉岑迴合處。夕陽依舊滿朱闌。前賢小集拾遺。

李叔達

叔達字穎士。

舟中聞木犀

地近孤城水合流。天風吹下廣寒秋。巖花似喜幽人至。先遣清香到小舟。前賢小集拾遺。

馬并

并淮南人。

金庭觀

右軍學業隱林丘。世隔年餘景尚幽。苔鎖一泓殘墨沼。雲遮三級舊書樓。欣逢羽客開金闕。快覩仙童侍玉旒。自怪今朝脫肌骨。飛身得向洞天遊。剡錄。

金嘉謨

魚籬

芒葦織簾箔。橫當湖水秋。寄言魚與蟹。機在中流。蟹略。

蔣廷玉

廷玉字太璞。

淨刹

碑上文難讀。開山失所傳。巖松秋落子。石井夜添泉。地曠常多月。廚寒不起烟。昔年曾有虎。來到寺門前。  
前賢小集拾遺。

揚州

一馬揚州路。桃花幾樹花。春光無揀擇。淮地亦繁華。日沸長江水。風昏古壘沙。爭雄舊時事。君去莫思家。  
揚州府志。

霍洞

洞字太清武進人崇寧大魁端友從孫居城東梅坡自號筠寮

宿田舍

北風吹晴屋滿霜翁兒赤體悲無裳閨中幼婦飢欲泣忍飢取麻燈下績一身豈暇私自憐鳴機軋軋明窗前織成五丈布翁作欄幫兒作袴明朝官中催租急依然赤體當風立

歲饑太守春遊呈以絕句

朝來五馬去尋春誰信家家飯有塵枕藉道傍宜細問恐非芳草醉眠人以上咸淳毗陵志

朱肯

肯字介然

采菊亭

霜降草木落園菊發幽姿風流賢史君採掇訢忘疲雅尚已千載載詠閑居詩佳處要領略坐見花陰移前賢小集拾遺

張德象

寄沈菊山

八十乾淳老生涯半子虛久無朝士餽空有故人書詩道窮方進塵緣老盡除茫茫天壤闊誰復是知予翰墨大全

惠端方

端方字敬之。迪之子。永嘉丞。

梅花

美人在空谷。抱志苦貞潔。素衣飄白雲。容色貶春雪。臨風一笑粲。皓齒何瑩徹。破鏡忽上天。寒影浸瑤闕。  
前賢小集拾遺。

張道元

金山行次梁必大韻

二山砥柱江流中。下有水府之幽宮。巨靈設此天險重。怒濤欲起兩伏龍。山光對面山淡濃。朝暮雲起相  
過從。鐘聲兩樣飄江風。撞驚大夢醒塵胸。海門茫茫直其東。江山第一麗且雄。六朝形勝留遺蹤。天荒地  
老代不同。登臨此地閱幾翁。公獨硬語盤高穹。長江滔滔去不已。千古名山占蕭寺。白髮印公心水止。嗟  
予勞生竟何似。人閒平地風波起。誰能釣舟煙波裏。千年門限鐵臺址。不如流芳向文字。州縣之職徒勞  
耳。丈夫封侯待時至。以道事人直如矢。豈但弦歌化州里。人兮山兮有如此。我願學者梁夫子。  
金山志略。

費震

次梁必大金焦行

太倉一米梁魏中。梵王坐處如天宮。硨磲瑪瑙珊瑚重。護法更有諸天龍。醍醐浮香甘露濃。我欲問訊當  
何從。惟有一席西津風。快哉八九雲夢胸。海門直指扶桑東。金鼇兩角爭豪雄。赫山房客送墨蹤。妙高千



偈佛印同衲。衣玉帶。知何在。至今詩句撐蒼穹。江山如畫人往已。雲霾浪打寺復寺。華陽眞逸曾至止。鶴銘筆法蘭亭似。老綸敗壁扶不起。沙戶祈蠶脩竹裏。處士蝸牛空舊址。留得名山作焦字。年來俗事怕到耳。神尻氣輿隨所至。從渠烏兔走如矢。白雲之鄉吾故里。桑榆斥鷃安識此。大鵬逍遙問莊子。金山志略

金遁初

金山行次梁必大韻

江春淮水通吳中。深有萬丈天吳宮。珠樓貝闕知幾重。魚身人面赤如龍。紫雲赫奕青霞濃。天帝下降百神從。蛟鯨無端怒生風。敕移三山填其胸。日躔月緯分西東。戴鼈方知策強雄。馬塵轍跡絕遊蹤。仙境直與蓬萊同。千濤萬浪插兩峯。屹然對拱摩層穹。金山蜿蜒勢未已。焦山縈迴藏古寺。大覺仙聖所廬止。人間畫圖那得似。鏡銅摩青鳥飛起。浮圖倒影澄波裏。六朝陵闕存故址。百戰功名數行字。相去清風半帆耳。此身未遊心已至。君詩到手破的矢。我詩刻畫漸下里。三分之句豈辦此。舉杯一醉問蘇子。金山志略

朱渙

渙字濟仲

蟻飲研槽歌

晴窗棐几風日舒。呼童汲水供蟾蜍。涓流入研元穎濡。一蟻蠢蠢爰來趨。須臾十百與之俱。前後有行不亂踰。宛若徙穴昇腐餘。想應燥吻唇頰枯。清夢思欲吞江湖。搖尾羞作涸轍呼。奮迅恰如東海魚。物生天地小大殊。飢食渴飲皆同途。矧爾有靈非至愚。大槐南柯名利區。一夢而覺驚幻虛。爾其聽我毋睢盱。爾

吭既沃腹既腴。歸安其藏勿浪逋。階前羣兒正嬉娛。以指割土糜爾軀。

題徐禮部家歸去來圖

古木參天叫杜鵑。春愁渾在夕陽邊。看君此畫還三歎。憶得西江上水船。以上前賢小集拾遺。

項 詵

詵字宜甫。

便橋泊舟

身寄一葉舟。擾擾又行役。不知寒襲人。但覺酒無力。霜剝岸石裂。風激水波逆。望眼浩無涯。遠山相對碧。前賢小集拾遺。

李清叟

清叟。縉雲人。

金庭觀

山屬蓬壺第幾重。奇峯翠岫繞靈宮。雲藏毛竹深深洞。煙起香爐裊裊風。放鶴已歸天漢上。養鵝無復小池中。羽人盡得飛章法。神與寥陽路暗通。刻錄。

蔡 宰

宰字仲平。

望洞陽

歲事今無幾。清霜苦見侵。寒深落雁渚。風急擣衣砧。翠縠紋秋水。斑綃纈霧林。洞陽棲隱地。樓觀白雲深。  
前賢小集拾遺。

李謙

謙字恭甫。

秋懷

西風入商管。衆木夜有聲。候蟲竟何爲。聒聒終夕鳴。彼亦有所思。感此歲月征。人生豈異適。長嘯一拊楹。  
敗壁鳴莎雞。涼月照虛堂。南鄰機杼聲。熠熠燈火光。遙聞誰家砧。已趣公子裳。佳人在何許。葉落山中霜。  
前賢小集拾遺。

郭從範

從範字世模。

烏衣啼

碧煙障樓天。欲暮飛鳥夜。絕蕪城戍。雲外畢逋銜泥來。月明臚膊同枝語。樓中有人輟機杼。玉笙怨咽凝  
江霧。惆悵幽懷夜未闌。桂樹秋風蘭葉露。  
前賢小集拾遺。

歐陽光祖

和朱文公九曲權歌九首存一

玉女峯臨二曲流。剗心學道幾春秋。東風不信心如鐵。卻放石楠花滿頭。  
武夷詩集。

趙民則

題張家店壁

舍策投牀睡便濃。覺來涼葉動西風。驚秋念遠無窮意。客裏知誰此夜同。誠齋詩話。

潘葛民

葛民字子尙。

胡蝶花

風光白日長。胡蝶飛過牆。飛飛不停去。何忙。牆外誰家菜花黃。出門不知南陌路。心隨胡蝶尋郎處。前賢

小集拾遺。

江朝宗

朝宗括蒼人。有詩名。

梅花

小小人家短短籬。冷香溼雪兩三枝。寂寥竹外無窮思。正倚江天日暮時。剡錄。

黃復之

復之字幼張。

過臨平

孤蹤逐浪萍。幾度過臨平。人語水相應。帆移山倒行。鷺飛秋嶼冷。虹飲晚川明。不是憑詩句。丹青寫不成。

題扇面六言

峽東天圍漸小，林穿日脚微明。竹居有徑誰埽，水碓無人自鳴。以上前賢小集拾遺。

楊冠

上揚州太守

古人肉食無遠謀，腰錢騎鶴向揚州。春風十里珠簾捲，但看竹西歌吹樓。天朝選用詩書帥，上策公言須自治。屏翰堅持保障功，江淮益壯金湯勢。北騎不敢縱南牧，關塞烟迷芳草綠。健兒歌舞樂昇平，一曲梅花細柳營。揚州府志。

李大方

大方，字允蹈，廬之孫。

句

三百年來今幾秋，天地自老江自流。笛聲吹起白玉盤，正照御前楊柳碧。可憐一代經綸業，不抵鍾山幾首詩。後院落花人不到，黃鸝飛下石榴陰。

詩人玉屑楊誠齋云：李方叔之孫大方，字允蹈，晚得一賜冠，今爲雜買場，寄予詩一編，多有警句。

鄭天錫

天錫，字景輔。

江西宗派

西江一水活春茶。寒谷春燈夜撥花。人比建安多作者。詩從元祐總名家。宮商迭奏弦邊雁。鼓吹都慚井底蛙。身在天南心太史。幾番搔首夕陽斜。前賢小集拾遺。



# 宋詩紀事卷六十一

錢唐厲鶚緝

臨潼張四科勘定  
江都閔華

鄭性之

性之字信之。初名自誠。福州人。嘉定元年進士第一。理宗朝累官寶章閣待制。知樞密院。參知政事。出知福州。鶚按咸淳臨安志自誠爲嘉定元年榜首。宋史作四年榜首。趙建大也。今訂正。

落梅

夜來幾陣隔窗風。便恐明朝已掃空。點在青苔眞可惜。不如吹入酒杯中。後村千家詩。

章樵

樵號峒麓。昌化人。嘉定元年進士。歷官知漣海軍。授朝散郎。知處州卒。

伽溪在昌化縣

試將生計問農家。兒大扶犁女漚麻。燒筍霽葵供午餉。山中樂事自無涯。杭州府志。

諸葛興

興字仁叟。會稽人。嘉定元年進士。爲彭澤奉化兩丞。嘗作會稽九頌。有梅軒集。

曹娥祠



瞻靈祠兮江之湄。懷予心兮肅祇。表卓行兮尙之祀。垂妙辭兮淳之碑。嗟窈窕兮踐天性。一念烈兮萬古鏡。山眉兮蒼蒼。江練兮茫茫。江之水兮可竭。娥之靈兮不可滅。會稽續志

杜 範

範字成之。黃巖人。嘉定元年進士。端平中。拜監察御史。累遷禮部尙書。淳祐二年。拜右丞相。卒。贈少傅。諡清獻。有集。

戊辰冬和湯南萬韻

春初走京華。秋杪歸舊廬。簡編廢已久。開卷澀且疎。誰能擊其蒙。石田或可腴。雁山有佳士。讀盡天下書。足跡半九州。不憚道里迂。陋邦何足臨。而亦來我居。相從一樽酒。未厭園中蔬。笑談欣有合。浩若縱壑魚。人生惟所適。所適各有途。胸中苟不迷。到處皆通衢。簞瓢有真樂。顏氏何其臞。沒沒嗟我生。未知終焉圖。論交須論心。所論在不渝。願君示一語。令我反三隅。君無金玉音。請誦一束芻。

良月遊水樂

久矣聞水樂。邂逅作此遊。林立攢萬石。曲徑穿深幽。豁豁開古洞。下有清淺流。惜哉非古音。噴薄皆人謀。流觴飲山淥。風鬢吹颼颼。欲歸興未盡。攜手湖上樓。斜陽獻萬狀。浩以雙目收。白鳥去復還。翩翩良自由。我本山林人。對此多慚憂。歲月不我與。宴閑其可偷。便作合歸計。老矣安所投。世事皆漫爾。政恐空白頭。

和澧州喜雨韻

秋色在何許。浮嵐疊翠閒。江清雙鳥渡。天闊片雲閑。雅量肩文舉。新詩壓子山。更深聽遠溜。哦詠答潺湲。

送湯仲熊國正以直去國

朔風翦木末，碩果懸孤危。邈矣冥飛鴻，異哉聞鳴鴟。莫雲結愁陰，送君江之湄。去者挽莫留，留者良自悲。何當謝塵鞅，鼓枻相追隨。以上杜清獻公集。

薛師點

師點，鄞人。嘉定元年進士。

酬答張安撫伯玉先生

寡交率天性，積疴攻妙藥。干祿念烝嘗，著書恣談諠。永矣離畏途，何況壓好爵。感子故人意，屏吏延鈴閣。時剖千秋心，兼訂三山約。風流張平子，文采謝康樂。潛魚媚幽潭，高鳥昵林薄。物類既參差，天地亦寥廓。但愁霜霰多，石出兼水落。甬上耆舊集。

洪咨夔

咨夔，字舜俞，於潛人。嘉定元年進士。理宗朝，累官刑部尚書、翰林學士、知制誥、加端明殿學士、提舉萬壽觀。卒諡忠文。有平齋集。鶚按咸淳臨安志有嘉定元年鄭自誠榜，無二年榜。宋史誤，今訂正。

仇遠神史：洪平齋新第後，上衛王書，自宰相至州縣，無不揅摭其短。大概云：昔之宰相，端委廟堂，進退百官，今之宰相，招權納賄，倚勢作威而已。凡及一職，必如上式俱用而已。二字時相怒，十年不調。洪有桃符云：未得之平一字力，祇因而已十年閒。

贈石室朱修行

響泉一派落天風，人在浮雲柳絮中。亭午柴扉猶未啟，碧玲瓏底拒霜紅。

直玉堂作

禁門深鎖寂無譁。濃墨淋漓兩相麻。唱徹五更天未曉。一池月浸紫薇花。

題東山

在臨安縣西三里。相傳謝安石高臥之地。

金堂玉室舊相羊。被髮依然下大荒。風送嬋娟飛落葉。雲移縹緲溼疎篁。桓伊箏外深情酒。幼度碁邊定力香。萬事古今開闔眼。樓頭吹面水風涼。

天目山招隱歌

雲氣斂兮天目之巔。濤江線橫兮海門濺濺。扶桑子半兮陽烏翻。可俯而掬兮。嚙以天井無聲之泉。子其隱乎。吾與子兮拾荃。

正月十九日孟享從駕

黃繖中閒一點紅。繡雲鹵簿海棠風。鈞容聲出雲霄外。馬上誰憐有老聾。

壬辰小雪前奉親游道場何山

何山如幽人。道場如大家。穰穰衲子脚。刺刺騷翁牙。挾雋控寒颿。披光躡晨霞。危顛矯率堵。平疇略汗邪。巖泉跑虎湧。徑松髯龍拏。鐘梵破深寂。金碧開芬葩。修廊步履峻。傑閣望眼賒。山勢佩玦蠹。湖光鏡匳窳。清節杳靄入。古弁空濛遮。列翠不可唾。羣籟無敢譁。坐我梅檀林。酌之槍旗茶。宇定岫出雲。語妙天雨花。吾生久墮甑。昔遊慣乘槎。夷猶廬阜陽。宿留岷江涯。高曾留嶠棧。卑或搜崖窪。舊夢難歷省。此行足雄誇。老親八十健。閑儔二三佳。拍浮一葉渺。收覽萬景奢。富貴上蔡犬。貧賤東陵瓜。未須笑落鐸。誰能苦籬沙。

候門占噪鵲，旋繞趁歸鴉。奇事恐沒沒，舉詩屬僧伽。

### 感王荆公事

君臣一德盛熙寧，厭故趨新用六經。但怪畫圖來鄭俠，何期奏議出唐荆。掌中大地山河舞，舌底中原草木腥。養就禍胎身始去，依然鍾阜向人青。以上平齋集。

梅磻詩話：荆公行青苗免役等法，引用一等小人，天下受其苦，卒召六十年後靖康之禍。洪平齋有詩云：按國史，俠嘗從安石學，荆乃安石所薦，皆以新法不便攻之。此詩乃五十六字史論。

### 都城火

九月丙戌夜未中，祝融漲焰通天紅。層樓傑觀舞燧象，綺峯繡陌奔燭龍。始從李博士橋起，三分分風十里崩。崩摧洶洶海潮翻，填咽紛紛釜魚死。開禧回祿前未聞，今更五分多二分。大塗小撤噤不講，拱手坐視連宵焚。殿前將軍猛如虎，救得汾陽令公府。祖宗神靈飛上天，痛哉九廟成焦土。

梅磻詩話：紹定辛卯，臨安大火，九廟俱燬。獨丞相史彌遠賜第，以殿司軍救撲而存。洪平齋哭都城火詩云：末意規諷時宰甚切，聞之者足以戒。

### 吳泳

泳字叔永，號鶴林，潼川人。嘉定元年進士。理宗朝，仕至起居舍人，兼直學士院，權刑部尚書，終寶章閣學士。知泉州，有鶴林集。

嘉熙丁酉七月上泮遊大滌，題住山龔沖妙良泓軒。

舊與清泉白石盟。身閑方作洞霄行。青山延客元無鎖。碧湖流花似有情。古洞欲隨仙隱去。高岡終待鳳來鳴。道人喚我松閒飲。坐拂寒雲月未生。洞霄詩集

沈大椿

大椿嘉定中真州判官

自維揚回真州

一官安敢問青氈。形影相看祇自憐。黃鵠已登青漢去。白鷗空占淺沙眠。杏花開徧揚州雨。柳色渾鋪瓜渚烟。老眼生疎堪自笑。浪驚風物向淮天。

青蒲短短柳斜斜。入眼新愁亂莫遮。雨潤固應宜筍蕨。風饕端不貸鶯花。春來止酒常因病。客裏逢人祇問家。安得扁舟下荆水。一歸老我舊生涯。維揚志

胡榘

榘字仲方。廬陵人。銓之孫。嘉定中官工部尚書。出知福州。

嘉定二年秋重遊洞霄

重尋九鎖躡丹梯。回首空驚歲月移。風虎守關寧易到。冰龍候路卻先馳。松筠老去俱全節。猿鶴迎來盡故知。更拂棲真洞閒石。弟兄同記勝游時。

餘杭泉石欠幽探。淨拂衣塵入翠嵐。九鎖山門雲上下。一峯天柱殿西南。元封舊事無人記。德壽仙游有客談。痛飲丹泉臥磐石。松風滿耳夢初酣。洞霄詩集

句

自孤花底三更月，卻怨樓前一笛風。落梅 鶴林玉露

呂午

午，字伯可，歙縣人。嘉定四年進士。歷官浙東提刑、監察御史。遷起居史院官卒。贈華文閣學士。有

竹坡類稿

馬城花窠 寓居臨安馬城作

老子西城住，今踰十載期。栽花成茂樹，種柳長高枝。移接從渠巧，誇傳到處知。擔頭挑賣去，一一是趨時。  
竹坡類稿

和岳王廟壁上韻 祁閩西一舍有菴曰東松。紹興初，岳鄂王提兵經吾郡西上，士卒秋毫無犯，卒宿人門外，足不敢一越限

內嘗憩是菴留題

當年唯說岳家軍，紀律森嚴孰與鄰。師過村村皆按堵，功成處處可鐫珉。威名千古更無敵，詞翰數行俱絕塵。擬取中原報明主，亦勞餘刃到黃巾。新安文獻志

徐文卿

文卿，字斯遠，號樟丘，玉山人。嘉定四年進士。與趙昌父、韓仲止、齊名，有蕭秋詩集。

葉水心序云：斯遠淹玩衆作，凌暴僣蹇，情瘦而

意潤，貌枯而神澤。方于西江宗派，斯又過之。

游洞巖

跨馬絕風烟。夜與雲俱宿。彈琴向窗閒。微月挂森木。曉行巖上路。一溪緣淨綠。路窮入其中。溪流貫山腹。巖開類天設。石亂疑鬼伏。水從何自來。乃爾瑩心目。巖前野僧居。種桃滿空谷。惜已過芳時。不見花芬馥。平生青霞志。恥受紅塵辱。老我茅三閒。茲山疑可卜。前賢小集拾遺

偶題

綠樹何稠疊。清風稍羨餘。枕縈雲片片。簾透雨疎疎。修篔通泉壑。殘碑出野鉏。丘陵知幾變。耕稼雜陶漁。

雨後到南山村家

衝雨入窮山。山民猶閉關。橘垂茅屋畔。梅暎竹籬閒。奇石依林立。清泉繞舍灣。吾思隱茲地。凝立未知還。以上瀛奎律髓

周端朝

端朝字子靖。永嘉人。從朱晦菴武夷讀書。登嘉定四年進士。官至刑部侍郎。諡文忠。

三江口

吳門臺北竹樓隅。三日追陪漫叟居。曉夢驚辭赤壁鶴。夜棲看打武昌魚。橫洲遙澈分燈影。落月斜河運斗車。回伏三江問漢口。陸離蘭葉響環琚。東甌詩集

程公許

公許字季與。一字希穎。號滄洲。敘州宣化人。嘉定四年進士。理宗朝。累官中書舍人。禮部侍郎。進

權刑部尙書有塵缶集

牡丹

春工殫巧萬花叢，晚見昭儀擅漢宮。可惜芳時天不借，三更雨歇五更風。全芳備祖

黃子信

子信長泰人，嘉定四年特奏名第二人，調新會鹽場，有散翁集。

投楊帥

六年兩度拜宸旒，換得青衫白上頭。飛鵠祗因無樹繞，窮猿何暇擇林投。明知著腳當來誤，幾欲抽身不自由。安得有錢了官債，便無三徑也歸休。

歸時作

笑倩西風拂舊埃，歸時行李似初來。也知三載清貧好，博得一家強健回。

漳州府志：子信初調新會鹽場，帥楊長孺以其老榜爲監當。

心易之常措，據其簿書，子信將拂衣而去，因投以詩云云。

周假菴

題趙千里夜潮圖，款書嘉定庚午仲夏一日。

烟蒼蒼，江茫茫，明月夜挂天中央。奔潮不盡當日恨，金波怒捲虯龍長。浦口秋飛揚，鷗雁不眠聲。周章風高沙漲，望難到，羽翰但逐潮低昂。窗閒簾炷香，開卷有素商。何須八月上錢唐，對此秋濤生錦囊。珊瑚網



袁甫

甫字廣微，鄞人。嘉定七年進士第一。歷官吏部侍郎，兼國子祭酒，權兵部尚書，卒。贈少傅，諡正肅。

題陳和仲尊明亭

亭在山巔，氣象巍然。山從何來，蜿蜿蜒蜒。我坐亭上，極目一望。羣峯畢朝，尊無與抗。我撫亭下，萬象難寫。一一分明，入我醜聲。有時攜筇，偕我朋從。莫知我心，獨撫孤松。

甫上書舊集

徐清叟

清叟字直翁，浦城人。嘉定七年進士。理宗朝，歷官廣東安撫使，權兵部尚書，拜端明殿學士，知樞密院事，兼參知政事，提舉佑神觀。出知泉州，卒。贈少師，諡忠簡。

淨明院梅巖恭和高廟御製

偶因祀事訪丹霞，寺古山深石徑斜。衝凍細尋梅信息，枝頭喜見狀元花。

咸淳臨安志

贈建寧妓唐玉

上國新行巧樣花，一枝聊插鬢雲斜。嬌羞未肯從郎意，故把芳容半面遮。

豹隱紀談

陳耆卿

耆卿字壽老，臨海人。嘉定七年進士，官至國子司業，著有貧窶集，赤城志。

葉水心云：陳君之作，馳驟羣言。

特立新意，險不流怪，巧不入浮。

艱食行

新穀未升除穀罄。饑人托麥以爲命。今年種麥如去年。去年滿屋今空田。吁嗟皇天毋乃戾。去年浙右當死歲。湘中死寇淮死兵。留得東州僅旒綴。祇今艱食遽如斯。豈是造物有乘除。我無一語活四海。對之泣下徒霑裾。催租官吏如東溼。里正打門急復急。安得君眼如月長。灼破田家蓑與笠。全芳備祖

王伯大

伯大。字幼學。號留耕。福州人。嘉定七年進士。理宗朝。累官端明殿學士。拜參知政事。

贈戴石屏

詩老相過鬢已星。吟魂未減昔年清。揮毫不著塵埃語。盡把梅花巧琢成。梅磴詩話

丹青閣

傑閣崑嶷倚碧蒼。菊花時節此持觴。市聲一段隔秋水。橋影半空橫夕陽。挺挺霜筠排壑立。涓涓石溜引山長。人言絕頂多奇觀。安得閑身宿上方。詩家鼎鑪

郭磊卿

磊卿。字子奇。仙居人。嘉定七年進士。端平初。拜右正言。尋擢右史。以直言爲史嵩之所忌。除起居郎。卒諡正肅。有兌齋集。

偶題

更無清興在杯觴。不用蒲葵扇自涼。月色靜時山鶴叫。一庭清景藕花香。宋藝圃集

李劉

劉字公甫號梅亭崇仁人嘉定七年進士仕至中書舍人直學士院寶章閣待制卒有詩文類稿

孫雲翼李梅亭先生小傳劉嘗從真德秀游巧詞科文字留飲書室指竹夫人爲題曰斬春縣君祝氏可衛國夫人劉援筆立成未聯云於戲保抱攝持朕不忘乙夜之寢展轉反側爾尙形四方之風德秀擊節歎賞嘉熙己亥四月誕皇子告廟祝文劉以學士當筆以四柱作一聯云亥年己月無長蛇封豕之虞午日丑時有歸馬放牛之兆時方有蜀警人咸賞其中的有梅亭四六行世

記夢

壯志已違黃鵠下老身合占白鷗前夜來耿耿江湖夢秋水長天一釣船前賢小集拾遺

聞笛

何處桓伊酒力雄分明嚼徵更含宮倚樓三弄西風急不覺梅花大半空後村千家詩

項容孫

容孫字仲履號雲敷江陵人嘉定七年進士理宗朝官殿中侍御史

山中憶兄弟

鴻雁不成行飄零歲月長一身三處夢半夜九回腸積雪欺茅屋孤燈照錦囊何當聽夜雨卻話此淒涼

詩林萬選

吳昌裔

昌裔字季永號青蓮山人中江人嘉定七年進士理宗朝歷官知婺州加集英殿修撰以寶章閣待制致仕卒諡忠肅有集

攜客山行詠陶嘉月自雙徑來洞霄丹巖翠壑林立環擁神剎鬼刻不可名狀餐雲漱月偶得八吟留之山中以紀幽踐嘉熙三年三月穀雨存三首

上界神仙住九華故留靈鎖護烟霞雲根欲斷溪回處流出山中幾片花

九鎖山

鑿破千年渾沌心石楠當戶洞悒悒詩臞猶怯春寒在捫石梯雲不敢深

棲真洞

誰鑿巖扉石竇開懸崖飛瀑轉風雷須臾白浪從天下野客不知何處來

飛玉亭

洞霄詩集

吳淵

淵字道父寧國人嘉定七年進士累官江東安撫使行宮留守兼屯田使拜參知政事封金陵侯有退菴遺集

登南城

江城一眺思悠悠平楚蒼然野水流衰草寒烟梅丈墓敗垣斜日謝公樓江山有恨英雄老天地無私草木秋萬古興亡俱是夢不知何者爲身謀

句

一帶天分南北限兩眉烟鎖古今愁

蛾眉山

以上退菴遺集

吳潛

潛字毅夫。寧國人。淵弟。嘉定十年進士第一。淳祐中。歷官特進左丞相。封許國公。以沈炎論劾。謫化州團練使。循州安置。有履齋遺集。

睡起行北園

睡起卸冠簪。園行獨自吟。山昏知雨到。樹密覺春深。竹外童相報。門前客見尋。歸來卽敗意。誰者是知心。

卽事

春陰漠漠護輕寒。春晝無聊午夢閑。幽鳥不知人意改。銜花飛傍小闌干。以上履齋遺集。

聞同官會碧泚

碧泚堂前瞰水官。祇應喚作玉壺看。頗聞秩秩玳筵展。莫遣恂恂銀燭殘。酒付別腸寧怕窄。詩由廣舌不憂乾。老夫孤坐三更月。欲往從之道路難。

萬頃湖光浩不收。花汀竹嶼思悠悠。黃公舊隱知何地。賀監言歸乞此洲。良夜最佳唯午夜。今秋偏好是中秋。舉杯酒露月同吸。仰面青天可問不。

占春亭卽事

桃花幾片隔牆飛。獨自危樓徙倚時。目送斷鴻雲外沒。東風吹淚落天涯。見他門戶插垂楊。懊恨江南客子腸。春夢誰云無準托。連宵合眼是家鄉。

題暗香疎影詞後用潘德久贈姜白石韻

人生浮脆若菰蒲。四十年前此丈夫。擬向西湖酹孤魄。想應風月易招呼。以上開慶四明續志。

和人賦琴魚

仙人藥苗化爲魚，身雖纖細味豐腴。土人涉溪如採苻，以布爲網猶恐疎。不比吳王耽嗜鱸，松江千古留腥滓。好似春茶槍與旗，俯視銀條不足數。人生所樂在家鄉，何必定食河之魴。琴高仙游不可躡，自向崑崙朝玉皇。玉皇一笑倚天末，乞與五湖任囊括。扁舟烟雨歸去來，臥聽魚槎聲潑潑。

吳禮部詩話：宣城涇縣有琴高山，有琴高溪，俗傳控鯉而升之所。每歲三月中，有小魚數十萬，一日來集，亦傳以爲投藥滓所化。至今人待此日，盡網之，曝以爲乾，味甚美。吳履齋嘗賦詩和人韻云。

絕句

編茅爲屋竹爲椽，屋上青山屋下泉。半掩柴門人不見，老牛將犢傍籬眠。

句

楊柳年年人老大，江山處處客淒涼。以上全芳備祖。

汪立中

立中、四明人。

甲戌廷對後到洞霄丙戌假守新安又得寄徑成詩紀游

憶昔尋幽興未終，重來洞府訪仙翁。十年塵土身將隱，千里華陽路暗通。山水祇如前日好，松杉似與老人同。明朝又入黃塵去，回首青山一夢中。洞霄詩集。

丘岳

岳號煦山丹徒人嘉定十年進士江淮制置使

自淮榻代歸領累偕親友游虎丘偶成影語以紀歲月淳祐庚戌七月二十五日

一目四蒼莽突然見林丘飛來靈鷲峯幻出蓬萊洲浮圖高峯嶽石徑通深幽生公講經臺曾聞石點頭  
劍池杳無底脩綆汲寒流千古詫異傳此事還是不我來秋向深良苗市平疇憂國願年豐一稔銷百憂  
虎丘志

### 陳 塤

塤字和仲鄞人嘉定十年進士歷尙書吏部侍郎國子司業日瑄按方氏瀛奎律髓注云陳塤字伯和號習菴其先陽翟人寓居桐廬

### 分水道中

午困思茶無處煎溪橋側畔認炊烟松窗竹牖人家靜旋借沙瓶汲澗泉前賢小集拾遺

### 山居次滕元秀韻

解組滄溟畔攜家紫翠閒地臨雙港勝天與兩年閑茅屋靜聞雨竹籬疎見山所慚鄰舍老句險不容攀  
瀛奎律髓

### 釣臺第十九泉

十年不泛釣臺船夢想高風日月邊今日偶來無住著再嘗灘下鬻茶泉嚴州府志

### 遊虎丘

老龍掬雨過平川。曉影初開樹色鮮。有片白雲收不盡。日高猶在講臺邊。  
碧玉千尋劍影寒。夜深光怪逼危闌。句吳霸略成塵土。空有青山覆石壇。虎丘志。

王邁

邁字實之。號躍軒居士。興化軍仙遊人。嘉定十年進士。調南外睦宗院教授。召試學士院。改通判漳州。應詔直言爲臺官所劾。削二秩。淳祐中。知邵武軍。予祠卒。贈司農少卿。

飛翼樓舊傳說范蠡故址。

亭前一望海東流。更有雄樓在上頭。燕子飛來春漠漠。鷗夷仙去水悠悠。神交故國三千里。目斷中原四百州。日暮片雲棲古樹。昔人留與後人愁。詩家鼎鑪。

除夕

憶昔都門值歲除。高樓張燭戲呼盧。久依淨社參尊宿。難向新豐認酒徒。天子未知工草賦。鄰人或倩寫桃符。寒宵別有窮生活。點勘離騷擁地爐。後村千家詩。

賀林簿新娶

金華門外厭京塵。烏帽山前結幌巾。翁婿相看冰映玉。庭闈一笑頰生春。昔言爾爾嫌隨俗。今喚卿卿喜有人。來歲夢蘭嘉兆叶。犀錢玉果出娛賓。翰墨大全。

句

未知死所先期死。自笑狂生老更狂。



齊東野語。王實之邁。有文名。落魄不羈。爲正字日。因輪對及故相擅權。理宗宣諭曰。姑置衛王之事。邁卽抗聲曰。陛下。一則曰衛王。再則曰衛王。何容保之至耶。上怒不答。徑轉御屏曰。此狂生也。邁歸鄉里。自稱敕賜狂生。嘗有詩云云。

羅必元

必元字亨父。號北谷。隆興府進賢人。嘉定十年進士。度宗朝累官直寶章閣。兼宗學博士。

金陵作

六朝遺跡舊山川。萬里長江當守邊。一念易驕人事廢。不關飛渡北來船。  
凭高懷古思悠悠。遙想騎驢白下遊。不是龍眠圖畫裏。如今親到蔣山頭。  
嘉定建康志。

